

Yapiitajiniri Moiseshi Ishanincajeitaniri Israel Icantacantiri Tasorentsi

DEUTERONOMIO

Oca sanquenarentsi irotaque cincotatsiri isanquenare Moiseshini. Ocamantacotiri iquenqueshireacaajeitajiri ishanincajeitaniri Israel iquenajeitantapaacari caaraiteriqui oshequi osarentsipee, irosati yareejeitantaca quempejitapaaque nija Jordán. Aisati yapiitajiniri Icantacantiri Tasorentsi. Impoiji ivecarantacaro yoamejeitaqueri paita mapocajeiterineri irinijantareajeitanajerica Tasorentsi, aisati jaoca incanteari intasoncacoventeri inquemisantajeiterorica icantacantiri.

Iquenqueshireacaajiri Moiseshi ishanincapee icantasanotaqueriri Tasorentsi toncaariqui Horeb

1 ¹ Jeroca iquenquetsatacaajiriri Moiseshi maaroni ishanincapee, isavicajeitantapaacari caaraiteriqui acaqueroca nijaqui Jordán, pajitachari Arabá, montetarori Suf, otimayetapai nampitsipee Parán, Tófel, Labán, Haserot jero Dizahab. ² Iponeantajeitanajari toncaariqui Horeb, yareejeitacaro nampitsi Cadés-barnea. Ocarati 11 quitaiteri yaniijeitaque, iquenapaaque toncaariqui quenantachari Seír. ³⁻⁴ Ari aparoquera iitaiterite, caratatsiri 11 cashiri, iro 40 osarentsi, avisanaque imanatacantacariri Moiseshi ishanincapee, itsoncajeitantacariri Sihón ivincatsariteni amorroopee savicantaroniri nampitsi Hesbón, jeri Og pincatsariventironiri nampitsi Basán, savicantaroniri nampitsi Astarot, quempejitarori nampitsi Edrei. Aitaque iquenquetsatacaajiriri Moiseshi ishanincapee irimoncaratantearori maaroni icantaqueriri Tasorentsi.

⁵ Ainiroquera isavicajeitapai quipatsiqui Moab, ari icantasanajeitaqueri:

⁶ “Anta toncaariqui Horeb icantajeitaquee Atasorentsite: ‘Osamanitaque pisaviquimojeitaquero oca toncaari. ⁷ Meeca pivetsicaarantajeitajea

pijajeite iipatsitequi amorreopee paajeitapeero, pintsoteayetanaquero maaroni tsipanampiyetarori ora quipatsi Arabá, otimayetinta toncaaripee, opampaiteayetapai néguebiquiniri, otsapiyetapaaca iipatsite canaaneopee, jero otishiqui Líbano, irosati antearojaqui nija Éufrates. ⁸Irotaque quipatsi nopajeitaquempiri. Pijajeite pisavicajeitantapemparo; tempa narotaque Tasorentsi cantasanotaqueriri intacantajeitaquempiniri Abrahamani, Isaacani aisati Jacoboni, nompajeiteri pishanincajeitajeari irisavicajeitantajeari.’

Icoyeantacari cantacoventantatsiri.

(Éxo. 18.13-27)

⁹“Aisati nocantaquempi: ‘Eiro nomatirotsi apaniro nojivatacaajeitempi. ¹⁰Tempa yoshequiacaasanojeitaquee Avincatsarite Tasorentsi, aquempejeitacari impoquiropee. ¹¹¡Aiquero irishequiacaasanojeitanaquee catsini Tasorentsi iquemisantajeitaqueri intacantajeitaqueeri. Aisati intasoncacoventajeitee, irimoncaratero icantasanotaqueriri intacantajeitaqueerini! ¹²Iro cantaincha eiro nomatiro apaniro novetsicajeitempiro pomerentsitimoyetempine aisati pantavacaayetearica. ¹³Irosati nocantantaquempi: Pincoyeavacaajeitea aparopeeni pishanincasanori iotasanotatsiri quenqueshireasanotachari, noncanterita iriori irijivatacaajeitempi.’

¹⁴“Ari picantajeitanaquena: ‘Jee, cameetsataque picantaquenari.’

¹⁵“Irosati nocantajeitancari aparopee jivatacayerine 1,000, jivatacayerine 100, jivatacayerine 50 aisati jivatacayerine 10.

¹⁶Irosati nocantajeitancari: ‘Cameetsayea poameetsayeteneri pomerentsitimoyetariri pishanincapee aisati pinquempeteri pashinisati atiri. ¹⁷Ariorica pincantacoventante, eiro pinashitacaaritsi pincantacoventeri. Ocameetsati irimoncaraavacaajeitea, iriorica caari ashitaarantasanotachane aisati ashitaarantincari. Eiro catsini pitsaroacaaritsi; tempa irio Tasorentsi nintacaaquempirori pincantacoventante. Irompa iroorica pomerentsitasanotachari caari pimati poameetsateneri, impoji pamaquenari noameetsatantajejanariri.’

¹⁸“Aisati noametasanojeitaqueri maaroni paitapeerica irantayeteri.

Itiancantacari 12 amenanontantatsiri.

(Núm. 13.1–14.4)

¹⁹“Ashitoajeitantanajarori Horeb, aquenajeitantanajari toncaariqui irosati areejeitancaro iipatsite amorreopee, amoncarataquero icantaqueeri Atasorentsite. Aquenajeitantapaacarori antearoite caaraiteri covencaiteri. Tempa pineajeitaquero avirori, irosati areejeitancaro Cadés-barnea. ²⁰⁻²¹Irosati nocantajeitantaquempi: ‘Meeca areejeitancaro iipatsite amorreopee, irotaque ipajeitaqueeri Atasorentsite,

icantaqueriri peerani intacantaqueerini. Tsamequeti meeca aajeitapeero asavicantajeitapemparo, eiro atsaroajeititsi aisati eiro acantashirejeititsi.’
 22 Iro cantaincha picantajeitaquena: ‘Tempa oncameetsateji antianque acarajeitica amenanonterone quipatsi. Ariorica impiajeitapaaje incamantajeitapaaje, ayotanteari jaoca anquenajeitanaqueri, aisati jaanica inteari amanajeitapeeri.’

23 “Ora picantajeitaquenari ocameetsatimotaquena, irosati nocoyeantayetaca aparopee ashanincasanoripee, icarati 12. 24 Ari itoncaajeitanaque toncaariqui, irosati yarejeitantacaro oirincaitecotapai Escol. Ishoncajeitanacaro maaroni quipatsi yamenanontayetanaqueri savicajeitatsiri. 25 Irosati ipiajeitantajaro, yamajeitaque oitsoquipee shiocayetatsiri. Irosati icamantajeitantapaaque: ‘Ora quipatsi ipashitaqueeri Atasorensite, cameetsaite catsini.’ 26 Iro cantaincha te pincoajeiteji pijajeite, pipiatsatacaro icantavetaquempiri Tasorensi. 27 Aisati picantimajeitaqueri pivancopeequi, picantajeiti: ‘Te irinintajeiteji Tasorensi, irompa yamamempeantajeitajeeri aca asavicajeivetani Egiptoqui. Icoaque meeca iroacantajeitee, intsoncajeitee amorropee.’ 28 Impoiji picantajeitanaque: ‘¿Jaoca ancantajeiteari? Tempa icamantajeitapaaquee acarajeitiri yora savicajeitatsiri anta, oshequi ishintsitanotaque. Antearitsantsapee ini, yanaajeitaquee ainti. Aisati antearopee inampi aisati oquempeta itantoyetirori ishoncayetaquero, maaroni. Yora antearitsantsayetatsiri iriotaque ishanincapee Anac. Ora picantajeitaqueri oashiretacaajeitaquee catsini.’

29 “Iro cantaincha nocantanaquempi: ‘Eiro paamajeitaritsi aisati eiro pitsaroacaajeitaritsi. 30-31 Timatsi Atasorensite jivajeitanaqueeneri, iriotaque piacaventajeiteeneri, iquempetaquero yonijaajeitantaqueerori itasorenca anta Egiptoqui aisati anta caaraiteriqui; tempa iriotaque amaqueri apocajeitantacari irosati meeca aca, iquempetacari atiri acatsatiriri itomi.’ 32-33 Iro cantaincha te pishiretimateariji Avincatsarite Tasorensi, iriovetaca jivajeitaqueeri. Tsiteniripeequi iquitasantetacotaquee, yonijaajeitaqueero avotsi aquenajeitantapaacari. Aisati quitaiteripeequi yovaaqueero mencori. Ariorica ocatiapaaca irosati amaoreajeitanta.

Icantimatantacariri ishanincapeeni Israel Tasorensi.

(Núm. 14.20-35)

34-35 “Iquemantaquempiri Tasorensi picantimajeitaqueri, irosati iquisantanaca, icantasanotaque: ‘Narotaque Tasorensi; yoca atiripee ipiatsataquena; te incameetsajeiteji. Tecatsi meeca aparoni areejeitachane anta cameetsaiteriqui quipatsi nocashiacaajeivetacariri intacantajeitacariniri. 36 Irintiquea Caleb itomini Jefuné, iriotaque areetachane, aisati iriori irishanincajeitajeeri. Irioteitaque nomperi

quipatsi yamenanontaitiri; tempa iriotaque quearioventaquerori iquemisantasanotaquena.’

³⁷⁻³⁸“Avirotaque cantacajeitarori icantantaquenari Tasorentsi: ‘Aisati avirori, eiro pareetarotsi quipatsi. Irintiquea areetachane Josué itomini Nun amitacotimpiri, irio poyeetajempineri. Ocameetsati meeca poveshireacayeari; tempa iriotaque pajeiterine pishanincepee quipatsi. ³⁹Pijitacantashijeivetacari quisajeitimpiri ario irapitsajeitavaquempiro pijinapee jeri pitomipee. Iro cantaincha pitomipee, yora caariquera quenqueshireyeterone paitapeerica cameetsatatsiri aisati caari cameetsatatsi, iriojeitaque savicajeitantapemparone quipatsi nomperiri. ⁴⁰¡Avirojeiquea avinti, meeca pimpiajeitanajero caaraiteriqui, irosati preejeitantajearo incajare Quitioncari!’

Itsoncaarantanteetacariri ishanincepeeni Israel.

(Núm. 14.39-45)

⁴¹⁻⁴²“Irosati picantantanaquena: ‘Queario nantimojeitaqueri Tasorentsi caari cameetsatatsi. Meeaquea nojajeite nomanajeitempa; tempa irotaque icoacaquenari Tasorentsi.’ Irosati pijajeitantavetanaca paajeivetanaca pivesamentopee, pijitashijeivetaca cameetsa pitoncaajeitanaque toncaariqui. Iro cantaincha icantaquena Tasorentsi: ‘Pincantajeiteri: Te quiso noajeiteri, eiro ijajeititsi, itsoncajeitavaquericari quisajeitimpiri.’

⁴³“Aitaque nocantasanojeivetaquempi. Iro cantaincha te pinquemisantenaji, irointi pipiatsajeitanacaro icantavetaquenari Tasorentsi. Pijijeivetaca ari panaacojeitaqueri, pitoncaajeivetanaca pimanajeitantearirime. ⁴⁴Iro cantaincha ineajeitavaquempi irinti amorreopee savicajeitatsiri toncaariqui, irosati ipocashijeitantaquempi. Iquempejeitacari sani yojjanajeitanaquempi, yoaarantajeitavaquempi anta quipatsiqui Seír, irosati nampitsiqui Hormá. ⁴⁵Pipiajeitantajari, piraimovetapaacari Tasorentsi. Iro cantaincha te inquemisantempiji. ⁴⁶Irotaque asavicantajeitapaacari caaraiteriqui Cadés oshequi osarentsi.

Isavicajeitantapaajari caaraiteriqui oshequi osarentsi.

2 ¹“Irosati apiajeitantanajaro caaraiteriqui, aquenantajeitanajaro avotsi jatantachari incajarequi Quitioncari, noquemisantaquero icantaquenari Tasorentsi. Oshequi osarentsi anijjeitaque, ashoncajeitacaro toncaaripee quipatsiquiniri Seír ²⁻³Irosati icantantajana Tasorentsi: ‘Oshequitaque osarentsi pishoncacaro oca toncaaripee, meeca pijajeitaje pinquenajeitanaje quirinca. ⁴Pincantajeiteri pishanincepee: Ari anquenajeitanajeri Seíríqui isavicajeitinta ashaninca yora ishanincepeeni Esaú. Oshequi meeca itsaroacaajeitavampi, iro cantaincha ocameetsati paamaventajeitea. ⁵Eiro pimanajeitapairitsi

aisati te noncoacayempiji paarantiteri capichaji iipatsite. Tempa narotaque paqueriri irisavicajeitanteari irishanincajeitajeari coajica. ⁶Irointiquea pincoacotapeeri impimantempro poajeiteari aisati pimpinajeitero nija pirajeiteri.' ⁷Icantani Atasorentsiti itasoncacoventaquee, aisati iticaacovoltaquee maaroni paitapeerica antayetaqueri. Icantani quiso yoajeitaquee irosati omoncaratantaca 40 osarentsi aquenaquenajeitantacari antearoitequi caaraiteri; tecatsi coiteimotaqueene.

⁸"Irosati ajocantanajaro avotsi quenantachari Arabá, jero quenantachari Elat aisati Esión-geber. Avisanaquero iipatsite ashanincapee, yora ishanincapeeni Esaú. Aitaque ashoncajeitanajari aretantajarori avotsi jatantachari caaraiteriqui moabaquiniri. ⁹Impoiji icantajana Tasorentsi: 'Eiroyea pashereapairitsi ishanincapeeni Moab, aisati eiro pimanajeitapairitsi; tempa iriojeitaque ishanincapeeni Lot. Aisati te noncoacayempiji paarantiteri capichaji quipatsi Ar; tempa irotaque nopaqueeriri.' "

Iquenquetsatacotiri savicantaroniri quipatsi Ar

¹⁰(Ora quipatsi Ar irotaque isavicantajeitaniri emitapee, oshequi catsini inajeitini aisati antearitsantsapee, iquempejeitarini ishanincapeeni Anac. ¹¹Yora atiripee ijitashitari iriori refaitapee, irioquea ishanincapeeni Moab ijitiri emitapee. ¹²Iroquea Seír, aitaque isavicajeitiniri iriori horeopee. Iro cantaincha yora ishanincapeeni Esaú itsoncajeitaqueri, irosati yaajeitantajaro iipatsiteni. Iquempetaquero ishanincajeitaniri Israel itsoncajeitaqueri savicayetatsiri quipatsiqui Canaán, ipaqueriri Tasorentsi.)

¹³"Ari icantajeitajee Tasorentsi: 'Povaajeitanajea, pimonteanajero osanteni Zéred.' Irosati amonteantajeitanajaro.

¹⁴"Aponeajeitantanajarori Cadés-barnea, irosati amonteantajeitanacaro osanteni Zéred, ocarataque 38 osarentsi. Aitaque icamajeititaca ashanincapee manajeitacharini; omoncarataca icantasanotaqueri Tasorentsi. ¹⁵Tempa omapocaqueri itasorenca Tasorentsi, icamajeitantacari maaroni.

¹⁶⁻¹⁷"Ari icamajeitantacari maaroni yora manajeitacharini, irosati icantantajana Tasorentsi: ¹⁸'Pavisajeitanajero otsapitapaaca Moab, irosati pinquentajeitanajea anta Ar. ¹⁹Ariorica pineajeitapeeri ishanincapee Amón yora ishanincapeeni Lot, eiro pashereapairitsi aisati eiro pimanajeitapairitsi. Te noncoacayempiji paarantitapeeri capichaji iipatsite; tempa irotaque nopajeitaqueriri.' "

²⁰(Ora quipatsi Ar, irotaque isavicantaniiri refaitapeeni. Yora amonitapee ipajitirini zomzomeopee. ²¹Antearoite inampini aisati yoshequiasanotini antearitsantsapee, iquempejeitarini

ishanincapeeni Anac. Iro cantaincha ishinejeitaqueri Tasorentsi amonitapee itsoncajeitancacariri, irosati yaitajeitantajari iipatsite. ²²⁻²³Iquempetacantaqueri ishanincapeeni Esaú yora horeopeeni, itsoncajeitancacariri, yaapitsajeitaqueri iipatsite. Aisati iquempeyeetaqueri iriori heveopeeni savicajeiveitachaniri nampitsijaniquipeequi quempejitarori nampitsi Gaza. Yora filisteopee iponeajeitaca ovoyeshitanaque Creta; yoajeitapaaqueri, irosati isavicajeitantapaaca inampipeeniqui.)

²⁴“Irosati icantantajee Tasorentsi: ‘¡Tsame, povaaajeitanajea, pimonteanajeero nijaqui Arnón! Narotaque matacayempirine Sihón yora amorreo, pincatsariventirori anta nampitsi Hesbón. ¡Pimanajeitapeeri, paitajeitantariri iipatsite! ²⁵Meece nomatacaasanotempi intsaroacaasanojeitantempiri savicajeitatsiri maaroni nampitsipeequi; ariorica inquemacojeitavaquempi, impioncashijeitanaque.’

Yoanteetacariri pincatsari Sihón.

(*Núm. 21.21-30*)

²⁶“Asavicajeitantapaacari caaraiteriqui Cademot, notiancaque camanterine Sihón pincatsariventirori Hesbón iraacameetsajeitantavaqueeri. Jeroce nocantavaqueriri: ²⁷“Nocoque nonquenajeitapee piipatsitequi, apatiro nonquenantajeitapemparo piquenantapinijeitari, eiro nantitayetanaquempirotsi paitapeerica timayetatsiri. ²⁸Ariorica oncoiteimojeitaquena noajeiteari aisati nirajeiteri, ario nompinatanaquempi. Irointiquea nocoque pishinetavaquena navisajeitanaque. ²⁹Iquempejeitavaquena ishanincapeeni Esaú, savicatsiri quipatsiqui Seír, jeri iriori ishanincapeeni Moab, savicajeitatsiri nampitsiqui Ar, irosati amonteajeitantanaqueero nija Jordán, areejeitantarori quipatsi impashijeitaveeri Atasorentsite impajeiteeri.’

³⁰“Iro cantaincha yora pincatsari Sihón, te incoye irishinejeitee anquenajeitapee iipatsitequi. Tempa irio Tasorentsi cantacaashireacacariri iquisoshiretantacari, imatacaajeitantaqueeri amanajeitaqueri, atsoncajeitancacariri.

³¹“Irosati icantantajana Tasorentsi: ‘Meece noshinejeitempiri Sihón pintsoncajeiteri maaroni, paajeitero iipatsite.’

³²⁻³³“Ari ipocashijeivetaquee Sihón yamajeivetacari oshequi manajeitachari, irosati imanajeitantavetapaaquee anta nampitsiqui Jahaza. Iro cantaincha imatacaajeitaaquee Atasorentsite atsoncajeitancacariri irinti, maaroni itomipeeni jeri maaroni manajeivetachaniri. ³⁴Aisati maaroni nampitsipeequiniri atsoncasanojeitaqueri, avajeitaqueri shiramparipee, tsinaneppee, jananequipee; tecatsi timanajantsine. ³⁵Irintiquea aitajeitaqueri ivirapee aisati timimoyetiriniri pinatasanoyetachari. ³⁶Intanacaro amanajeitanaqueri savicajeitatsiniri

nampitsiqui Aroer quempejitarori nija Arnón, jero nampitsi timatsiri oirincateapai irosati nampitsi Galaad. Tecatsi aparoni nampitsi piajeitavaqueene; tempa irio Atasorensite matacaajeitaveerori amajeitancariri. ³⁷Apatiroquea irinti caari amanajeitanaque ishanincapeeni Amón aisati saviquimotirori nija Jaboc jeri pashinisatipee savicayetatsiri toncaaripeequi. Tempa iriotaque itsaneacojeitaveeri Atasorensite. Icantaveeri: 'Eiro pimanajeitanaqueritsi.'

Yoanteetacariri pincatsari Og.

(Núm. 21.31-35)

3 ¹“Impoiji aquenantajeitanajaro otsipa avotsi jatantachari nampitsiqui Basán, ipincatsariventiri Og. Iquemacojeitavaquee iriori, irosati ipocashijeitanaquee, yamajeitaqueri maaroni manajeitachari icarajeitiriri, imanajeitavaquee anta nampitsiqui Edrei.

²“Ari icantaquea Tasorensi: ‘Eiro pitsaroacaajeitaritsi; tempa narotaque matacayempine pintsoncantajeitariri, piquempetanaqueri Sihón ivincatsariteni amorreopee savicajeiveitachaniri anta Hesbón.’

³“Aitaque ocantacari, imatacaajeitaveero Atasorensite avantacariri pincatsarini Og aisati maaroni manajeitacharini; tecatsi timanajantsine.

⁴Aisati aajeitaveerori maaroni nampitsipee ipincatsariventaveitaniri, tecatsi aparo ajocanaque. Ocarati apatoanaca 60 aajeitaqueri timatsiri anta Argob aisati Basán. ⁵Antearopee onaveta itantoyetirori, oquisotasanoeyeteta.

Aisati ashitacoropeen, antearocotapee yoashiyetironiri. Ainiro oshequi onaveveta caari timayetatsi otanto, iro cantaincha te amoncarateroji. ⁶Maaroni atsoncaneitanaqueri: shirampari, tsinane jeri jananequipee. Aquempejeitanaqueri Sihón pincatsariventaveitaroniri Hesbón. ⁷Irintiquea aayetanaque ivirapeeni jero timimoyetiriniri pinatasanotachari.

⁸“Aitaque ocantacari aapitsajeitaqueri iipatsite apiiteroqueti pincatsari: yora amorreopee savicajeiveitachaniri acaqueroca nijaqui Jordán, oponeanaca nijaqui Arnón irosati toncaariqui Hermón. ⁹(Ora toncaari Hermón ipajitiro sidonosatipee Sirión, irioquea amorreopee ipajitiro Senir.) ¹⁰Atsoncanaqueri avajeitanaqueri nampitsipeequiniri timayetatsiniri opampaiteapai toncaari jenoqui. Aisati timatsiri Galaad jero Basán irosati Salcá jero Edrei. Irotajeitaveerori ipincatsariventiniri Og. ¹¹(Yora Og iriotaque ishanincapeeni refaíta antearitsantsayetatsiniri, apaniro itimavetanaca irinti. Ora imaamento ashiro oni, ocarati otsantsati 4 metro. Iroquea otsaranca ocarati 1 metro avishimaataquero 90 centímetro. Ainiro anta Rabáqui, inampiqui ishanincapeeni Amón.)

Isavicantacari ishanincapeeni Rubén, Gad jeri Manasés.

(Núm. 32.1-42)

¹²“Irosati nopantacari quipatsi ishanincapeeni Rubén jeri Gad, oponeanaca nampitsiqui Aroer, irosati otsapijaqui Arnón

aisati onianquirequi toncaari Galaad, yaacotaquero nampitsipee. ¹³Iro timashivetapaachari cashetani quipatsi Galaad, irotaque nopaarantayetaqueriri ishanincapeeni Manasés irosati anta nampitsiqui Basán ipincatsariventiniri Og, jero Argob, iipatsite ishanincapeeni refaíta. ¹⁴(Yora Jaír, ishanincapeeni Manasés, yaajeitaquero iriori quipatsi Argob, irosati overapaaca iipatsite Guesur jeri Maacá. Ora nampitsi Basán ipajitajiro iriori Havot-jaír. Irosati meeca ocanta.) ¹⁵⁻¹⁶Irioquea yora Maquir nopaqueri Galaad. Aisati iriori ishanincapeeni Rubén, Gad nopajeitaqueri montetaroni Galaad, irosati nijaqui Arnón. Aitaque overaanacari oirincateapai jatantachari nijaqui Jaboc, overapaaca iipatsite iriori ishanincapeeni Amón. ¹⁷Aisati yaacojeitaquero quipatsi Arabá iquenapainta catsirincaiteri. Oponeanacaro toncaariqui Pisgá irosati overapaaca otsapijaqui Jordán, jatantachari incajarequi Quinéret irosati incajarequi Arabá, (opajitari aisati Catiojari.)

¹⁸“Irosati nocantajeitancari: ‘Irotaque oca quipatsi ipaquempiri Avincatsarite Tasorentsi pisavicanajeiteari avirori, irintiquea maaroni iotasanotatsiri imanajeita irajeitanaquerota ivesamentopee, irijivajeitanaqueri ashanincapee. ¹⁹Irointiquea tsinanepee jeri jananequiee savicanaintsine, irotaque amenajeiterine virantsipee. Tempa niotaque oshequi timimojeitimpiri. ²⁰Eirotsita pipiajeitajarotsi, ariorica impajeitaqueri Tasorentsi ashanincapee quipatsi intatiqueroniri nija Jordán, irisavicajeitanaquerica cameetsa. Piquempejeitaca avirori, irosati pimpiajeitantapaajeero aca piipatsitequi nopaquempiri.’

²¹“Irosati nocantancari iriori Josué: ‘Tempa pineasantaquero avirori jaoca icantaqueriri Atasorentsite yora apitetatsiniri pincatsari. Aisati inquempejeitaqueri maaroni pincatsariyetatsiri intatiqueronta nija Jordán, pinquenajeitanaquenta. ²²Eiro pitsaroacaajeitaritsi savicajeitatsiri; tempa irio Atasorentsite majeiterine.’

Te irishineteri Tasorentsi Moiseshi irareetearo quipatsi Canaán.

²³⁻²⁴“Irosati noquenquetsatacantacari Tasorentsi. Nocantiri: ‘Notasorentsite, pintacaro ponijaaquenaro picameetsatasanoti aisati oshequi pitasorenca. Tecatsi pashini tasorentsitatsine inquitequi aisati quipatsiqui mayeterone paitapeerica caari ineapiniyeeti quempetaroni pimayetiri. ²⁵Nocantimpi, pishinetena nomonteanaquero nija Jordán. Nocoli noneero cameetsaiteiri quipatsi, onta toncaaripeequiniri aisati otishi Líbano.’ ²⁶Iro cantaincha avirojeitaque cantacaacarori caari onimotantari Tasorentsi nocantavetacariri. Irotaque icantantaquenari: ‘¡Aitapaque! Eiro picantajanatsi. ²⁷Pintoncaanaque irointi onta toncaariqui Pisgá, aitaque pamenacoyetapeerori quirinca, catonco, acaqueroca jero antaqueronta. Iro cantaincha eiro pimontearotsi nija Jordán. ²⁸Irointiquea pincamantasanoyeteri Josué irantayeteri aisati

poveshireacaasanoteari. Tempa iriotaque jivatanajerine pishanincepee irareetacanteariri quipatsi ora pamenacoyeteri.’

²⁹“Irosati atimajeitantapaaca oirincaiteapai montetarori Bet-peor.

Icantajiri Moiseshi ishanincepee.

4 ¹“Meece noshaninca, pinquenqueshiretasanojeitajero icantacantiri Tasorentsi noametaquempiri. Ocameetsati pimasanojeitero pintimajeitanteari cameetsa quipatsiqui impempiri Tasorentsi icantitacariri intacantajeitaqueerini. ²Eiro pisanquenayetajitsi pashini, aisati eiro piveayetajirotsi nocamantaquempiri. Pimoncarajeitero maaroni icantacantiri Avincatsarite Tasorentsi. ³⁻⁴Tempa pineajeitaquero imataqueri Tasorentsi itsoncajeitantacariri ashanincepeeni anta toncaariqui Baal-peor, pincatsatashiyetacaroniri ijitasorentsiyetiri savicajeitatsiniri. Iro cantaincha avinti piquemisantasanoaqueri Tasorentsi, irotaque paneantajeitacari. ⁵Iro noametasanotantajimpirori icantacantiri, icantaquenari Avincatsarite Tasorentsi, pimajeitantearori pimoncarajeitero anta quipatsi pisavicajeitapaajenta. ⁶Ocameetsati pimasanojeitero aisati pimoncarajeitero piotasanojeitanteari. Irotaque iriotantanaquempiri maaroni nampitsipeequiniri ainiro piotantari aisati piquenqueshireantari. Ariorica iriotasanojeitanaquero, aitaque incantajeitanaque: ‘Yonta savicajeitapaintsiri, oshequi iotasanoti, aisati iquenqueshirea cameetsa.’ ⁷¿Paita quempetearone nampitsi antearoite iquempejitari ijitasorentsiyeetiri, iquempetaquee Atasorentsite itsipajeitaquee ariorica aquenquetsatacaapinitiri? ⁸Aisati tecatsi quempetearoneri timatsiri icantacantiri Tasorentsi queariotasanotatsiri, quempetarori maaroni nocamantajeitaquempiri. ⁹Queariompia pipeacotarocari pineaqueri. Pincanteani pinquenqueshiretero, pincamantajeiteri iriori pitomipee jeri picharinepee.

Ineanatantacari Tasorentsi toncaariqui Horeb.

¹⁰“Ora quitaiteri asaviquimojeitantapaacariri Avincatsarite Tasorentsi toncaariqui Horeb, icantantaquenari: ‘Pampatojeiteri pishanincepee inquemantenari noneanate iriojeitanteari impincatsatapinitena, aisati iroamejeitanteariri itomipee inquempejeitantanaqueariri iriori.’ ¹¹Piquempejjeitantacarori otsapitapaa toncaari, pineaquero amorecatsantsaataque paamaritatsiri irosati jenoqui, aisati otsitenishaaque mencori. ¹²Irosati ineanatantaquempi Tasorentsi nianqui paamaritatsiriqui. Tempa piquemajeivetacari, iro cantaincha tecatsi pineimataque, irointi piquemashitaca irineane. ¹³Aitaque iotacaajeitaquempirori, Icantacantiri caratatsiri 10, isanquenataqueri apicotatequi mapi, aisati icantasanoaquempi pimasanoantearori. ¹⁴Narotaque icantaqueri noamejeitempiro pimoncarajeitantapemparori anta quipatsi pisavicajeitapaajenta.

Icantasanotiri: Eiro pijitasorensiveetashiyetatsi

¹⁵“Pinquenqueshirejaitajero anta toncaariqui Horeb piquemantacariri Tasorensi ineanataque nianqui paamaritatsiriqui, tecatsi catsini pineimataque. ¹⁶⁻¹⁸Quearioyea paamaventajeitea pipeashijeitacari, povetsicashiyetacari shiacantsiyetatsiri quempevetearine shirampari jero tsinane aisati poshiniripee, vanquiyetachari, mitajayetatsiri jeri shimapee. ¹⁹Ariorica pamenajeite jenoqui pineeririca catsirincaiteri, cashiri, impoquiropee aisati maaroni timayetatsiri, quearioyea picoashirejeiticari pimpincatsateri. Tempa iriotaque Avincatsarite Tasorensi vetsicajeitaqueriri timayetatsiri jenoqui quitaiteacojeiterine maaroni atiri. ²⁰Tempa avirojeitaque yomishitoajeitajiri pashinoncaajeivetantacaniri Egiptoqui, oquempetaca pisavicajeivetaca tsompoinaqui itaapiniyeetironta ashroyetatsiri. Irotaque meeca yashijeitantajimpiri ishanincajeitajimpi. ²¹Iro cantaincha iquisatsataquena Tasorensi, avirojeitaque cantacaacarori. Icantasanotantaquenari: ‘Eiro nomontearotsi nija Jordán aisati eiro nareetarotsi cameetsaiteri quipatsi impempiri pisavicaanteapajeari.’ ²²Aitaque noncamer narori aca. Eiro nomontearotsi nija Jordán. Avintiquea monteajeitanaquearone pisavicaanteapempari cameetsaiteriqui quipatsi. ²³Iro cantaincha paamaventea pipeacotarocari icarajeitaquempi Tasorensi aisati timatsi icoacaquempiri. Eiro povetsicashiyetatsi pijitasorensiyeteri aisati eiro pishiacantayetiritsi. ²⁴Tempa irio Avincatsarite Tasorensi tsaneacotaquempirori, ñiquempetacaro paamari tsoncantatsiri!

²⁵“Ariorica intimayetanaque pitomipee jeri picharinepee, ariorica povashiventaajea povetsicashiyetanaquea paitapeerica shiacantsiyetatsiri, pantimotasantaqueri Avincatsarite Tasorensi caari cameetsatatsi, irotaque pinquisacanteariri: ²⁶noncamantero inquite aisati quipatsi oncamantacotantempiri, intsipaite pimpeajeitajea pisavicajeivetapemparica intatiqueroqui nija Jordán. Eiro osamanititsi pintimantajeitearo, pintsoncajeitajea maaroni. ²⁷Pinquenaquenayetanaque pashinipeequi nampitsi, eiro pishequitasanojeitanajitsi pinampiqui; tempa irio Tasorensi coacaquempiri. ²⁸Aitaque pimpincatsayetapeeriri ijitasorensiyetiri atiri isheroncayetiro inchato jero mapi caari neantatsi, caari quematsi, caari oacha, aisati caari anencatsi. ²⁹Iro cantaincha ariorica pincoasanotanaje pinquemisantasanoteri Avincatsarite Tasorensi aisati pishiretasanotanajeari, aitaque pineajeri. ³⁰Ariorica avishimojeitaquempi maaroni oashinoncantsi pomerentsitantsi, aitaque pinquenqueshiretanajeari pinquemisantasanotanajeri Tasorensi. ³¹Tempa iriotaque cavintsantatsiri, eiro yojocajeitimpitsi, eiro itsoncajeitimpitsi. Aisati eiro ipeacotarotsi icantasanotitacariri intacantajeitaqueerini: ‘Noncarajeitempi’, aitaque irimoncarataquero.

³² “¿Timatsimpa peerani yovetsicantacarori Tasorentsi quipatsi aisati atiri, neaquerori aisati quemacotaquerori quempetarori aneajeitaqueri? Jentsite pijayetaite nampitsipeequi, pisampitacoventayetaitero.
³³ ¿Timatsimpa pashini atiripee quemaqueriri ineanati Tasorentsi nianqui paamaritatsiriqui, piquempejeitaca avirori piquemajeivetacari, iro cantaincha te pincamajeite? ³⁴ Tecatsi ijitasorentsiyeetiri coyeiriri atiri irishanincajeitantariri aisati onijantayetirori itasorenca, mayetirori paitapeerica covencayetatsiri caari ineapiniyeeti aisati piatariri oantatsiri, quempetarori yonijaajeitaquempiri Avincatsarite Tasorentsi anta Egiptoqui. ³⁵ Iro yonijaajeitantaquempirori, piojeitantariri iriotasanotaque Tasorentsisanori, tecatsi pashini quempetearine.
³⁶ Iriotaque neanataquempiri inquitequi, noametasanotantempiri pintime cameetsa. Ishinetaquempi pineajeitancacarori amorecatsantsaataque paamaritatsiri aisati piquemantacariri ineanataque nianqui.
³⁷ Inintasanotaqueri intacantaqueerini, irotaque icoyeantajeitaqueeri yoipacaacoventajeitantajeeri anta Egiptoqui, yonijaasanojeitaqueero itasorenca. ³⁸ Aisati yojocajeitaqueri savicajeiveitachaniri nampitsipeequi shequiasanoveitachaniri aisati neaperoyetachaniri anaacovetaquempiri, paitajeitancacariri iipatsitepee pisavicajeitancacari meeca.
³⁹ “Ocameetsa meeca pinquenqueshiretasanoteri, iriotaque Tasorentsisanori pincatsariventantatsiri inquitequi aisati quipatsiqui. ¿Tecatsi pashini quempetearine! ⁴⁰ Pimoncaratasanoteneri maaroni icantacantiri nocamantaquempiri, pintimantajeiteari cameetsa, aisati inquempetajea pishanincajeitajeeri. Aisati irotaque pisavicantajeiteari pincantaitatitempani anta quipatsiqui impempiri Avincatsarite Tasorentsi.”

Nampitsipee iraventeari.

⁴¹⁻⁴² Ari icoyeaque Moiseshi mava nampitsi acaqueroquinta nija Jordán iraventeari caari tsatantavetacha iroante, eiroquea yoanteetaritsi iriori. ⁴³ Jero ovajiro: Béser, otimi anta opampaiteapai toncaari jenoqui caraiteriquiniri, irotaque iraventeari ishanincapeeni Rubén. Jero otsipa opajita Ramot, otimi iroori anta Galaad, irotaque iraventeari ishanincapeeni Gad. Iroquea vecarantapaarori opajita Golán, otimi iroori quipatsiqui Basán, irotaque iraventeari ishanincapeeni Manasés.

⁴⁴⁻⁴⁵ Irotaque icantacantiri Tasorentsi, yoametaqueriri Moiseshi ishanincapee ishitoantajeitanajarori Egiptoni. ⁴⁶ Isavicajeitantapaacari acaquero nijaqui Jordán, oirincaiteapai montetarori Bet-peor, iipatsitequi Sihón savicantaroniri Hesbón, pincatsariventiriniri amorropee. Iriotaque itsoncajeitanaqueri ishanincapee Moiseshi, ishitoantanajarori Egiptoni. ⁴⁷ Irosati yaitajeitantapaacari iipatsite, aisati irashi Og pincatsariventironiri Basán. Iriotaque apitetatsiniri

pincasariventiriniri amorreopee savicajeitatsiniri acaqueroa nijaqui Jordán. ⁴⁸Ora iipatsite yaitajeitapaaqueriri antearoite oni, oponeanaca Aroeriqui otsapijaqui Arnón, irosati toncaariqui Sirión (opajitari aisati Hermón.) ⁴⁹Yaacojeitapaaquero maaroni quipatsi Arabá acaquero caniri nija Jordán, irosati incajarequi Catiojari overapaaca toncaari Pisgá.

Icantacantiri Tasorentsi caratatsiri 10.

(Éxo. 20.1-17)

5 ¹Irosati yapatotantajari Moiseshi maaroni ishanincapee, icantiri: “Pinquemisantero noshanincapee, noncamantajempiro icantacantiri Tasorentsi. Pinquenqueshirejaitajero piotasanotavajero catsini, aisati pimatapinijeitero.

²“Anta toncaariqui Horeb, yora Atasorentsite icantasantaquee, incarajeitee, aisati timatsi coacaaqueeri. ³Te apaniro incanteri intacantajeitaqueerini, aisati arori icantaquee apatojeitancari.

⁴Ineanataque nianqui paamaritatsiriqui anta toncaariqui.

⁵Nocarataqueri nainti, nocamantantaquempirori icantaquenari.

Tempa pitsarocaaajeitacaro avinti paamaritatsiri caari pitoncaanta. Icantancari:

⁶“Narotaque Tasorentsisanori Pitasorentsite oipacaacoventajimpiri iperanajeitanteevetaquempirini Egiptoqui.

⁷“Eiro pijitasorentsitashiyetatsi pashini pinquempetacantanteneri.

⁸“Eiro catsini povetsicashiyetatsi pishiacantantayeteariri pineayetiri inquitequi aisati timayetatsiri quipatsiqui jeri incajaresatipee.

⁹Eiro pitiyeroashiyetaritsi pimpincatsajeitancari.

Tempa narotaque Pitasorentsite tsaneacotimpirori, oasanquetamentantirori caari cameetsatatsiri yantayetiri atiripee cantimatanari, aisati itomipee, icharinepee irosati irishanincajeitajeari. ¹⁰Irintiquea nintanari aisati irishanincajeitajeari, irimoncaraterorica nocantacantiri, noncantaitiyempani noncavintsaajeiteri.

¹¹“Eiro pineavetacotashiyetarotsi novajiro, aitaque noasanquetamentaqueri neavetacotashitearone.

¹²“Pinquenqueshiretero quitaiteri pimaoreantajeiteari, pimpincatsatanteneri. Tempa irotaque nocantacantiri.

¹³Oncarate 6 quitaiteri pantaveejeitancari paitapeerica. ¹⁴Iro caratapaatsineri 7 quitaiteri, irotaque pimaoreajeitancari; tempa nonashitacaacaro. Eiro catsini pantaveejeititsi aisati pitomipee, pishintopee, piveranaro, jeri pashinisati saviquimoyetimpiri, aisati eiro pantaveetacaayetiritsi pivirapee. Ocameetsati pimaoreacaajeiteri. ¹⁵Pinquenqueshiretajero iperanajeiyeevetaquempini Egiptoqui, iro cantaincha narotaque

opacaacoventajimpiri, nonijaasanojeitaquempiro notasorenca.
Irotaque nocantasanotantimpiri ocameetsati pimaoreantajeitearo
quitaiteri.

16 “Pimpincatsateri piri aisati piniro; tempa irotaque nocantacantiri.

Aisati irotaque noaneasanojeitantempiri osamani,
pisavicantajeiteari cameetsa piipatsitequi nompajeitempiri.

17 “Eiro poantajeititsi.

18 “Eiro paimentarotsi pijina.

19 “Eiro picoshijeititsi.

20 “Eiro pitseeyacotantashitatsi, pincantacantanteariri pishaninca.

21 “Eiro pinevetitayetaritsi ijina pishaninca aisati ivanco, irovane,
inampirepee, ivacatepee, iraashinotepee, aisati timimoyetiriri.”

Itsaroacantacariri ishanincajeitaniri Israel Tasorentsi.

(Éxo. 20.18-26)

22 “Irotaque icantaqueri Tasorentsi, ineanatantacarri antearojenca
nianqui amorecatsantsaataquenta paamaritatsiri aisati
otsitenishaantapaacari mencori, apatojeitantacarri overapaacanta
toncaari. Tecatsi pashini incante. Irosati isanquenatantacaro apicotatequi
mapi, impoji ipacotaquenaro. 23 Iro cantaincha piquemajeitantavacarori
irineane mencoriqui otsitenishaaquenta, aisati pineantacarori
toncaariqui amorecatsantsaataque. Irosati pipocashijeitantaquena
aisati jivatacaayetiriri ishanincasanori jeri jivatacaajeiteeri.

24 Picantajeitapaaquena: ‘Queariotasanotaque yora Atasorentsite iriotaque
onijaasanojeitaqueerori itasorenca aisati aquemajeitantacarori irineane
nianqui amorecatsantsaataque paamaritatsiri. Meecaquea ayotasanotaque
ariorica irineanateri Tasorentsi atiri, eiro icamajeititsi. 25 Iro cantaincha,
jpaita ancoanteari onsoncajeitee covencatatsiri paamari. Ariorica
anquemajeri irineanataje aisati, ari ancamajeitaque! 26 Tecatsi atiri
quemerine Tasorentsi Aneasanotatsiri irineanaterica nianqui paamariqui,
eiro icamitsi, aquempetaca arori aquemajeivetacari; iro cantaincha te
ancamajeiteji. 27 Aviroyeata quempejitearine Tasorentsi pinquemantearori
maaroni incantempiri, impojiquea pincamantapaajenaro. Irosati
nomoncarajeitantearo incantaquempiri.’

28 “Ainiroquera piquenquetsatacana, iquemaquempi Tasorentsi
picantaquenari. Irosati icantantaquena: ‘Noquemaquero icantajeitaqueri
pishaninca, oshequi ocameetsatimotaquena. 29 ;Cantenane irosati
incantea inquenqueshiretapinitanaquero impincatsatapinitantenari, aisati
irimoncarajeitanaquero maaroni quitaiteripeequi nocantacantiri, Irotaque
nontasoncacoventanteariri aisati itomipee, irisavicajeitanteari cameetsa
inquimoshirejeite! 30 Pincantajeri meeca irijayetajeta ivancopeequi.

31 Avintiquea savicanaintsine, noncamantasanotantempirori maaroni

nocantacantiri. Poametasanotantapempariri pishanincepee, irimatantearori irimoncarajeitero anta quipatsiqui nompantajeariri irisavicanteari.’ ³² Irotaque nocantantimpiri, pimoncarajeitero maaroni icoacaquempiri Avincatsarite Tasorensi, eiro catsini pipeacotarotsi. ³³ Pinquenqueshiretasanotanaquero icamantaqueeri, pisavicantajeiteari cameetsa oshequi osarensi anta quipatsiqui impempiri.

Icantacantiri Tasorensi.

6 ¹“Irotaque icantacantiri Avincatsarite Tasorensi icantaquenari noamejeitempiri, pimajeitantearori pimoncarajeitero anta quipatsiqui pisavicajeitapaajenta. ² Irotaque pimpincatsajeitanteariri aisati pimoncarajeitantearori pincantaitiyempani, aisati inquempejeitea pitomipee jeri picharinepee. Irotaque pisavicantajeiteari oshequi osarensi. ³ Noshanincepee, irotaque nocantantimpiri, ocameetsati pimoncarajeitero pisavicantajeiteari cameetsa. Poshequiasanojeitantanaqueari catsini anta quipatsiqui oshiocasanoyetapai panquirensiyetatsiri. Tecatsi coiteimojeitempine. Tempa icantasanotitacari Tasorensi intacantajeitaqueerini.

⁴“Pinquemena maaroni ishanincajeitaniri Israel: Yora Tasorensi iriotaque Avincatsarite, apaniro ipincatsariti irinti.

⁵“Oshequi catsini pinintasanoteri pishirequi, pincanteani. Aisati pinquenqueshiretasanoteri maaroni pishintsincaqui.

⁶⁻⁷“Pinquenqueshiretasanotero maaroni nocantaquempiri. Irotaque poameta pinijeiteriri pitomipee anta pivancopeequi, ariorica paniitacaajeiteri, irotajantsirica pimaaje aisati ariorica pintinaamane. ⁸⁻⁹ Pincanteani pinquenqueshiretero pimaatacotearo pacoqui aisati pishiticainatacotearo pivancainaqui. Irotaque irioyeetantempiri. Impojji pisanquenayetero otincamipeequi pivanco aisati piqueapinitantaroriqui.

Icamantasanotiri Moiseshi ishanincepee.

¹⁰“Yora Atasorensite, iriotaque areetacaajeitempine anta quipatsiqui icantasanotaqueriri Abrahamani, Isaacani jeri Jacoboni, irotaque nompajeiteriri. Aitaque otimayetiri antearoite nampitsipee cameetsatasanoyetatsiri caari povetsicayeti avirori. ¹¹ Aisati otimantayetacaró pancotsi paitapeerica cameetsatasanoyetatsiri; caari shiayetearone pashi. Timayetatsi aisati quianarensi caari piquianayeti jero ovamashi aisati orivomashi caari pipanquijeiti. Irotaque poajeitapempari, tecatsi coiteimojeitempine. ¹² Ariorica pineajeitapaaquero ocapee, eiro pipeacotaritsi Tasorensi. Tempa iriotaque oimishitoajeitajeeri anta Egiptoqui iperanajeitanteevetaqueerini. ¹³ Pimpincatsateri apaniro irinti aisati pinquearioventero pantayeteneri icoacaimpiri. Apaniro

pineaveetacoteri ivajiroqui paitarica pincantasanoteriri itsipa.

¹⁴Eiroyea pipincatsatashiyetapaaritsi ijitasorensiyetiri, savicayetatsiri nampitsipeequi pintsipanampiyetapempari. ¹⁵Tempa quiso yoaquempi Avincatsarite Tasorensi tsaneacotaquempirori. Ariorica inquisanaquempi aitaque intsoncasanojeitajempi.

¹⁶“Eiro pineantaritsi Avincatsarite Tasorensi, iquempetaqueri ashanincapeeni anta Masaquui. ¹⁷Irointiquea pinquearioventasanotanaquero pimoncaratero icantacantiri icantaquempiri. ¹⁸Pimatasanojeitero cameetsatasanotatsiri inecameetsatiri Atasorensite. Irotaque pisavicantajeiteari cameetsa anta cameetsaiteriqui quipatsi icantasanotaqueriri intacantajeitaqueerini. ¹⁹Iriotaque oimishiajeiterine manajeivetempine pimanajeitanteariri. Tempa aitaque icantasanotaque.

²⁰“Ariorica irisampijeitempi pintomintajeitajeari: ‘¿Paita ojitari icantacantiri Tasorensi icantaqueeri?’ ²¹Ari pincanteri: ‘Peerani iperanajeivetaquena pincatsariventantatsiniri anta Egiptoqui. Iro cantaincha yonijaaquenaro itasorenca, yoimishitoajeitantajanari. ²²Narotaque neajeitaquerori covencatatsiri caari inepiniyeeti yonijaaqueri pincatsari jeri ishanincapee. ²³Iro yoimishitoajeitantajanari impantenarori quipatsi icantasanotaqueriri intacantajeitaqueerini. Meeca moncarataca. ²⁴Impoiji icantaquena amoncaratapinijeitero icantacantiri aisati ampincatsateri. Irotaque iroaneasanojeitanteeri, oquempetaca meeca. ²⁵Ariorica anquemisantaquero maaroni icantacantiri Atasorensite, aitaque asavicajeitaque cameetsa.’

Eiro ijitasorensitashiveetatsi.

(Éxo. 34.11-17)

7 ¹“Yora Avincatsarite Tasorensi iriotaque areetacaajeitempine quipatsiqui pisavicajeitantapaajeari, irojocacaajeitempiro caratatsiri 7 nampitsipee oshequiasanojeivetachari anaacojeitimpiri aisati neaperoyevetachari: yora hititapee, gergeseopee, amorreopee, cananeopee, ferezeopee, heveopee jeri jebuseopee. ²Ariorica irimatacaajeitaquempiri panaacojeitanteariri, ontimatiye pintsoncajeiteri. Eiro catsini picantiritsi: ‘Tsame ancaratavacaajeitajea;’ aisati eiro picavintsaajeitiritsi. ³Aisati eiro picarajeitiritsi yaitiricari pitomipee irishinto, aisati pishintopee yaitimpirocari itomipee iriori. ⁴Tempa ario irojocacaquero iquemisantiri Tasorensi, irointi impincatsatashiyetanaquero ijitasorensiyetiri iriori. Irotaque inquisasanotantanaquempiri Tasorensi iroashinoncaasanotempi, eiro osamanititsi intsoncajeitempi. ⁵Irointiquea cameetsatatsi pintatsinquitajeiteri itaantashiyetari, aisati pimporoquitasanojeiteri imapinepee. Impoiji pinchaquititajeiteri irinchatorepee

ipincatsatashiyetari, pintaitajeiteri maaroni. ⁶Tempa avirojeitaque ishanincatasanotajari Avincatsarite Tasorentsi, inashitacaasanotaquempi. Icoyeaquempi te pinquempeteariji savicayetatsiri pashinipeequi quipatsi. Apaniro yashitasanotaquempi.

Inintashitacari Tasorentsi ishanincajeitaniri Israel.

⁷“Queario inintaquempi Tasorentsi, avirojeitaque icoyeaqueri. Te iro incoyeantempi pishequitasanojeiti, panaacotiri pashinisati nampitsipeequiniri. Tempa capichaji pinajeiti. ⁸Tempa inintasanotaquee, icoaque irimoncaratajero icantasanotaqueriri intacantajeitaqueerini. Irotaque yoimishitoajeitantajimpiri iperanaajeitantavetaquempiri pincatsaritatsiri Egiptoqui, inijaasanotaqueri itasorenca. ⁹Ocameetsati meeca piotasanoteri Atasorentsite, iriotaque Tasorentsisanori, moncaratirori icantasanotiri. Incanteani incarajeiteri maaroni ninterineri aisati moncarateroneri icantacantiri. ¹⁰Irintiquea intsoncajeite quisajeitiriri, iroashinoncaasanoteri. ¡Eiro osamanititsi iroasanquetaimentero yantayetaqueri! ¹¹Pimoncarajeitero meeca icantacantiri nocamantajimpiri, aisati pimatapinijeitero.

Intasoncacoventeri Tasorentsi quemisanterine.

(Lev. 26.3-13; aisati Deut. 28.1-14)

¹²“Piquemajeitavaquerorica ocapee, pimoncarataquerorica aisati pantapinitaquero, irosati incarajeitantempiri Tasorentsisanori Atasorentsite, irimoncaratempiro maaroni icantasanotaqueriri intacantajeitaqueerini. ¹³Oshequi irinintasanojeitempi aisati intasoncacoventajeitempi. Iroshequiacaasanojeitempi anta quipatsiqui icantasanotaqueriri intacantajeitaqueerini: ‘Nompajeiteri.’ Intasoncacoventempiri pitomipee jero pivanquirepee: tirico, ova, quejiquiyetatsiri aisati irishequiacaasanojitempi irijanipee pivacate jeri povishate. ¹⁴Intasoncacoventasanojeitempi panaacojeiteri pashini nampitsipeequiniri. Eiro otimitsi tsinane shiravarotatsine, eiro itimitsi shirampari caari oacantatsine. Aisati inquempetea pivirapee. ¹⁵Eiro ishinecoventimpitsi ompocashijeitempi covencayetatsiri oashinoncantsi quempetarori pineajeitaqueri Egiptoqui. Irintiquea iroashinoncaajeite quisajeitempineri. ¹⁶Ocameetsati pintsoncasanojeiteri nampitsipeequiniri irishinetempiri Avincatsarite Tasorentsi. Eiro catsini pintacoshirearitsi aisati eiro pipincatsatitayetiritsi ijitasorentsitashiyetari, pipeashijeitacari avirori.

¹⁷“Arioyeata pincantajeitaque: ‘Antearoiteitaqueteemi nampitsi, oshequi catsini savicantarori, yanaajeitaquee ainti; ¿Jaoca ancantajeiteriri ajocantajeitariri?’ ¹⁸¡Eiro pitsaroacaajeitaritsi! Pinquenqueshirejaitajero jaoca icantaqueriri Avincatsarite Tasorentsi savicajeitatsiri Egiptoqui

jeri pincatsariventiriri. ¹⁹Aisati aneajeitantacarori covencayetsiri caari aneapinijeiti. Tempa avirojeitaque neaquerori itasorenca yoimishitoajeitantajeeri Ejiptoqui. Aitaque inquempejeitaqueriri iriori pitsaroacaajeivetacari. ²⁰Incantacaashireacaajeiteari intsaroashijeitanaquea catsini, irosati intsoncajeitantajeeri savicaarantayevetanainchaneri jeri tsitiyevetanainchane. ²¹Irotaque nocantasanotantimpiri: Eiro pitsaroacaajeitaritsi. Yora Atasorentsiti, Itasorentsitasanotaque catsini, iriotaque carajeitaqueeri. ²²Intsiquero incantaqueri irojoayeteri, eirota intsipaite itsonquitajeitaritsi yoshequiasanojeitanaquecari covencayetsiri, yatsicajeitimpicari. ²³Iriotaque matacaajeitempirine nampitsipeequiniri pimanajeitanteariri, irosati pintsoncantajeitaqueeri. ²⁴Impoiji irishinejeitempiri ivincatsaritepeeni, eiro ipiacoventanacatsi irosati pintsoncantaqueeri, tecatsi quenqueshireacojeitajerine. ²⁵Irosati pintaitajeitantaqueeri ishiacantayetiri ijitasorentsitashiyetaniri. Eiro pineveshireavacaritsi oro jeri plata ipatacacojetironiri, ²⁶Eiro catsini paanaqueritsi pivancoqui, itsoncantajeitimpicari avirori. Tempa

Irineane Tasorentsi oaneasanotantatsiri.

8 ¹“Pimajeitero icantacantiri nocamantaquemperi, pisavicantajeiteari cameetsa aisati pishequiasanojeitanaqueeri; pimanatacoventajeitantearori quipatsi icantasanotaqueriri Tasorentsi intacantajeitaqueerini. ²Pinquenqueshirejajero aquenajeitantapaacarori caaraiteri, quiso yoaquee Avincatsarite Tasorentsi ocarataque 40 osarentsi, iriotacaasanojeitanteeri ampincatsateri. Irotaque ineantantaqueeri aisati iriotacanteeri paita aquenqueshireyetiri, ariorica amoncarajeitaquero icantacantiri, irompa eirorica. ³Aisati yoashinoncaajeivetaquee aasanojeivetaque atashe. Iro cantaincha ipajeitaqueero maná avajeitacari, caari aneapinijeiti aisati iriori intacantajeitaqueerini. Iriotacantajeiteeri te apaniro oaneante avapinijeitari, irointiquea oaneasanotantatsi icantacantiri Tasorentsi. ⁴Ocaravetaca 40 osarentsi aniijeitaque, iro cantaincha te eerejeitanaqueji aitimeequi, aisati te antsoncacojeiteaji aitsaarepee. ⁵Pinquenqueshiretasanojeiteri Avincatsarite Tasorentsi; tempa yoametasanotaquee antime cameetsa, iquempetiri atiri iquenquejairi itomi. ⁶Pimoncaratasanojeitero meeca icantacantiri aisati pimpincatsajeiteri; pinquarioventasanotero yoametaqueeri. ⁷Tempa iriotaque aajeitanaquempine cameetsaiteriqui quipatsi, otimasanoyetapai osantenipee sotoajayetatsiri oirincaiteyetapai aisati toncaaripeequi. ⁸Aitaque onintasanoyetapairi tirico, cebada, ova, higuera, shimampiqui, orivo quejiquiyetatsiri jeri pitsi. ⁹Anta quipatsiqui tecatsi coiteimoyetapempine. Eiro piquenqueshireyetirotsi poayeteari aisati

paitapeerica. Aitaque otimantayetapaarori mapi icanteetiri hierro. Aisati anta toncaaripeequi aitaque paayerori icanteetiri cobre. ¹⁰ Ariorica ontimimotasanojeitanaquempi poajeiteari pinquemapinijeitearica, ocameetsati pincantacojeiteri Atasorensite: Icameetsati; tempa iriotaque paquempirori quipatsi cameetsaiteri.

Icamantasanotajiri eiro ipeacotantaritsi Tasorensi.

¹¹ “Queariompia pipeacojeitaricari Avincasarite Tasorensi, pincanteani pimincaratapinijeitero icantacantiri nocamantajeitaquempiri.

¹²⁻¹³ Aitaque oncanteari poapinijeitea, pinquemapinijeitea aisati pintimantayetearo cameetsayetsiri pancotsi. Irishequiasanojeitanaque pivacate, povishate, aisati inquempetanaquea oro, plata, paitapeerica pashiyetapempari. ¹⁴ Queariompiyea pishemetimentajeitirocari, pipeacotaricari Avincasarite Tasorensi. Tempa iriotaque oimishitoajeitajimpiri anta Egiptoqui iperanajeitanteevetaquempiniri. ¹⁵ Aquenajeitantapaacarori antearoite caaraiteri ocovencaitetasanoti, itimasanoyetapai maranque quepiayetatsiri jeri quitoniropee, teenta ontimayetapee nija. Iro cantaincha yora Atasorensite ishitoaajatacaaquero imperitaqui irajeitantavacari. ¹⁶ Aisati ipajeitaqueero maná, caari ineajeiti intacantajeitaqueerini, iriotacaasanojeitanteeri ampincatsateri. Irotaque ineantantaqueeri antimantajeiteari cameetsa aisati ashiretasanojeitantanaqueariri.

¹⁷ “Quearioyeya, picantashitacari: ‘Oca timimoyetaquenari, narotaque antaveetimentajeitaquerori.’ ¹⁸ Irointiquea pinquenqueshiretasanoteri Tasorensisanori Pitasorensite, iriotaque shintsitacaajeitaquempiri otimimotantayetaquempiri pashiyetacari. Imoncarataquero icantasanotitacariri intacantajeitaqueerini.

¹⁹ “Iro cantaincha ariorica pimpeacojeitanajeari, pimpincatsatashiyetanaqueari ijitasorensitashiyeetari, noncantasanotempi: aitaque intsoncasanojeitajempi.

²⁰ Inquempetaquero nampitsipee pinquenimojeivetanaqueari. Aitaque inquempetacantasanotaquempiri Tasorensisanori Pitasorensite, ariorica pimpiatsataqueari.

Icavintsaajeitaqueri Tasorensi ishanincajeitaniri Israel.

9 ¹ “Pinquemajeite noshanincapee. Irotimataintsi pimonteajeitearo nija Jordán, pimanajeitanteariri nampitsipeequiniri anaacojeitimpiri yoshequiasanojeiti aisati ineaperotasanojeita, antearopee inampi, oshoncayetacaro otantopee irosati jenoqui. ² Aisati antearitsantsapee inajeiti, iquempejeitacari ishanincapeeni Anac. Tempa piotiro icanteetiri: ‘Tecatsi materine irimanateri ishanincapeeni Anac, antearitsantsayetsiri.’

³“Ocameetsati meeca piotasanajeite iriotaque Avincatsarite Tasorensi ivatanaquempine, inquempetanaquearo paamari tsoncantatsiri. Irotaque panaacojeitantariri pintsoncasanojeiteri intsipaite; tempa icantasanotitaquempi. ⁴Ariorica irimatacaajeitaquempi, eiro picantashijeitatsi: ‘Ariovee imatacaajeitaquee Tasorensi ipantaqueerori quipatsi; tempa acameetsajeitaque.’ Iro intsoncajeitantariri, te irineacameetsatacojeiteriji caari cameetsatatsi yantajeitiri. ⁵Te iro irimatacantempiri picameetsajeiti, paitajeitantariri iipatsitepee. Ironti intsonquimentajeiteri caari cameetsatatsi yantayetiri. Irimoncaratajero icantasanotaqueriri intacantajeitaqueeri Abrahamani, Isaacani jeri Jacoboni. ⁶Piotasanajeite meeca, te iro pincameetsate impantempirori Avincatsarite Tasorensi quipatsi cameetsaiteri pisavicantajeitapaajeri. Tempa avirojei piatsari, oshequi catsini piquisoshirejeiti, iro cantaincha ipashitaquempiro.

Ipiatsataca ishanincapeeni Israel toncaariqui Horeb.

(Éxo. 31.18–32.35)

⁷“Eiro catsini pipeacojeitarotsi picantimajeitaquerini Avincatsarite Tasorensi anta caariteriqui aponeajeitantajari Egiptoqui. Aitaque picantani picantimajeitaqueri, irosati areejeitancari aca. ⁸Aisati anta toncaariqui Horeb, aitaque piquisacaasanotacariri Tasorensi, icoasanovetanaca intsoncajeitempime. ⁹Irosati notoncantanaca toncaariqui, namacotantacarori mapiqui Icantacantiri ora icantasanotaquempiri. Nosavicaiti 40 quitaiteri aisati 40 tsiteniri, te noimateaji aisati te nireji. ¹⁰Irosati ipacotantaquenaro apicotatequeti mapi isanquenatacotantacarori maaroni icantaqueri anta toncaariqui nianqui paamaritatsiriqui, apatojeitancari. ¹¹Avisantanacari 40 quitaiteri aisati 40 tsiteniri ipacotantaquenarori. ¹²Irosati icantantajana: ‘Pijate intsipaite, poirincanajea pamenapaajeri pishaninca pamajeivetajari Egiptoqui, impeashijeiteani. Te inquenqueshiretanajeroji irimoncaratero nocantavetaquempiri, yovetsicashitacaro ashiro ijitasorensitaqueri.’

¹³⁻¹⁴“Icantaquena aisati: ‘Noneajeitaqueri oshequi catsini iquisoshirejeitaque. ¡Aitapaaji meeca pashereaquena! Pishinetena nontsoncajeitajeri, tecatsi quenqueshireacojeitanajerine. Avintiquea, noshequiacaasanotaje pineaperotasanojeitanaquea, panaacotasanojeitajeri.’

¹⁵“Noirincantapaajarori toncaari otimantacari amorecaintsiri, namacotaquero apicotatequi mapi isanquenatacotantacaarori cantacantiri. ¹⁶⁻¹⁷Noneantajeitapaquempiri pantimotanaqueri Tasorensi caari cameetsatatsi, povetsicashitaca ashiro pishiacantaqueri vacajaniqui. Pipeacojeitanacaro icantavetaquempiri pinquenqueshiretemeri. Irosati nopishonquimotantapaquempiro

apicotatetsiri mapi, oporocantapaacari. ¹⁸ Impoiiji notiyeroashitanacari Tasorentsi noquenquetsatacaajiri. Aisati noquempetajiro nosavicantaitari 40 quitaiteiri aisati 40 tsiteniri, te noimateaji aisati te nireji. Irotaque nantaquempiri; tempa pantimotasanojeitaqueri Tasorentsi caari cameetsatatsi, piquisacantacariri. ¹⁹ Oshequi notsaracoventasanotanaquempi iquisantacari, icoavetanaca intsoncajeitempime. Iro cantaincha nocantacoventavajimpi, irosati iquemisantantajana. ²⁰ Aisati iquisasanotanaqueri Aarón, icoasanovetanaca iroamaajerime. Iro cantaincha nocantacoventaqueri iriori. ²¹ Irosati naantapaacari povetsicavetacari vacajaniqui pantantavetacarori caari cameetsatatsi, nojoquitaquempiri paamariqui. Impoiiji notononcavaqueri, irosati nojocavanetantacari nijateniqui quenaatapaatsiri toncaariqui.

²² “Aisati piquempejeitaca anta nampitsipeequi Tabera, Masaa jero Kibrot-hataava, aitaque piquisacaasanotacariri Tasorentsi. ²³ Aisati anta Cadés-barneaqui, icantantajeeri ‘Povaajeitanajea preejeitantarori quipatsi nompempiri.’ Aitaque aisati pipiatsajeitarori icantacantiri, te pishiretimateariji. Te pincoimateji pinquemisanteri. ²⁴ ¡Aitaque niotacotitaquempini, avirojeitaque piatsatapinitariri Tasorentsi! ²⁵⁻²⁶ Icoasanotantavetacari intsoncajeitempime. Notiyeroashitanacari osamani, ocarataque 40 quitaiteiri aisati 40 tsiteniri. Nocantasanotiri: ‘Notasorentsite, eirove pitsoncajeitiritsi noshaninca. Tempa iriojeitaque pishanincatacari aisati poipacaacoventajiri poimishitoantajeitajariri Egiptoqui, ponijaasanotaqueri pitasorenca. ²⁷ Pinquenqueshiretacotajeri quemisantajeitimpiri Abrahamani, Isaacani jeri Jacoboni. Eiro meeca piquenqueshiretacotiritsi iquisoshirejeitaque aisati caari cameetsatatsi yantimovetaquempiri, ²⁸ tecatsiquea incantajeite egiptosati: Yora Tasorentsi, te irimatero irareetacaajeiteari quipatsi icashiacaajeivetacariri. Iroyeata yaantanajariri inquisajeiteri, icoaque iroamaacantajeiteri caaraiteriqui. ²⁹ Tempa iriojeitaque pishanincatacari; irotaque poimishitoantajariri Egiptoqui ponijaasanotaqueri pitasorenca.’

Ipacotantajariri aisati Tasorentsi Moiseshi Icantacantiri

(Éxo. 34.1-10)

10 ¹ “Irosati icantantajana Tasorentsi: ‘Pincotaye avirori apicotate mapi, onquempetajeero nopavetaquempiri. Aisati povetsique aparo cajón, impoiiji pintoncaapaaje pinquenquetsatacantajenari.

² Irosati nampiitantajeero nosanquenatacotajero nosanquenayevetacari piporocacotapaaqueri, impoiiji pinquempoyecotero Cajóqui timatsiri Nonantariqui.’

³ “Irosati naantaca inchato acacia, novetsicaque cajón. Impoiiji nocotaaque apicotate mapi, irosati notoncaacantanajaro. ⁴ Ari

isanquenatavajiro icantacantiri caratatsiri 10, iquempetacantasanotajiro ora piquemajeitaqueri nianqui amorecatsantsaatantacari paamaritatsiri toncaariqui apatojeitancari. Irosati ipacotantavajanaro. ⁵Ari noirincapaaja irosati notetacotantapaacaro Cajóqui. Nomoncarataquero icantaquenari Tasorentsi, irosati ocanta meeca.”

Yovaacaajeitanajari Moiseshi ishanincapee.

⁶(Ari yojocanjiro ishanincapeeni Israel Beerot-bene-jaacán, irosati yarejeitancaro Mosera. Aitaque icamapaqueri Aarón aisati aitaque itijeetaqueriri. Irosati ipoyeetantanajari itomi Eleazar irantaveetaje. ⁷Impoiji yovaajeitanaja, irosati yarejeitancaro Gudgoda. Ari yovaajeitanaja, aisati irosati yarejeitancaro Jobata otimasanoyetapai nija. ⁸Aitaque icoyeaqueriri Tasorentsi ishanincapeeni Leví anatacotapiniterone Cajón otimantari Icantacantiri. Iriotaque aisati jatapinitatsine inantapinitariqui impincatsatapinitanteariri, aisati irineanatacotapiniteri intasoncacoventanteariri, irosati icantiro meeca. ⁹Irotaque caari otimanta iipatsite iriori iquempejeitaca irinti ishanincapee otimayetaque. Iriotaque Tasorentsi ashitearine peerine paitapeerica. Tempa irotaque icantasanotitacari.)

¹⁰“Notimantajantari toncaariqui 40 quitaiteri aisati 40 tsiteniri, aisati noquempetacantajiro nintantaitarori. Iro nopiantanajari, aitaque iquemisantaquerori Tasorentsi nocantaqueriri, caari itsoncajeitanti. ¹¹Irosati icantantajana: ‘Tsame pijate pivetsicapaajea pijivatanajeri pishanincapee, irimanatacoventantearori quipatsi nocantasanotitacariri intacantajeitaquempiri.’

Icoacaasanotiriri Tasorentsi atiri.

¹²⁻¹³“Meeca noncantempi noshanincapee. ¿Paita icoacaasanojeitimpiri Avincatsarite Tasorentsi? Apatiro icoacaimpi pimpincatsateri, pinquemisantasnoteri, pinintasanoteri, pishiretasanoteari aisati pimoncaratasanotero icantacantiri pisavicantajeiteari cameetsa. ¹⁴Pinquenqueshireacoteri meeca, iriotaque vetsicaqueriri timantayetarori inquite, conijayetatsiri aisati caari conijayetatsi jeri timantayetarori quipatsi. ¹⁵Tempa intacari Tasorentsi inintasanotaqueri intacantajeitaqueerini, impoiji icoyeaqueri ishanincajeitaniri. Tempa avirojeitaque meeca panaacojeitaqueri nampitsipeequiniri. Irotaque aneantacarori meeca.

¹⁶“Ocameetsati meeca pinquenqueshireapinitanaquero icoacaquempiri Tasorentsi, aitapaaque piquisoshirejeitaque, ¹⁷Tempa iriotaque Pivincatsarite Tasorentsi pincatsariventiriri tasorentsiyevetachari aisati iriotaque pincatsariventiriri pincatsariyevetachari. Iriotaque Pincatsaritasanotatsiri, mayetirori maaroni, aisati ipincatsayeetiri. Te

irinashitacanteaji, aisati te inquempeteari, atiri impinayeetanteariri. ¹⁸Iriotaque cavintsairiri camatsiri iriri jero camajimentaaro, aisati inintasanotiri pashinisati saviquimojeitimpiri, otimantari yoari aisati iquitsaatari. ¹⁹Ocameetsati pinintajeiteri avirori; tempa aisati piquempejeivetacari pisavicantajeivetacaniri Egiptoqui.

²⁰“Pimpincatsatasanoteri apaniro Avincatsarite Tasorentsi, aisati pinquemisantasanoteri. Ariorica pincoye pincantasanoteri itsipa paitapeerica, irointi apatiro pincante: ‘Irio Tasorentsi iotatsi.’ ²¹Iriotaque piveshireimentasanoteari; tempa imatasanotaquempiro maaroni caari inepiniyeeti, pineajeitaqueri. ²²Peerani ijajeitantacari intacantajeitaqueerini anta Egiptoqui, icarajeitanaque 70. Iro cantaincha ishequiacaasanojeitaquee Avincatsarite Tasorentsi aquempejeitanacari im poquiroppee.

Itasorentsitasanotaque Tasorentsi.

11 ¹“Pinintasanajeiteri Avincatsarite Tasorentsi aisati pimincaratasanotero icantacantiri.

²“Pinquenqueshirejajero jaoca icantacari Tasorentsi yoasanquetaaquempiri yoametaquempi, caari iotacojeiti pitomipee aisati caari inajeiti. Aisati pinquenqueshiretajero ³imayetaqueri anta Egiptoqui caari inepiniyeeti, yonijaaqueriri pincatsari jeri ishanincapee. ⁴Aisati itsoncantacariri manajeitacharini yojanajeitantavetaqueeri, yomitsitiacotaqueri incajarequi Quitioncari, iyavaayotepeeni aisati ishiacomentopeeni. ⁵Pinquenqueshiretajero aisati yonijaajeitaqueeri aquenajeitantapaacari caaraiteriqui, irosati areejitantacaro aca. ⁶Aisati yoasanquetantacariri Datán jeri Abiram yora itomipeeni Eliab ishanincasanori Rubén, otencareantanacari quipatsi otijajeitaqueri aisati ishanincasanoripeeni, ivancopeeni jero timimoyetiriniri. Tempa aneajeitaquero. ⁷Avirojeitaque neaquerori paitapeerica imataqueri Tasorentsi.

Itasoncacoventasanotaquero Tasorentsi quipatsi.

⁸“Pimincaratasanajeitero meeca icantacantiri oca nocamantajimpiri pineaperotasanotantanaqueari, pimajeitantearori pimanatacoventero quipatsi paantearori. ⁹Irotaque pisavicantajeitajeari oshequi osarentsi anta quipatsiqui icashiacaqueriniri Tasorentsi intacantajeitaqueerini aisati irishanincajeitajeari. Oshiocasanoyetapai panquiveerentsiyetatsiri, eiro ocoiteimojeitajaritsi paitapeerica. ¹⁰Ora quipatsi pimanatacoventajeiteri te onquempetapemparoji Egiptoni pipanquinontayeveta, oshequi pipomerentsiventaro pisaitacoveetiro. ¹¹Irompa pisavicajeitapaajenta, aitaque otimayetapairi toncaaripee aisati oirincaiteacoyetapai paashitomashi. Ocantani opariapiniti incani

tsincacotirori. ¹²Icantani Tasorentsi itasoncaventapinitiro maaroni osarentsipeequi.

¹³“Ariorica pimoncarajeitero maaroni oca nocamantajimpiri meeca, aisati pinintasanajeiteri Avincatsarite Tasorentsi, pimpincatsatasanotaqueririca aisati pishiretasanotearirica, ¹⁴aitaque iroariapinitaquempiro incani. Onquimojantsitapinite aisati osarentsitapinite pimatanteari pantaveejeite, paviiyetantearori tirico aisati ontimantayeteari iracayete ova jero quejiquiyetatsiri. ¹⁵Irishiocacaasanoyetero inchashiyetatsiri iroajeiteari pivirapee, iroshequiasanojeitanaqueari poajeiteari. ¹⁶Quearioyea, pishinetacari iramataviyeetempi. Aisati eiro pipeacotari Tasorentsi, pipincatsatashiyetaricari ijitasorentsiyeetiri; eiro pitiyeroashitaritsi. ¹⁷Ariorica pimpincatsatashiyetaqueari, aitaque iroasanquetaimentaquempiri. Eiro yoariajimpiprotsi incani, eiro otimayetanajitsi oitsoqui pivanquire. Irotaque pincamitantajeiteari intsipaite anta cameetsaiteriqui quipatsi impempiri.

¹⁸“Pinquenqueshiretasanotero ocapee nocamantaquempiri, pimaatacotearo pacoqui aisati pishiticainatacotearo pivancainapeequi. Irotaque irioyeetantempiri. ¹⁹Poametapinijeiteri pitomipee ocantayetiri anta pivancopeequi: ariorica paniitacairi, irotajantsirica pimaaje aisati ariorica pintinaamane. ²⁰Pisanquenatacoyetero otincamipeequi pivanco aisati piqueapinitantaroriqui. ²¹Irotaque pintimanteari osamani aisati pitomipee anta quipatsiqui icantitacariri Tasorentsi intacantajeitaqueerini nompajeiteri, pinquempetantearori inquite ocantani otimi.

²²“Ariorica pinquearioventasanojeitero pimoncaratero maaroni icantacantiri oca nocantaquempiri pimajeitero, aisati pinintasanoteri Avincatsarite Tasorentsi, pinquearioventasanotero pinquemisanteri, ²³irosati irimatacantempi panaacojeitantariri savicayetatsiri nampitsipeequi. Pintsoncajeitantariri shequiasanojeivetachari aisati neaperotasanoeyevetachari. ²⁴Anta pinquenaajeitanaquenta, irotaque pashiteari: omponeanaquea caaraiteriqui, irosati otishiqui Líbano, jero quenapaatsineri nijaqui Éufrates, irosati incajarequi Mediterráneo. ²⁵Tecatsi catsini piajeitavaquempine; tempa irio Avincatsarite Tasorentsi cantacaashireacaajeitearine. Intsaroacaashijeitantavaquempiri jaocarica pinquenayetanaqueri; tempa icantasanotitaca.

²⁶“Meecca noncamantempiro: pincoyeanontearo tasoncaventantsi iroorica oashinoncantsi: ²⁷⁻²⁸ora tasoncaventantsi, ariorica pinquemisantajeitero icantacantiri Avincatsarite Tasorentsi oca nocamantajimpiri, iroquea oashinoncantsi, ariorica pimpincatsatashiyetanaqueari ijitasorentsitashiyetari, aisati pintseencanajerorica icantacantiri aisati pojocanajerorica piquemisantiri Avincatsarite Tasorentsi.

²⁹“Ariorica irareetacaaquempi Avincatsarite Tasorentsi quipatsi pimanatacoventajeiteri, anta toncaariqui Guerizim pineanatacoteneri tasoncaventantsi. Iroquea toncaariqui Ebal, pineanatacoteneri oashinoncantsi. ³⁰Ora toncaaripee otimi intatiqueroqui nija Jordán, iipatsitequi canaaneopee savicatsiri opampaiteapai; omontetaro Guilgal tsipatarori Moré, otimantari inchatopee encina. ³¹⁻³²Meca irotaintsi pimonteajeitearo nija Jordán, pimanatacoventajeitantarori quipatsi impashijeitaquempiri Avincatsarite Tasorentsi impempiri. Ariorica pimanatacoventajeitaquero aisati pisavicantajeitaquero, ocameetsati pimajeitero maaroni icantacantiri, oca noametapinijeitaquempiri.

Apaniro oni Inantari Tasorentsi.

12 ¹“Jero oca icantacantiri Tasorentsi. Ocameetsati pimatapinijeitero ariorica pisavicantajeitapaquero quipatsi impempiri Tasorentsi, icantasanotaqueriri intacantajeitaqueerini.

²“Ariorica pimanajeitaqueri nampitsipeequiniri, pintsonquitasanojeitanaqueri yoatiantariri ijitasorentsiyetiri ipincatsatapinitantariri: yoayetiri toncaariqui, otishipeequi jero ishaaviji antearomencoyetsiri inchato. ³Pintatsinquitayeteri itaantayetanariri, pimporoquitajeiteri imapinepee, pintaitajeiteri irinchatorepee ipincatsayetiri, aisati pintsonquitajeiteri ishiacantayevetari ijitasorentsitiri, tecatsiquea quenqueshireacotanajerine.

⁴⁻⁵“Eiro piquempetacantiritsi Avincatsarite Tasorentsi ariorica pimpincatsateri. Irointiquea incoyeaquerica jaocarica ontimeri Inantari iipatsitepeequi acarajeitiri, aitaque pijatapinijeiteri pimpincatsatantariri. ⁶Aitaque poyeneriri pivirapee pintayeneri aisati paajeitanaqueneri diezmo jero picashiacairiri aisati pampashiteariri, jeri aisati jivatatsiri itimi irijani pivacate jeri povishate. ⁷Aitaque poimentajeiteariri Avincatsarite Tasorentsi. Pincaratero pijinapee jeri pitomipee pinquimoshireventajeitero oitsoquipee pivanquire intasoncaventajeitempiti.

⁸“Eiro piquempetacantajeitirotsi antajeitiri aca, antanontayeta acoacaayetari arori. ⁹Queario, tequerata meca pareejeitearo quipatsi impempiri Avincatsarite Tasorentsi, pisavicajeitanteari cameetsa. ¹⁰Ariorica pimonteanaquero nija Jordán pisavicajeitantapempari cameetsa, eiro pamaanajaritsi irashereajeitajempi quisajeitempineri aisati eiro pitsaroajeitanajitsi. ¹¹Impoiji incoyeaque Avincatsarite Tasorentsi irinantapiniteari, aitaque paapinijeiteneriri maaroni nocantaquempiri: pivirapee poyeneriri, pintaasanoyeteneriri, jero aparatatsiri pimpashiyeteariri aisati picashiacayetiriri. ¹²Aitaque pinquimoshireventapiniteriri, pincaratero pijinapee, pitomipee, pinampirepee jeri ishanincapeeni Leví saviquimojeitimpiri; tempa tecatsi iriori iipatsite.

¹³“Quearioyeya pitaashiyetanaricari Tasorentsi pivira jaocapeerica.
¹⁴Apatiro pintaapiniteneri jaocarica ontimeri Irinanteari incoyeaqueri,
aitaque pimoncaraterori maaroni nocantaquempiri.

¹⁵“Aintiquea jaocarica pisavicayetapeeri, ocameetsati poyeri pivira itasoncaventaquempiri Avincatsarite Tasorentsi. Omavetaquea teerica pimoncaratero amejitari, ocameetsati poajeiteari maaroni picoiri, pinquempetacanteri maniro jeri gacela. ¹⁶Irointiquea iriraja pojoquero, eiro catsini poajeitarotsi.

¹⁷“Aisati eiro poajeitarotsi pinampipeequi picashiacayetiriri tirico, oreji orivo, irijanipee pivacate jeri povishate jivayetsiri itimi jero picashiacayetiriri picoacaari. ¹⁸Aintiquea paapinitero anta Irinanteariqui Avincatsarite Tasorentsi, aitaque pinquimoshireventajeiterori oitsoquipee pivanquire pantaveeventiri. Pincaratero pijinapee, pitomipee, pinampirepee jeri iriori ishanincapeeni Leví. ¹⁹Eiro pipeacojeitaritsi pimperi iriori iroyeari; tempa iriotaque picarajeitiri.

²⁰“Ariorica impaquempiro Avincatsarite Tasorentsi quipatsi antearoite icashiacaquempiri, picoaquerica poajeitea ivatsa, aitaque poajeitaquea jaocarica pinintacaari. ²¹Ariorica pisavique areejiqui, eirorica pisaviquimotirotsi Irinanteari Avincatsarite Tasorentsi, aitaque poyeriri pisavicajeitapaaquenta pivacate iriorica povishate itasoncaventaquempiri. Aitaque poajeiteariri maaroni picoacaari, pimoncaratero nocantaquempiri. ²²Aisati iquempeta iriorica gacela aisati maniro, eiro pititaritsi, ocameetsati poajeiteari. Omavetaquea teerica pimoncaratero ameyevetari. ²³Iro cantaincha eiro catsini poajeitarotsi iriraja aisati eiro poacotarotsi ivatsa; tempa irotaque oaneajeitiriri iriori. ²⁴⁻²⁵Ocameetsati pojoquero quipatsiqui, eiro poajeitarotsi, pisavicantajeiteari cameetsa aisati iriori pitomipee. Tempa pimoncarataquero inecameetsatiri Tasorentsi. ²⁶⁻²⁷Irointiquea paitapeerica pinashitacayeari pimperi jeri pincashiacayeriri, paanaqueri anta Irinanteariqui Avincatsarite Tasorentsi; aitaque pintayeneriri. Ora iriraja pisaitantearo altar, irointiquea ivatsa ocameetsati poajeitearo.

²⁸“Pinquemasanojeitavaque, pimoncaratero maaroni nocantaquempiri, pisavicanteari cameetsa aisati iriori pitomipee pincanteani. Tempa pimoncarataquero inecameetsatiri Tasorentsisanori Pitasorentsite.

Icantasanotiri eiro ijitasorentsitashiyetatsi.

²⁹⁻³⁰“Ariorica irimatacaajeitaquempiri Avincatsarite Tasorentsi savicajeitatsiri nampitsipeequi, pintsoncajeitaqueririca, aisati pisavicantajeitajearorica lipatsitepee; queariompiyeya piquempetacojeitapaaricari pijatashitiricari ijitasorentsiyetiri, picoashireanaquecari pimpincatsateri. ³¹Eiro pantimojeitiritsi Avincatsarite Tasorentsi caari inecameetsati, eiro yamavetacotimpirotsi.

Tempa irotaque yantayetiri savicajeitatsiri nampitsipeequi. Ariorica ipincatsatapinitiri ijitasorensiniroyetiri, ¡yoiniri itomipee itainiri!

³²“Irointiquea pimatapinijeitero maaroni nocamantaquempiri. Eiro catsini pisanquenatajitsi pashini, aisati eiro piveayetajirotsi.

13 ¹“Intimerica picarajeitiri conijatashitanainchane incamantantero paitarica, iriorica mishiveetashiyetachari, incamantempirorica avisayetatsineri caari pineapiniti, ²ariorica omoncarataquea incamantempiri, irosati incantantempi: ‘¡Tsame ampatotimentajeiteari pashini tasorensiyetatsiri caari piojeiti ampincatsajeiteri!’

³¡Eiro piquemisantiritsi! Tempa icoaque Avincatsarite Tasorensi irineantajeitempi queariorica pinintasanoteri aisati pishiretasanoteari.

⁴Ocameetsati pinquearioventasanotero pimpincatsateri Tasorensi apaniro; pimoncarajeitero icantacantiri. Pinquemisantero irineane aisati pampatotimentajeiteari. Pincanteani quiso poanaqueri. ⁵Irintiquea camantantashiyetachari iriorica mishiveetashiyetachari, ocameetsati poacanteri. Tempa icoacaajeitaquempi pimpiatsateari Avincatsarite Tasorensi oipacaacoventajimpiri iperanayeevetantaquempiniri Egiptoqui. Aisati icoacaquempi pimpeacojeitearo icoacaavetaquempiri Pitasorensite pimoncarajeiteri. Ocameetsati poyeri. Eiroquea ishequiantanacatsi antacaayetempirone caari cameetsatsi.

⁶⁻⁷“Iriorica pirenti, pitomi, pishinto, pijina jeri pitsipatapinivetari, ariorica irimanacayempi pincarajeitantariri pimpincatsateri ijitasorensiyeetiri caari pioyetini aisati caari ioti intacantajeitaqueerini, ijitasorensitashiyetari savicayetatsiri quempeji aisati pashinisatipee areejipeequiniri quipatsi; ⁸eiro piquemisantirotsi incoacaavetempiri, aisati eiro pipincatsatiritsi. Eiro catsini picavintsairitsi iriori; eiro pintacoshirearitsi aisati eiro pimanacotiritsi. ⁹⁻¹⁰Ontimatiye poyeri. Avirotaque intearine pimpicheeri, impojiquea impichanajeiteri pishanincepee irosati incamantaquea. Tempa icoacaajeivetaquempi pimpeacotearime Atasorensite oimishitoajeitajimpiri iperanajeitanteevetaquempiniri Egiptoqui. ¹¹Impojiquea iriojeitanaque ashanincepee, irotaque intsaroajeitantaqueari, eiroquea yantapinijeitantarotsi caari cameetsatsi.

¹²⁻¹³“Ariorica pisavicayetapee nampitsipeequi impempiri Avincatsarite Tasorensi, pinquemacotaqueririca nijantaca piatsatariri Tasorensi, ipincatsatacaashiyetacari ashanincepee ijitasorensitashiyetari caari pioti; ¹⁴Ontimatiye pamenasanotero piquemaqueri. Queariotasanotaquerica ora yantimotasanotaquempiri caari pineacameetsatacotiri, ¹⁵irosati pijatashijeitantaqueari savicajeitatsiri nampitsiqui, poajeiteri. Pintsonquitajeitanaqueri ivirapee aisati timimoyetiriri. ¹⁶Impoji paajeitero irovararopeeni, pimpiojeitero nianqui nampitsi, irosati pintaantajeitaquearo, ontsoncantanaqueari. Pinquempetacantero pivira pitaasanopinitiniriri

Tasorentsisanori Pitasorentsite. Pintsoncasanotanaquea nampitsi, omporocayetanaque, tecatsi catsini matajeroni irovetsiqueetajero.

¹⁷“Eiro catsini paayetavaquetsi. Pintsoncasanojeitero pintayero, eiroquea iquisajeitantiempitsi Tasorentsi; irointi irineshinoncajeitempi aisati iroshequiacaasanojeitempi, tempa irotaque icantasantaqueriri intacantajeitaqueerini, ¹⁸ariorica pincanteani pinquemisantasanoiteri Avincatsarite Tasorentsi, pimocarajeitero icantacantiri nocamantajimpiri aisati pantasanojeiteneri inecameetsatiri.

14 ¹“Avirojeitaque meeca itomintajari Tasorentsisanori Pitasorentsite. Eiro pitoyetatsi pivatsapeequi aisati eiro pameeyetirotsi piishi ariorica pincamaarantayete. ²Tempa avirojeitaque ishanincatacari Tasorentsi, inashitacaajeitaquempi. Iriotaque coyeaquempiri panaacojeitaqueri nampitsipeequiniri. Yashijeitaquempi ishanincatasanojeitaquempi.

Poshiniripee yoyeetari aisati caari yoyeeta.

(Lev. 11.1-47)

³“Eiro catsini poayetaritsi caari yoyeeta.

⁴⁻⁵“Jeriquea poshiniripee poayeteari: vaca, ovisha, chiivo, maniro, gacelapee, gamo jeri cabra. ⁶Iriojeitaque poayeteari yocapee oipiyetirori yoari aisati apiteyetatsiri ishetaqui. ⁷Iro cantaincha eiro poayetaritsi quempeyevetariri, omavetaquea yoipiyavevataro yoari aisati apiteyeveta ishetaqui: cameyo, quiima jeri tejón. Iriotaque pimpincajeiteri; tempa yoipiyavevataro yoari, iro cantaincha te ontimeji apite ishetaqui.

⁸“Aisati iquemmeta shintori otimayeveta apite ishetaqui, iro cantaincha te iroimpiyero yoari. Iriotaque pimpincajeiteri; eiro poaritsi aisati eiro pantiritsi camatsiri.

⁹⁻¹⁰“Aisati iquemmeta shimayetatsiri timatsiri ishivanqui aisati ivenaqui, iriojeitaque poajeiteari. Irintiquea caari timayetatsi ivenaqui, timayevetachari ishivanqui iriojeitaque pimpinqueri.

¹¹⁻¹³“Ocameetsati poajeiteari vanquiyetachari. Iro cantaincha timatsi caari poayetea: anteari paquitsa, amempori, shimavaqui, milano, jeri pashiniyetatsiri paquitsa, ¹⁴⁻¹⁸coontipee, avestruz, pompori, gaviota, jeri shentiyetatsiri, mamaro, meiyonti, aavo, pelícano, tisoni, cormorán, aminto, abubilla jeri pijiri.

¹⁹“Aisati pinquempeteri shavetapee, iriojeitaque pimpinqueri; eiro poayetaritsi. ²⁰Irintiquea poshiniripee vanquiyetachari yoyeetari, iriotaque poajeiteari.

²¹“Eiro poayetaritsi camashiyetachari; tempa avirojeitaque ishanincatajari Avincatsarite Tasorentsi, inashitacaajeitaquempi. Irintiquea saviquimotimpiri, iriotaque pimperi iroyeari, aisati pimperi avisayetatsiri.

“Aisati eiro picotantaritsi chiivojaniqui otsomija iriniro.

Iotacaasanotiri icanteetiri ‘diezmo’

²²⁻²³“Ariorica paviiyetero pivanquire osarentsipeequi, eiro pipeacotarotsi pinashitacayetea aparotatsiri: tirico, ovaja jero oreji orivo, aisati jivayetatsiri itimi irijani pivacate jeri povishate. Iriotaque poimojeiteariri Avincatsarite Tasorentsi anta Irinanteariqui incoyeeri. Irotaque piojeitanteari pimpincatsatasanoteri.

²⁴⁻²⁵Intasoncacoventempirorica pivanquire, iro cantaincha pisaviquirica areejiqui opomerentsitaca paantanaquearori anta, ocameetsati pimpimantero. Yora quireequi iriotaque paanaqueri Irinanteariqui Tasorentsi. ²⁶Iriotaque pamanantapempari picoacayetari: iriorica vaca, ovisha, ovaja jero pirayeteri cachojayetatsiri, aisati paitapeerica coiteimotaquempiri. Irosati poimotantaqueari Avincatsarite Tasorentsi, pincarajeiteri pishanincasanoripee.

²⁷“Eiro catsini pipeacojeitaritsi ishanincapeeni Leví picaratiri pinampiqui. Piotiri iriori, te ontime iipatsite piquempejeitaca avinti.

²⁸“Ariorica omoncaratapinitea mava osarentsi, ocameetsati pinashitacayetea diezmo pipanquiyetiri, pinquempoyeero pinampipeequi. ²⁹Irotaque irapinijeiteri ishanincapeeni Leví aisati saviquimoyetimpiri, camayetatsiri iriri, jero camajimentaaroopee, iroasanotanteari iriori. Irotaque intasoncacoventasanojeitantempiri Avincatsarite Tasorentsi paitapeerica pantayeteri.

Osarentsi ipeacotavacantarori caari pinatavacaacha.

15 ¹“Ariorica omoncaratapinitea 7 osarentsi, aitaque pimpeacoyeteaririri yora caari pinatimpi. ²Jeroca ocantacotari: Maaroni payetiriri ishaninca timimotiriri, ocameetsati impeacotajeri, eiro ishintsinatajiritsi impinatantajeariri. Tempa moncaratapaaja osarentsi icantaqueri Tasorentsi. ³Irintiquea pashinisatipee, ocameetsati pishintsinateri impinatantajempiri. Irompa iriorica pishaninca, ocameetsati pimpeacotajejanari ⁴eiroquea intimantatsi tsoncacoyetachane picarajeitiri. Irotaque intasoncacoventantempiri Atasorentsite anta quipatsiqui impempiri pisavicantajeitapaajeari. ⁵Pincanteani pinquemisantsanoteri aisati pimatapinitero maaroni icantacantiri nocamantajimpiri. ⁶Aitaque intasoncacoventasanojeitaquempi Atasorentsite, irimatasanotempiro icantitaquempiri.

Ontimimotasanoyetempi paitapeerica, pimpantayeteariri savicatsiri pashinipeequi nampitsi. Eiroquea avinti picoacotantayetitsi.

Panaacojeiteri maaroni savicayetatsiri, irintiquea eiro yanaacotimpitsi.

⁷⁻⁸“Jaocarica pisavicayetapeeri, intimerica pishaninca coiteaveeyetatsine, ocameetsati pincoashirete pimpayeteri paitapeerica icoiri; eiro piquempetaritsi caari cavintsantatsi. ⁹Eiro picantashiretitsi, ‘Irotaintsi omoncaratea 7 osarentsi

apecotavacaajeitantarori, eiro nopiritsi.' Eiorica pipiritsi coacoyevetempineri, aitaque incantacoventaquempi Tasorentsiqui, incantantempiri: 'Timatsi pantane.' ¹⁰Pincanteani pamitacotapiniteri, eiro piquenqueshireacotirotsi pimperiri. Ari intasoncaoventajeitajempio Atasorentsite paitarica pantayeteri. ¹¹Incanteani intimayete coiteaveeyetatsine pinampiqui. Irotaque nocantantimpiri, ocameetsati pineshinoncateri tsoncacoyetachari picarajeitiri.

Jaoca incanteriri iveranaropee.

(Éxo. 21.1-11)

¹²"Ariorica irameetempiri pishaninca pimperananteariri, iriorica shirampari, teerica, tsinane, oncarate 6 osarentsi pantaveetacayeri. Iro caratapaatsine 7, irosati pishinetantajeari irijataje. ¹³⁻¹⁴Aisati eiro ijatashitanajatsi, ocameetsati pimpayetavajeri ovisha, tirico jero ovaja. Tempa iriojeitaque itasoncaventaquempiri Atasorentsite. ¹⁵Eiro pipeacojeitarotsi avirori iperanajeiyeevetaquempini Egiptoqui. Iro cantaincha yoipacaacoventajimpi Tasorentsi. Irotaque meeca nocamantasanotantajimpirori oca.

¹⁶"Irompa incantempirica 'Te nocoyeji nojataje' icoaquerica irisaviquimotempi; tempa inintaquempi aisati ineaquempi oshequi paacameetsatiri; ¹⁷irosati paantaquearo punzón, impoji poatiaqueri pashitacoroqui, irosati pisataayempitantaqueari, pinampitasantanteariri. Aisati pinquempetero tsinane. ¹⁸Eiroyea ocantimonentimpitsi ariorica pishinetajeri irijataje, aitaquenea pantaveetacaaqueri 6 osarentsi. Tempa pipinataqueri cashetani piquempetacantaqueri pipinatiri coatsiri irantaveete. Aitaque intasoncaoventajempi Atasorentsite paitapeerica pantayeteri.

Irinashitacaayeteari ivirapee jivayetatsiri itimi.

¹⁹"Maaroni irijani pivacate, iriorica povishate jivatatsiri itimi, ocameetsati pinashitacayeanari Atasorentsite. Eiro pantaveetacairitsi vaca, aisati eiro pameetiritsi ovisha. ²⁰Aparopeeni osarentsipeequi poimojeiteari Atasorentsite anta Irinanteariqui, pincarajeiteri pishanincasanori. ²¹Irompa iriorica amashiyetachari: mayencaari, maviteajari jaocapeerica icanta, eiro poiniritsi Tasorentsi. ²²Ocameetsati poyeari jaocarica pisavicayetapeeri, eiro pititaritsi, omavetaquea teerica pimoncaratero amejeitari. Pinquempetacanteri poari ivatsa gacela iriorica maniro. ²³Irointiquea iriraja eiro catsini poarotsi, ocameetsati pojoquero quipatsiqui.

Intarori iquimoshiretantari.

(Éxo. 23.14-17; aisati 34.18-24)

16 ¹"Ariorica irimoncaratapaajea cashiri Abib, aitaque pimoncaratapinijeiterori pinquimoshireventajeitero yavisantaniri inampire Tasorentsi. Irotaque pimpincatsatapinijeitantariri Avincatsarite

Tasorentsi; tempa iriotaque cashiri yoimishitoajeitanta jeeri tsiteniriqui asavicantajeivetaniri Egiptoqui.

²“Aitaque paapiniyeteneriri Tasorentsi Irinanteariqui iriorica pivacate aisati povishate, poyeneriri.

³“Aitaque poapinijeitariri. Pisomatantapiniteari tanta caari tapiacha oncarate 7 quitaiteri. Irotaque quenqueshiretacayempirone yoashinoncaaj eitanteevetaquempiniri Egiptoqui. Pincanteani pinquenqueshiretapinitero quitaiteriqui ashintsitantacari ashitoajeitanaji. ⁴Ora caratatsine 7 quitaiteri, eiro catsini otimayetitsi tapiacaarori tanta maaroni ivancopeequi ashaninca. Aisati ivatsapee, eiro poanontayetavajatsi poantamanajeariri. ⁵⁻⁶Ariorica pinquimoshireventajeitero yavisantaniri, eiro poayetiritsi pivira jaocapeerica pisavicayeteri impempiri Avincatsarite Tasorentsi, ainti paapiniteri anta incoyeasanoterinta Irinanteari. Poanteariri ariorica irishaavijiiteanaje catsirincaiteri, pimincaratajero ashitoajeitantanajari Egiptoqui. ⁷Irosati pintashitantaquearo ivatsa, aisati aitaque poajeitariri. Ariorica onquitaiteamanaje, irosati pijajeitantanajea pisavicayetapaaquenta. ⁸Oncarate 6 quitaiteri poajeitero tanta caari tapiacha. Iro caratapaatsine 7, irotaque pampatojeitanteari pinquimoshireventeri Atasorentsite. Tecatsi catsini antaveeyetatsine.

Apitetatsiri iquimoshiretantari.

⁹⁻¹⁰“Ariorica avisanaque 7 tomincopee ora pintaantacarori paviijetiro pivanquire, aitaque pinquimoshireventajerori. Pamayetajeneri Avincatsarite Tasorentsi picoacayeteri pimpincatsatanteariri. Tempa iriotaque tasoncacoventaquempirori.

¹¹Irosati pinquimoshireventantaquearo anta Irinanteariqui. Pincaratero pijinapee, pitomipee, piveranaropee, ishanincapeeni Leví, pashinisati saviquimoyetimpiri, camatsiri iriri jero camajimentaaro.

¹²Pinquenqueshirejeitajero iperanayeevetaquempini Egiptoqui. Irotaque ocameetsatantari pimajeitero maaroni icantacantiri.

Yovecarantarori iquimoshiretantari.

¹³“Ariorica pintsoncayetaquero paviiyetiro tirico, aisati picamitsoajayetiro ova, irosati pinquimoshireventantajeiro povetsicantayetacarori pivancoshetajaniquipee oncarate 7 quitaiteri.

¹⁴Ocameetsati pinquimoshirejeite; pincaratero pijina, pitomipee, piveranaropee, jeri ishanincapeeni Leví, aisati saviquimoyetimpiri, camayetatsiri iriri jero camajimentaaro. ¹⁵Oncarate 7 quitaiteri pinquimoshirejeite, pimpincatsatanteariri Avincatsarite Tasorentsi anta Irinanteariqui. Irotaque intasoncacoventantempirori pivanquirepee

aisati paitapeerica pantayeteri. Tecatsi coiteimojeitempine, cameetsa pisavicajeite pinquimoshirejeitanteari.

¹⁶⁻¹⁷“Maaroni shiramparipee oncarate mava irijatapinite anta Irinanteariqui Atasorentsiste osarentsipeequi. Jero inquimoshireventapiniteri: yoapinijeitantarori tanta caari tapiacha 7 tomincopee, jero yovetsicantayetarori ivancoshetajaniqupee. Tecatsi jatashiyetachane, ocameetsati iraaayetanaque aparopeeni iriori ocarati itasoncacoventayetaqueriri Avincatsarite Tasorentsi.

Incantacoventante cameetsa cantacoventantayetatsiri.

¹⁸“Ocameetsati pincoye cantacoventantatsineri jeri amitacoyeterine. Iriotaque vetsicayetenerine ashaninca anta nampitsipeequi impempiri Tasorentsisanori Pitasorentsiste, paitapeerica irantaque. Ocameetsati incantacoventantasanote cameetsa. ¹⁹Te oncameetsate poashiniyero queariotasanotatsiri piquenqueshiretiri, aisati eiro pinashitacaaritsi itsipa. Aisati eiro picoitsi impeetempi quirequi poashinoncaacantanteariri pishaninca. Ariorica pincoashiyetanaquearo oca, eiro picantacoventantanajitsi cameetsa, aisati eiro piquemisantanajiritsi neanavetachari cameetsa. ²⁰Apatiro pinquenqueshiretasanojeitanaquero queariotasanotatsiri, pimajeitanteari pisavicajeite cameetsa anta quipatsiqui impempiri Tasorentsisanori Pitasorentsiste.

²¹“Eiro catsini pipanquiyeti inchato pimpincatsatanteariri povetsicashiyeteari, aisati eiro poimotirotsi altar pipincatsatantariri Tasorentsisanori Pitasorentsiste. ²²Aisati eiro poveviricaayetitsi mapipee, piquempetaricari pincatsatiriri ijitasorentsitashiyeetari, irotaque ipinquiri Tasorentsisanori Pitasorentsiste.

17 ¹“Eiro pitainiritsi Avincatsarite Tasorentsi amashiyetachari vaca, iriorica ovisha jaocarica icantayetari. Irotaque ipinquiri.

²“Jaocarica pinampiyetapemparori impempiri, irineetaqueririca ashaninca iroorica tsinane irantaquero caari icoacaimpi Avincatsarite Tasorentsi, impiatsataquearo Icantacantiri, ³impincatsatashiyetaquearirica ijitasorentsiyeetiri intiyeroashitaqueari, iriorica catsirincaiteri, cashiri, impoquiropee, caari icoacaavetari Tasorentsi, ⁴⁻⁵ariorica pinquemacotaqueri; ocameetsati pamenasanotero queariotasanotaquerica. Irosati paantanaqueari papatotapinijeitanta pincantacoventanteariri impichaanayeeteri, irosati incamantaquea.

⁶“Incaraterica apite camantacoterine, ariorica mava, aitaque poacantaqueri. Irompa aparorica, eiro poacantiritsi. ⁷Yora camantacoterine, iriotaque jivaterine impicheeri. Impojiquea impichaanajeiteri maaroni ashanincapee, eiroquea ishequiantanacatsi antirori caari cameetsatatsi.

⁸“Ariorica ontimimotaquempi pomerentsitasanotachari, iroorica oantantsi, antavacantsi, tsecavacantsi aisati paitapeerica avisayetatsine

pinampiqui, teerica pimatero pincantacoventante; ocameetsati pijate anta Inantariqui icoyeaqueri Avincatsarite Tasorentsi. ⁹Pinquenquetsatacaapeeri antaveetatsiri ishanincapeeni Leví jeri pashinipee cantacoventantayetatsiri, jaanicarica pineapaaqueri, iriotaque pincamantapeeri oca avisayetaintsiri. Impoijiquea incamantayetempiro jaoca pincanteri pincantacoventantayeteariri antayetaquerori ocapee. ¹⁰⁻¹¹Impoijiquea pimoncaratasantapeero maaroni yoametavaquempiri, eiro catsini poashiniapairotsi. ¹²Jaanicarica cantashiveetapaachane, eirorica iquemisantirotsi icantavetari antaveetiniriri Tasorentsi, iriorica cantacoventantatsiri, ocameetsati poacanteri. Eiroquea ishequiantatsi antayeterone caari cameetsatsi. ¹³Ariorica inquemacojeitaqueri pishaninca, irotaque intsaroajeitantaqueari, eiroquea ipiatsajeitantatsi iriori.

Iotacaasanotiri pincatsariyetatsine.

¹⁴“Ariorica parejeitaquearo quipatsi impempiri Avincatsarite Tasorentsi, pimanatacoventaquerorica pisavicantajeiteari, ariorica pincantajeite: ‘Acoajeiti intime pincatsariventajeiteeneri, anquempetanteariri savicayetatsiri nampitsipeequi itimayeti pincatsariventayetiriri,’ ¹⁵ocameetsati pincoye pishanincasanori yora irinintacaaqueri Avincatsarite Tasorentsi. Te oncameetsateji pincoye pashinisati. ¹⁶Yora pincatsariventempine te oncameetsateji irishequiacantayeteri cavaayopee, aisati eiro itiancayetitsi atiri anta Ejiptoqui iramantayeteari cavaayo irimanatacayeari. Tempa icantasanotaquempi Tasorentsi: ‘Eiro catsini pipiajeitanajarotsi Egiptoqui.’ ¹⁷Aisati te oncameetsate iraye oshequi ijina, opeacotacairicari ipincatsatiri Tasorentsi. Aisati eiro yoshequiiritsi oro jeri plata.

¹⁸“Ariorica irintanaquearo impincatsariventempi, ocameetsati irisanquenatacotacantero oca nocamantaquempiri, iquempoyeacotaqueri antaveetatsiri ishanincapeeni Leví. ¹⁹Incanteani quiso iroyero. Irotaque irineanatapiniteri quitaiteripeequi, irimatantearori impincatsatapiniteri Avincatsarite Tasorentsi aisati irimatapinitero maaroni icantacantiri. ²⁰Eiroquea ishemeventantaro, irijitacantea yanaacotaqueri ishanincapee. Aisati eiro ipeacotarotsi oca icantacantiri Tasorentsi. Irotaque intasoncacoventanteariri cameetsa, impincatsariventempi osamani, aisati inquempetajea irishanincajeitajeari iriori.

Otimantari yoajeitari antaveetatsiri.

18 ¹⁻²“Yora ishanincapeeni Leví antaveetatsiri, eiro otimayetitsi iipatsite. Eiro iquempejeitimpitsi avinti ontimayete. Irotaque iraarantavaqueri pamapiniteriri Tasorentsi. Irio tasoncacoventerine irapinitanteari; tempa irotaque icantasanotaqueri.

³“Jero irayeteri antaveeyetatsiri, iramayeteri pishaninca iroyeneriri Tasorensi iriorica vaca jeri ovisha iraanontavaqueari imititsa, inoma jero imonqui, ⁴aisati jivatatsiri oitsoquiyeti: tirico, ovaja, oreji orivo jero ivitipee ovisha iroaquera yameetiri. ⁵Tempa iriojeitaque inashitacaacari Avincatsarite Tasorensi aisati ishanincasanoripee incantaitatiyempani irantaveetapinite impincatsatapinitanteariri.

⁶⁻⁷“Ariorica irisavicayetapee ashaninca jaocapeerica, incarataqueririca aparoni ishanincani Leví icoapaajirica impocaje Irinanteariqui Atasorensite, ocameetsati irantaveetaje incaratapaajeri antaveetiniriri Tasorensi. ⁸Aisati irapaje iroanaro yaapinitiri ishanincapee, jero ipeeyetiriri iririni.

Icantasanotiri eiro yantantarotsi yantayetiri pashinisati atiri.

⁹“Ariorica preejeitaquearo quipatsi impajeitempiri Avincatsarite Tasorensi, eiro pantayetapairotsi yamejeitari savicajeitatsiri nampitsipeequi, piquempejeitaricari. ¹⁰Aca picarajeitica, tecatsi aayeterine itomi intaanteariri, aisati eiro pantayetirotsi iotashinirotantarori paitapeerica. Eiro picantashiyetatsi timatsi avisayetatsine coajica; eiro pisheripiariyetitsi. ¹¹Aisati eiro povetsicayetitsi piotashiyetanteari. Eiro paventayetaritsi iotashiniroyevetachari jeri quenquetsatacaashiyetariri shiretsiyetatsiri, aisati camayetatsiri. ¹²Oshequi ipinqui Avincatsarite Tasorensi antayeterone ocapee. Irotaque irishinejeitantempiri pintsoncajeiteri savicayetatsiri nampitsipeequi. Te oncameetsateji catsini yantajeitiri. ¹³Ocameetsati irointi pincameetsashirejeitanaque, pinquemisantasanteri Tasorensi. ¹⁴Yora savicayetatsiri nampitsipeequi pisavicayetapenta, iquemisantayetiri iotashiyetarori avisayetatsineri coajica jeri ionirodashiyetachari. Iro cantaincha yora Atasorensite te irishinetemproji pantajeitero ocapee.

Impoque camantantatsineri quempetajearine Moiseshi.

¹⁵“Coajica intianque Avincatsarite Tasorensi camantantatsiri quempetajenane, ocameetsati pinquemisantajeitavaqueri. ¹⁶Tempa irotaque picoacotaqueriri anta toncaariqui Horeb, apatojeitantacari. Picantantacari: ‘Te noncoajeitaje nonquemajeri irineanataje Avincatsarite Tasorensi, aisati te noncoaje noneajeitajero amorecatsantsaatatsiri paamari, nocamajeiticari.’ ¹⁷Irosati icantantaquena Tasorensi: ‘Cameetsataque icantajeitaqueri. ¹⁸Coajica nontianqueneri camantantatsine quempetajempine. Iriotaque pishanincasanori camantayetajempirone paitarica noncanteriri, irotaque iroaajempiri. ¹⁹Maaroni caari quemisanterone incamatacoyevetenari, aitaque noncantimentaqueri coajica.

²⁰Irintiquea cantashitachari: Noquenquetsatacotiri Tasorentsi, incantashiyetapaaquea caari nocantayeveta, inquenquetsatacotash iyetapemparirica ijitasorentsitashiyetari, ocameetsati poacanteri.’
²¹Ariorica pincantajeite: ‘¿Jaoca ancantajeiteari ayotanteari irotaquerica irineane Tasorentsi icantaqueeri, irompa caaririca?’ Ocameetsati pinquenqueshirejaitavaquero oca. ²²Ariorica incamantayetempiro icantiri, teorica omoncaratea, aitaque piotanaquerori te irio canterine Tasorentsi. Irisati coashitacha incantashiyetea, icoaque impincatsanteeteariri. Iro cantaincha eiro pitsaroacaashitaritsi.

Irinashitacaayeteari nampitsipee iraventeari.

(Núm. 35.9-28; aisati Jos. 20.1-9)

19 ¹⁻²“Ariorica irimatacaajeitaquempi Avincatsarite Tasorentsi pintsoncajeitantariri savicayetatsiri nampitsipeequi, paajeitaquerorica iipatsitepee aisati ivancopee, ocameetsati pinashitacayea mava nampitsipee. ³Aisati poameetsatacantayetero avotsi jatantachaneri anta nampitsiqui. Aisati pinashitacayetaquea mavatatsiri ora quipatsi impashitempi Avincatsarite Tasorentsi. ⁴Aitaque irijayeteri oantatsiri eiroquea yoanteetaritsi iriori, teorica intsataantavetea, aisati teorica inquisanentaveteari. ⁵Oquempetaca: Intimerica caraterine ishaninca inchaquite itsima, ariorica ontsopaanaquea ishachane ontsecapaaqueririca incamaque, yora tsecantacariri aitaque irishianaqueri eiro yoanteetajaritsi iriori. ⁶Irompa ariorica intime ishaninca quempeji irineapaaqueririca camaque, incoaquerica impiacoventajeari, irosati iroiJanatantanaqueari. Areejitsiquerarica nampitsi, ariorica irareetavajeari irosati iroantavajeari. Iro cantaincha te oncameetsaveteaji iroyerime; tempa te inquisanentapinivetearini. ⁷⁻⁸Irotaque nocantantimpiri, ocameetsati pinashitacayea mava nampitsipee. Ariorica irantearoiteacaasanotaquempiro Avincatsarite Tasorentsi piipatsite, irimoncarataquero icantasanotaqueriri intacantajeitaqueerini, ⁹ariorica pinintasanoteri, pincanteani pimatapinitero maaroni icantacantiri nocamantajimpiri, pinquemisantsanoteri; irosati pinashitacantajea aisati mava nampitsipee. ¹⁰Tecatsiquea oncantea iroyeeteri caari tsatantavetacha iroante pinampiyetapemparonta impempiri Avincatsarite Tasorentsi, eiroquea icantimentanteetimpiritsi camayetatsine.

¹¹⁻¹²“Irompa iriorica quisanentiriri ishaninca irineaqueririca apaniro, irosati iroantaqueari, irishiavetanaquearica anta pinashitacaayetacari nampitsi, yora jivatacantatsiri inampiqui ocameetsati intianque aajerine. Ariorica iramajeri, irosati impantaqueari ishanincasanori camaintsiri iroantajeariri iriori. ¹³Eiro pintacotaritsi oantatsiri, eiroquea picarajeitantaritsi, pintimantajeiteari cameetsa.

¹⁴“Anta pinampiyetapemparonta impempiri Avincatsarite Tasorentsi, ocameetsati pimpincatsatavacayea jaocarica intsapiyetaquerori iipatsitepee pishaninca. Te oncameetsate poaitayeteri yoatiashiyetirori paitanteariri capichaji.

Jaoca incanteriri tseeyacotantashiyetachari.

¹⁵“Eiro imatiro iroashinoncaacanteri aparoni cantacotashitearine ishaninca yoantaque, aisati paitarica irantaque. Irompa incarataquerica apite ariorica mava cantacoterine, aitaque irimatacantaqueri.

¹⁶⁻¹⁷“Triorica tsimantachari cantacoventashitearine pashini: ‘Yoantaque yoca,’ ocameetsati paanaqueri apiiteroqueti anta Ivancoqui Tasorentsi, itiminta antaveetatsiri jeri cantacoventantayetsiri. ¹⁸⁻¹⁹Impoiijuea yora cantacoventantatsiri irisampitasanoteri queariotaquerica, irompa itseeyacotashitaririca, irisati quemaatsicatajearone icoacaavetacariri itsipa incantacanterime, eiroquea ishequiantanacatsi tsimantachane picaratiri. ²⁰Ariorica inquemacojeitaqueri pishanincapee, irotaque intsaroajeitantaqueari, eiroquea itsimaantashiyetatsi iriori.

²¹Eiro catsini pintacotaritsi: ocameetsati impiacoventavacayea, iroanERICA itsipa, iroyeetajerita iriori; inquitsoreajaquitanterica itsipa, inquitsoreajaquiyeeetajerita iriori; irajireiteririca iraji itsipa, irajireiteetajeri iriori; imosanterica itsipa, imosheetajerita iriori; incarajiteririca iiti itsipa, incarajiteetajeri iriori.

Yoametiriri manajeitachari.

20 ¹“Ariorica pijajeite pimanateri quisajeitimpiri, pinquemacojeiteririca oshequi iyavaayote jero ishiacomentopee imanatacaajeitari, aisati yoshequitasanotaque manajeitachari carajeitiriri, yanaacojeitaquempi avinti; eiro pitsaroacaajeitaritsi. Pinquenqueshiretasanotea tempa quiso yoaquempi Avincatsarite Tasorentsi oimishitoajeitajeeri asavicantajeivetacaniri Egiptoqui. ²⁻³Irotaintsirica pijate pimanajeitea, yora antaveetatsineri Tasorentsi ocameetsati incantavaqueri manajeitachaneri: ‘Pinquemajeite noshaninca, ariorica pijajeitaque pimanatea, eiroyea pitsaroajeititsi, aisati eiro picantashirejeititsi. ⁴Tempa timatsi Avincatsarite Tasorentsi quisacoventajeitempine, pimajeitanteariri panaacojeiteri.’

⁵“Impoiiji incante iriori jivatacantatsiri: ‘Jaanicarica vetsicayetatsiri iroaquera ivanco, tequerarica intimantearo, eiro ijatitsi; yojocashitanacarocari iroyeetaqueririca, yaitajiricari itsipa. ⁶Aisati jaanicarica panquitatsine iroaquera irovamashite, tequerarica iraayeteroji iroantearori, eiro ijatitsi; yojocashitanacarocari iroyeetaqueririca, yaviititajiricari itsipa. ⁷Timatsirica aisati cashiayetarori tsinane iraantearori, eiro ijatitsi; yojocashitanacarocari iroyeetaqueririca, yaitajiricari itsipa icashiavetari.’

⁸“Impoiji incantasanojeiteri manajeitachane: ‘¿Timatsimpa tsaroashireyetaintsiri caari neaperoyetacha? Itsaroashiretaquerica, eiro ijatitsi; yoimintsaroajeitiricari iriori acarajeitiri.’ ⁹Ariorica intsoncajeitaquero incamantajeiteri, irosati irijivatantanaquea jivatacaayetiriri manajeitachaneri.

¹⁰“Ariorica pareejeitearo nampitsi, ocameetsati pijivate pincantapeeri savicajeitatsiri: ‘Tsame aacameetsatavacaajeitea.’ ¹¹Ariorica incoaque irosati irishinejeitantaquempi pinqueajeitanaque maaroni, impoiji imperanajeitempi irishintsinajeitempi. ¹²Irompa teerica incoajeite iraacameetsajeitempi, irointi incoajeitaque iromanatempi, irosati pishoncajeitantaquearo inampi; impoiji pimanajeiteri. ¹³Irio Avincatsarite Tasorensi matacaajeitempine pintsoncantajeiteariri savicajeitatsiri. ¹⁴Irointiquea tsinanepée, jananequipee, ivirapee aisati paitapeerica timayetatsiri, iriotaque pashijeitajeari. Tempa irio Avincatsarite Tasorensi coacaquempirori paitantayeteariri. ¹⁵Aisati pinquempeyetaquero otsipapee nampitsi timayetatsiri areejiqui, caari quempejitaro nampitsipee pisavicajeitapenta. ¹⁶⁻¹⁷Irintiquea savicajeitatsiri nampitsiqui, impempiri Tasorensisanori Pitasorensite pisavicanajeitapaaajeari; eiro pishinetiritsi aparó iravisacotaje. Pintsoncasanojeiteri hititapee, amorreopee, canaaneopee, ferezeopee, heveopee, jeri jebuseopee. Pinquempetacanteri, poapinitiniri Tasorensi; tempa irotaque icoacaquempiri; ¹⁸eiroquea yoamejeitantimpirotsi yantanirojeitiri iriori. Ipincatsatashiyetari ijitasorensiniroyetiri, pantimotiricari caari ineacameetsati Tasorensisanori Pitasorensite.

¹⁹“Ariorica pijatashitero nampitsi pimanatanteariri savicajeitatsiri, osamani pishoncajetaquero, eiro pichaquiyetapairotsi ivanquirepee. Tempa irotaque pantsoyetapeeri oitsoqui. Caari oni atiri omanatantempiri, irointi inchatopee. ²⁰Irointiquea pinchaquiyetapee caari yatsoyeeti oitsoqui. Irotaque paayetapeeri pataimentopee, pimatantearori pimanajeiteri manajeivetempine, irosati panaacojeitantaqueari.

Jaoca incanteriri camayetatsiri caari iotacoti.

21 ¹“Ariorica pisavicanajeitapaaquearo quipatsi impempiri Avincatsarite Tasorensi, pineeririca atiri yoyeetiri jaocapeerica, teerica piote jaanica oaqueriri, ²yora jivatacantayetatsine jeri cantacoventantayetatsine, ocameetsati iramenero jaoca ocarati areejiti icamaque. Aisati irimoncaratero nampitsipee iquempejitacari. ³⁻⁴Yora jivatacantatsiri anta nampitsiqui iquempejitacari, ocameetsati iranaaque vacajaniqui caariquera yantaveetacayeeti, iroirincacaanaqueri nijateniqui teenta irantaveyeetero quipatsi, aitaque inquentsireeriri.

⁵“Irosati impocantaquea antaveejeitatsiri ishanincapeeni Leví; tempa iriotaque icoyeaqueri Atasorensite, antaveetenerine. Aisati

incantacoventempi Tasorentsiqui intasoncacoventajeitantempiri, iriotaque aisati vetsicayerone antavacaayetachane. ⁶Impoiji irijajeite jivatacantatsiri icamimotaqueri nijateniqui inquivacotimoteari iracoqui camaintsiri, vacajaniqui. ⁷Irosati incantajeitantaquea: ‘Te naro oyerine yora shirampari, aisati te niojeiteji jaanicarica oaqueriri. ⁸Notasorentsite, pimpeacojeitenaro; tempa narojeitaque pishanincatajari poavisaacojeitajana. Eiro picantimentanaritsi camashitainchari.’ Irosati impeacojeitantajempiro, eiro yoasanquetaimentimpiritsi. ⁹Ariorica pimajeitaquero ineacameetsatiri Tasorentsi, eiroquea otimantatsi pincantavacaimentashijeitari.

Jaoca incanterori tsinane imanatacoventayetiri.

¹⁰⁻¹¹“Ariorica pijatashiteri quisajeitempine pimanajeitantariri, irimatacaaquempirica Avincatsarite Tasorentsi panaacojeitantariri, ariorica paayetavaque tsinane, irineaquerorica pishaninca ocameetsavorotaque, iraaquero irijinantaquearo. ¹²Ocameetsati iranaquero ivancoqui, irameetapeero aisati intotitayetapeero oshetaquipee. ¹³Impoiji irisapoquitero oitsaare amaqueri, inquitsaatero otsipa irosati osavicantaquea ivancoqui. Oncanteani iraacoteari irini incarate aparo cashiri. Ariorica osamaniiteanaque, irosati iroonantaquearo irijinantasanotantearori aisati ojimentasanotanteariri. ¹⁴Irompa teerica incoapaajeroji, ocameetsati irishinetajero ojataje. Iro cantaincha te oncameetsateji impimantero iraanteari quireequi, aisati eiro ishiacantirotsi iperanayeetari. Tempa aitaque yonaavaquero.

Irashiyeteari itomi jivatatsiri itimi.

¹⁵⁻¹⁶“Ariorica iraye shirampari apite ijina, inintasanotiro otsipa, iro pashini te irininteroji. Iro cantaincha intimacaaquerorica apiiteroqueti, iriorica jivatatsine intime otomi ora caari ininti, omoncaratapaaquearica impantayeteariri timimoyetiriri itomipee, eiro imatirotsi inquempetacanteri jivatatsiri itimi yora otomi inintasanotiri; eiro inquenqueshireacotiritsi. ¹⁷Irintiquea otomi caari ininti; tempa iriotaque jivatasanotatsiri itimi, ocameetsati impasanoteri quimota yashiyetari; tempa iriotaque ijivatacantaqueri iriotaque ashitasanoyetarori maaroni.

Irineeri itomipee piatsayetchaneri.

¹⁸“Jaanicarica timatsine itomi piatsatincari aisati quishincari, caari quemisantatsi paitarica incantaveteariri iriri aisati iriniro, aisati ariorica inquenquejaaveteari, eiro iquemisantimatiritsi; ¹⁹⁻²⁰ocameetsati iranaqueri iriri icantacoventantapinitinta jivatacantayetatsineri incantapeeri: ‘Yoca notomi irinti piatsatincari aisati quishincari, te catsini inquemisantimatenaji paitarica nocantavetariri. Te incameetsateji, irinti

shinquitincari.’ ²¹ Irosati impichaaajeitantaqueari pishanincapee. Eiroquea pincarajeitantaritsi piatsatincari. Ariorica inquemacojeitaqueri pashinipee evancari, irotaque intsaraoajeitantaqueari.

Incanteeyeriri oantatsiri.

²²⁻²³ “Intimerica ashaninca oantatsiri, ocameetsati poyeri, impoji pintsateri inchatoqui, iro cantaincha te oncameetsate incantacoteani intsatempa tsiteniriqui, pintijiteari intsipaite. Tempa te irineacameetsateriji Tasorentsi itsayetiri inchatoqui. Eiroquea icariperotantarotsi quipatsi impempiri pisavicanteari.

Impeayevetearica timimoyetiriri.

22 ¹ “Intimerica neaquerine ivacate pishaninca, iriorica irovishate, te oncameetsate irineashititeari; ocameetsati iraanajeneri. ² Irompa teerica incarateriji ashitariri aisati te iroteriji, ocameetsati iraanakeri ivancoqui. Ariorica incoajeri ashitariri, impocashitajeririca, irosati impantavajeari. ³ Aisati pinquempyeteri aashino, iroorica quitsarentsi, aisati paitapeerica impeaquero pishaninca. Jaanicarica neaquerone, te oncameetsate irineashititeari.

⁴ “Aisati ariorica pineapeeri impariaque avotsiqui iraashinote pishaninca, iriorica ivacate, te oncameetsateji pineashiteari, ocameetsati poatianajeneri.

Caari ishinetiri irantashiyeteari.

⁵ “Ora tsinane, te oncameetsateji onquitsaatearo iitsaare shirampari. Aisati iriori shirampari, te oncameetsateji inquitsaatearo oitsaare tsinane. Jaanicarica quitsaayetearone, eiro inecameetsatacotiritsi Tasorentsi.

⁶ “Aisati jaanicarica quenaveeyetatsine irineitapaaqueririca imenco tsimeri inchatoqui, ariorica quipatsiqui, irijanitarica, iroorica iitsoqui, ariorica osaavatiro iriniro; eiro paanaquerotsi. ⁷ Pishinetero aranaje, irompa picoirica, paanakeri orijanipee. Irotaque intasoncacoventantempiri Tasorentsi pintimanteari osamani.

⁸ “Aisati ariorica irovetsicayete pishaninca iroaquerari ivanco, ocameetsati intantoyetero maaroni jenoqui. Eiroquea icanteetantaritsi jaanicarica pariantaquearone, incamaquerica.

⁹ “Eiro pipanquiyetitsi povamashitequi pashinisatopee oitsoqui, tecatsiquea oncantea incantayetempi: ‘Eiro poarotsi oshiocayetanaquerica ova jeri aisati pashinipee.’

¹⁰ “Ariorica pantaveetacayeri vaca, eiro pitsipatiritsi aashino.

¹¹ “Aisati eiro piquitsaatarotsi tijachari vititsi conoachari lino.

¹² “Ocameetsati poanaashiroquiyetavaquero overamaotapaaca pitsaare.

Irineeri aayevetearone evancaro aisati antashiyetarori.

¹³⁻¹⁴ “Ariorica iraaavetearo shirampari tsinane ironaavetaquearorica, impoji irimanintanajero, incantacotashiyetanaquearo: ‘Naashitacaro

tsinane aisati noonaavetacaro, noneaquero te onquempetearo evancaro caariquera ineavintsayeeta.’¹⁵ Impoiji iri aisati iniro iranaaquero irishinto aisati oshitamashiro icantacoventantapinitinta jivatacantayetatsiri, iriotacotentearori queariorica te onquempetanajeero evancaro.

¹⁶⁻¹⁷Incantapeeri: ‘Yoca shirampari nopacaavetacari nishintio, iro cantaincha imanintanajiro; icantacoyetaquero te onquempetanajeero evancaro.

Jero meeca oca oshitamashiro, piotantearori teerica onquempetanajeero evancaro.’ Irosati irampinaicareimotantaqueari isavicajeitaquenta jivatacantayetatsiri, irineantearori iraja. ¹⁸⁻¹⁹Irosati iroisotacantantaqueari, impasanayeetantearori. Aisati impinatajeri iri 100 imentaqui quireequi, ovinaro icantacotashiyetacaro. Impoiji iracaasanotajeri, eiro yojocajirotsi.

²⁰⁻²¹“Irompa queariotaquerica te onquempetanajeero evancaro, irosati iraantanaqueero iroatiapeero irashitacoroqui iri. Impoiji impichaajeitero savicajeitatsiri nampitsiqui. Tempa oshequi antayetaquero caari cameetsatatsi anta ivancoqui iri, te ompincatsateriji. Eiroquea otimimojeitantimpitsi caari cameetsatatsi.

²²“Ariorica irineetaqueri shirampari yantaquero timatsiri ojime, ocameetsati iroyeeteri, apiiteroqueti. Eiroquea otimimojeitantimpitsi caari cameetsatatsi.

²³⁻²⁴“Otimirica evancaro icashiacaro shirampari irayero, ariorica irineaquero pashini shirampari nampitsiqui irantaquerorica, ocameetsati irayeetanaqueri apiiteroqueti anta icantacoventantapiniyeetinta. Aitaque incameri impichaanayeetaqueri. Irosati cantacaashitearone, te oncajemanaqueji iramitacotanteetearori, quempeji onaveta nampitsi. Aisati iriori shirampari yantitashitacari ishaninca te impincatsateriji. Aitaque oncanteari eiroquea otimimojeitantimpitsi caari cameetsatatsi.

²⁵“Irompa ariorica irineero shirampari anta oantsiqui icashiari pashini, irajiricashitaquearorica irantaquero, ocameetsati poacanteri apaniro. ²⁶⁻²⁷Iroitiquea evancaro tecatsi pincerone aisati tecatsi ante poacantantearori. Tempa yajiricashitacaro apaniro oantsiqui, ocajemavetanaca, iro cantaincha tecatsi amitacoterone. Iquempetacari oashitariri ishaninca.

²⁸⁻²⁹“Irompa iroorica irineaque evancaro, tecatsirica cashiyemparone, ariorica irajiricashitaqueero irineetaqueririca irantaquero, ocameetsati impajeri iri 50 imentaqui quireequi. Irosati irasaanotantaqueero. Incanteani quiso iroanaquero, eiro yojocajirotsi.

³⁰“Tecatsi antitayeterine ijinapee iriri. Jaanicarica antiterine te impincatsateriji.

Atiri caari icoacai incarajeiteri.

23 ¹“Intimerica ivetacaitsoquiyeetiri, ariorica itoshiviyeetiri, ²aisati inquempetea itomi yashitashiyeetari, jeri irishanincajeivetajeari; te oncameetsateji incarajeiteri ampatotimentajeitearine Tasorentsi.

³“Aisati iriori ishanincapeeni Amón jeri ishanincapeeni Moab, aisati irishanincajeivetajeari iriori. ⁴Tempa aponeantajeitanajari Egiptoqui, asotoimojeivetanacari, te impajeitavaqueeji nija aisati avajeiteari. Aisati ipinataqueri Balaam itomini Beor, poneainchari nampitsiqui Petor Mesopotamiaquiniri, yoamaimanajeitantavetavaqueeri. ⁵Iro cantaincha yora Avincatsarite Tasorentsi te inquemisanteriji Balaam, irointi yoashiniajoro itasoncacoventajeitaquee; tempa oshequi inintasanojeitaquee. ⁶Eiro meeca paacameetsajeitiritsi, aisati pincanteani eiro picarajeitiritsi.

⁷“Irintiquea edomosatipee, eiro piquisanentiritsi, iriotaque acarajeitiri. Aisati pinquempejeiteri egiptosati; tempa aitaque asaviquimojeivetapaintariri iipatsitequi. ⁸Yora irishanincajeitanajeari iriori, iriotaque quempejeitanajeeneri, quemisantajeitanajerine Tasorentsi.

Icantacantiro intecatsijeitanteari.

⁹“Ariorica pimanajeiteri quisajeitimpiri jaocarica pisavicajeitapeeri, eiro pantavintsatavacaayetatsi, pantirocari caari cameetsatsi. ¹⁰⁻¹¹Intimerica picarajeitiri aparajatashitarori imainequi ishramparitantari, ocameetsati irishitoanaque nijanteaji, eirotsita ipoquitajatsi; tempa te incameetsatanaje. Ariorica irishaavijiiteanaque catsirincaiteri, irosati incaatantajea. Ariorica ontsitenijencaiteanaje, irosati impiantapaajea pisavicajeitaquenta.

¹²⁻¹³“Aisati ariorica pishite, ocameetsati pijate nijanteaji, pincanteani paapinitero pinqueecashitantearori. Ariorica pishitaque irosati pintijacotantanaquearo. ¹⁴Tempa icantani quiso yoimpi Avincatsarite Tasorentsi pisavicajeitaquenta, inticaacoventantempiri panaacojeitanteariri quisajeitimpiri. Irotaque ocameetsatantari pincaaraiteero pisavicantajeitari, irineacameetsatantearori Tasorentsi. Eiro otimayetitsi paitapeerica jencaayetatsine, eiroquea injantareantimpitsi.

Jaoca incanteriri iperanayeetari.

¹⁵“Intimerica iperanayeetari irishiapitsatajeririca peranatariri, ariorica incantapempi: ‘Nocoi nosavicapaaje,’ ocameetsati paavajeri. Eiro poipiavajiritsi nampitaririqui. ¹⁶Pishineteri incaratapaajempi piipatsitequi irisavicantapaajeari jaocarica ocameetsatimotaqueriri nampitsi, tecatsi asheraanaterine.

Jero pashinipee caari icoacairi irantayeteri.

¹⁷“Eiro itimitsi acarajeitica antayeterine ishramparirinte jero tsinane antashiyetearine shiramparipee, quempetacotearineri

pincatsatashiyetarori ijitasorensiyetiri. ¹⁸Eiro pishinejeitiritsi irijate Inantariqui Avincatsarite Tasorensi, iranaaqueri quireequi ipinayeetiriri yantantarori caari cameetsatatsi, impinacoventantearori icashiacaairiri. Tempa te irineacameetsateroji Tasorensi antayeterone ocapee.

¹⁹“Eiro pishintsinatiritsi pishanincepee impinatajempí, iriorica pimpaqueri quireequi iroorica onarontsi, aisati paitapeerica pincoacotantajeariri quimota. ²⁰Irintiquea pishintsinate pashinisati, irompa yora pishaninca eiro pishintsinatiritsi. Irotaque intasoncaventajeitantempirori Avincatsarite Tasorensi paitapeerica pantayeteri anta pisavicajeitapaajenta.

²¹“Ariorica pincashiacyeteri Avincatsarite Tasorensi paitapeerica, eiro pisamanitirotsi pimocaratero. Eirorica pimocaratirotsi, aitaque incantimentaquempiro; avirotaque cantacayearone pantaquero caari cameetsatatsi. ²²Irompa tecatsirica pincashiacaayeteri, eiro otimitsi pantane. ²³Irompa picoasantaquerica pincashiacyeteri, ocameetsati pimocaratasannoteneri.

²⁴“Ariorica pijate irovamashitequi pishaninca, ocameetsati poayetea oitsoqui pinintacaari. Iro cantaincha eiro paanaquetsi piantirequi. ²⁵Aisati ariorica pijate itiricomashitequi, ocameetsati pisapiriyayetanaque. Iro cantaincha eiro pipesacoyetanaquerotsi.

Cantacotiriri joquirori tsinane.

24 ¹“Ariorica iravetearo shirampari tsinane, iro cantaincha teerica incoashireanajero ineaquerorica jaocarica ocantimotacariri, ocameetsati irisanquenataje cantacoterone: ‘Nojocajiro.’ Impoiji impajero, irosati intiancantajearo. ²Ariorica ojataje, ocameetsati aaje pashini shirampari. ³Iro cantaincha aisatirica inquempetajero iriori irimanintanajero, ocameetsati irisanquenataje cantacoterone: ‘Nojocajiro.’ Impoiji impajero, irosati intiancantajearo. Irompa ariorica incamaque ojimentavetajari, ⁴eiro imatirotsi iraajero ojivavetacari. Tempa te oncameetsatanajeji. Irotaque caari inecameetsati Tasorensi. Aisati avirori eiro pantajeitirotsi, picaariperotirocari quipatsi impempiri Avincatsarite Tasorensi.

Pashinipee icantacantayetiri.

⁵“Intimerica shirampari iroaquera aatsine ijina, eiro ijatitsi iromanatea. Aisati eiro pantacairitsi paitapeerica antaveerentsiyetatsiri, irisavicashitavaqueatsita aparo osarentsi inquimoshiretacantearori ijina yaaqueri.

⁶“Ariorica pimperi pishaninca paitapeerica, impinatantajempiri, te oncameetsate pincoacoteri tincaimentotsi, iroorica mapí itononcaitanteetari. Tempa irotaque yoantari iriori.

7“Ariorica irineetaqueri acarajeitiri peacaashitearine ashaninca imperanatanteriri iroorica impimantaqueri, ocameetsati poacanteri. Eiroquea otimimotantimpitsi caari cameetsatatsi.

8“Iroorica aayetempine patsaarontsi, pimoncaratasanotero maaroni incantempiri antaveetatsiri ishanincapeeni Leví. Ocameetsati incamantasanoyetempiro noquempetaqueri narori.

9Pinquenqueshirejeitajero yoashinoncantacarori Avincatsarite Tasorentsi María nianqui avotsi aponeajeitantanajari Egiptoqui.

10“Ariorica pimperi pishaninca timimoyetimpiri, eiro piqueanaquetsi ivancoqui pincoacotanteariri paitarica, paitavaqueriri. 11Ainti pincatiapee saiteriqui, poyeeri iramaquempiro picoacotaqueriri. 12-13Iriorica caari otimimotasanoyeti paitapeerica pempirone ivashicaro, eiro poimaacotitiritsi. Poimpiitajanteanari irishaavijiiteanajerica catsirincaiteri, impashicanajeari iriori irimaanajerica. Irotaque intasoncacoventantempiri Tasorentsisanori Pitasorentsite pantaquero cameetsatatsiri.

14“Eiro pantaveetacaashitaritsi pishaninca, aisati eiro pitsaneapitsataritsi pimpinateri coiteaveeyetatsiri tsoncacoyetachari. Aisati pinquempetaqueri pashinisati saviquimojeitimpiri. 15Ocameetsati pimpinatiteari tequera irishaavijiiteanaje catsirincaiteri; tempa irinti tsoncacori icoita quireequi iramanantanteari. Eirorica pipinatiritsi, ari iraventaqueari Tasorentsi incantantempiri: ‘Ainiro pantane.’

16“Ariorica irantero caari cameetsatatsi iriri, eiro yoimenteetiritsi itomi. Aisati yantayetiri iriori itomi, eiro yoimenteetiritsi iriri. Aparopeeni incamimentero yantayetiri.

17“Eiro picantacotashiyetaritsi pashinisati, aisati camayetatsiri iriri. Aisati eiro paitayetirotsi oitsaarepee camajimentaaro ompinatantajempiri.

18Pinquenqueshirejeitajero iperanayeevetantaquempiniri anta Egiptoqui, yoimishitoajeitantajimpiri Avincatsarite Tasorentsi. Irotaque nocantantimpiri pimoncarajeitero maaroni ocapee.

19“Ariorica pavijieitiro pivanquire, pipeacotanacarorica poisopatiyetaqueri, eiro pipiashitanajarotsi. Pishineteri irajerota pashinisatipee saviquimoyetimpiri, iriorica camatsiri iriri, iroorica camajimentaaro. Irotaque intasoncacoventantempiri Avincatsarite Tasorentsi paitapeerica pantayeteri.

20-21“Ariorica paviiyetero oitsoquipee porivomashite, eiro picoyeasanoyetanaquerotsi. Aisati pinquempetaquero povamashite, eiro paaperoyetanaquerotsi oitsoquipee. Iraviiyetajerota iriori pashinisati, camayetatsiri iriri jero camajimentaaroopee.

22Pinquenqueshiretasanajeitero iperanayeevetaquempini anta Egiptoqui. Irotaque nocantantimpiri pimoncarajeitero maaroni ocapee.

25 1“Ariorica impianatavacayea atiri inquisavacanteari, ocameetsati irijate anta icantacoventantapiniyeeti, incantacoventanteeteariri.

Yora cantacoventantatsiri irio ioterine jaanica yanteetashitacari, irosati incantacoventantaqueari intacantacarori. ²Ocameetsatirica impasatacanteri ari irovotacanteri quipatsiqui irineacoventanteariri impasayeeteri. Irimoncaratajeneri ocarati yantaqueri. ³Ocameetsati impasateri, eiro yoavisainiritsi 40 yoashinoncaasanotiricari ishaninca, icantashireacaasanotaricari.

⁴“Eiro pipashicavantetiritsi vaca ariorica paaticaitacairi oitsoquipee pivanquire.

Ocantacotiri camayetatsiri caari itimi itomi.

⁵“Intimerica ashaninca saviquimoterine irirenti, ariorica incamaque, teerica intimacayeroni ijina; eiro aashitajatsi pashini shirampari. Ocameetsati aajeri irirentini; tempa iriotaque ojimetsorisanori. ⁶Ariorica intimacaajero otomi, ocameetsati impajitacotajeari iriritsorini, eiroquea opeantatsi ivajiro, intimantajeari irishanincatasanojeitajeari. ⁷Irompa eirorica icoirotsi, ocameetsati ojate anta icantacoventantapiniyeeti. Oncantapeeri jivatacantayetatsiri: ‘Yora nojimetsori te incoyeji iraaena. Te incoyeji intimacaajena irishanincatasanojeitajeari irirentini pajitacotajearine ivajiro, carajeitajerine ashanincapee.’ ⁸Irosati incajemacantantaqueari incantasanotanteariri: ‘Ocameetsati paajero.’ Incantanaquerica iriori: ‘Te noncoye naajero.’ ⁹Impoiji ojatashiteri quempeji onijaacayeari jivatacantatsiri osaporeiteri ishineerate aisati onquitojavoroteri. Oncante: ‘¡Aitaque incanteriri yora caari coatsi intime irishanincatajeari irirentini!’ ¹⁰Irosati impajiyeeantaqueari: ‘Ishanincapee isaporeiteetiri ishineerate.’ ”

Pashini icantacantayetiri

¹¹⁻¹²“Ariorica irantavacayea atiri, oneacoventaqueririca ijina ompocashitapaqueririca, ontinincaitsoquitapeeri yora antaqueriri, ocameetsati pincantacoventero, impesavacoyeetero. Eiro picavintsairotsi.

¹³⁻¹⁵“Ariorica pamanantayete aisati pimpimantayete paitapeerica, te oncameetsate pamatavitantearo mocaramentotsi tenayetatsiri aisati pimoncaratantari tsantsayetatsiri. Irointiquea pimoncaratantea cameetsatatsiri, intasoncaventajeitantempiri Avincatsarite Tasorentsi, pintimajeitanteari oshequi osarentsi anta quipatsiqui impajeitempiri. ¹⁶Te irineacameetsateri Tasorentsi maaroni antayetirori ocapee, yamatavitavacantayetari.

Icantiri intsoncasanojeiteri Amalec.

¹⁷⁻¹⁸“Pinquenqueshirejeitajero aponeantajeitanajari Egiptoqui. Aquenajeitantapaacari caaraiteriqui imanajeitavaquee Amalec nianqui, yoarantavaqueri impoijeitatsiri caari

neaperojeitacha, yatsanajeitavaquee; tempa amaojeitaque. Te impincatsatimateriji Tasorentsi. ¹⁹Irotaque nocantantimpiri: Ariorica iroimpacaacoventaquempi Avincatsarite Tasorentsi, eiro itimanajitsi quisajeitempine savicantayetarori nampitsi pisavicantajeitari, ocameetsati pintsoncasanojeiteri ishanincapeeni Amalec; tecatsi quenqueshireacotanajerine. ¡Eiroyea pipeacojeitarotsi!

Irayeneri Tasorentsi intarori oanayeta ivanquirepee.

26 ¹⁻²“Ariorica pisavicantajeitaquearo quipatsi impempiri Atasorentsite, ocameetsati paviiyetero pivanquire intarori oanayeta, pintyetero cantiriqui. Impoiji paacotanaquero anta Irinanteariqui Atasorentsite icoyeaqueri. ³Aitaque paanaqueneriri antaveetatsiri, pincantapeeri: ‘Namiro oca novanquire itasoncaventaquenari Atasorentsite; tempa irio paquenarori quipatsi nosavicantacari, icantasanotitacariri intacantajeitaqueerini nompajeiteri.’ ⁴Irosati iraacotanaquero antaveetatsiri, iroyero altariqui. ⁵Impoiji pincante aisati:

“Yora intacantajeitaquenaniri iriotaque ishanincapeeni arameo; te iroshequitasanoteni. Irointi iquenaquenayetaque, irosati ijajeitantaca Ejiptoqui; aitaque yoshequitasanojeitapaaqueri, antearoite inampi aisati ineaperoyetani. ⁶Iro cantaincha yora egiptosati yoashinoncaajeitaquena, iperanatasanojeitaquena, aisati ipasanatapinijeitaquena. ⁷Irosati naventajeitantacari Tasorentsi, yora iquemisantiri intacantajeitaquenaniri, icavintsaajeitantaquenari, iquemaquero nocantajeitaqueriri. Aisati ineaquena nashinoncaajeitaca nantaveejeiti aisati ishintsinayeetaquena. ⁸⁻⁹Yonijaaquenaro antearoite itasorenca, ocovencatasanotaque catsini avisayetaintsiri caari noneapiniti yoimishitoajeitantajanari Egiptoqui, irosati yamajeitantajana aca quipatsiqui oshiocasanoyetapai panquirentsiyetatsiri. ¹⁰Irotaque meeca namantayetarori novanquirepee intarori oanayeta itasoncaventaquenari Tasorentsi.”

“Impoiji poyeneri Tasorentsi, irosati pintiyeroashitanaqueari. ¹¹Irosati pinquimoshireventajeitantaquero maaroni itasoncaventaquempiri. Pincaratero pijina, ishanincapeeni Leví jeri pashinisatipee saviquimoyetimpiri.

Inashitacaayetari aparatatsiri.

¹²“Ariorica pintsoncayetero pinashitacayetero pivanquire, omoncaratapaquearica mava osarentsi, irosati pimpantayetaqueari ishanincapeeni Leví jeri pashinisatipee saviquimoyetimpiri, camayetatsiri iriri jero camajimentaaro, ontimanteari iroajeitari iriori icoacaari. ¹³Irosati pinquenquetsatacantaqueari Tasorentsi:

“Notasorensite, nopayetaqueri meeca nonashitacaayetacari novanquire, nomoncarataquero maaroni picantaquenari. Te nompiatsatempi, tecatsi nompeacotaquea aparo picantacantiri. ¹⁴Te noarrantitayetavaqueariji ariorica nocamaarrantayeveta aisati teerica noncameetsaveteaji, te nompayeriji camayetatsiri. Novincatsarite Tasorensi, noquemisantaquempi, nomoncaratasanotaquero maaroni picantacantaqueri. ¹⁵Pamenacoventasanotena inquitequi, anta Pinantariqui pinashitacaari. Pintasoncaventajeiteri pishanincepee aca quipatsiqui, pipajeitaquenari oshiocasanoyetapai panquirensiyetatsiri. Tempa irotaque picantasanotaqueriri intacantajeitaquenaniri.’

Inashitacaacari Tasorensi ishanincajeitaniri Israel.

¹⁶“Yora Atasorensite icoacaasanotaquempi meeca, pimatapinijeitero icantacantiri, pimoncaratasanotero aisati pinquenqueshiretasanotero maaroni. ¹⁷Tempa picantasanotaque meeca: ‘Iriotaque Tasorensi Pitasorensite. Aisati picantasanotaqueri pinquemisantsanoteri, aisati pimoncaratero maaroni icantacantiri pincantaitatijempani pinquemisanteri.’ ¹⁸Aisati iriori Tasorensi icantasanotaque: ‘Meeca, aviro ishanincajeitaniri Israel, avirotaque noshanincatajari nashitasanotaquempi.’ Ocameetsati meeca pimoncarajeiteneri Icantacantiri. ¹⁹Iriotaque tasoncaventajeitempine; oshequi quemacojeitempine irineacameetsatempi. Panaacojeiteri maaroni savicayetatsiri nampitsipeequi. Tempa avirojeitaque ishanincatajari, inash itacaajeitaquempi.”

Impiotimotero mapi toncaari Ebal.

27 ¹Yora Moisheshi jeri jivatacantayetatsiri icantajeitiri ishanincepee: “Pimoncarajeitero maaroni noncantempiri. ²⁻³Ariorica pimonteajeitanaquearo nija Jordán, parejeitaquearorica quipatsi impempiri Avincatsarite Tasorensi, ocameetsati pintitiye mapipee antearo impoiji pintiritantearo shoco onquitamarotantanaqueari. Irosati pisanquenatantanaquearo maaroni icantacantiri Tasorensi nocamantaquempiri. Ocameetsati pimoncaratero ariorica pisavicantajeitaquearo oshiocasanoyetapai panquirensiyetatsiri impempiri Tasorensisanori Pitasorensite; tempa icantasanotitacari intacantajeitaqueerini. ⁴Irotaque nocantantimpiri pimonteanaquearorica nija Jordán, ocameetsati pintitiye mapipee toncaariqui Ebal. Irosati pintiritantanaquearo shoco. ⁵⁻⁶Impoiji paayete mapi, povetsiqueneri Tasorensisanori Pitasorensite altar. Eiro poameetsayetavaquerotsi, apatsentseinaropee onayetaque. ⁷Aitaque pintayeriri pivira aisati pintaimenterori iracameetsatantajempiri. Aitaque

pinquimoshireventeriri poimentajeiteari. ⁸Pisanquenatacotaqueroyea mapiqui, nocamantayetaquempiri, cameetsa onconijatasanotaque.”

⁹Irosatiquera icarajeitiri Moiseshi ishanincapeeni Leví antaveetatsiri, icantajeitiri:

“Noshaninca, pimajerejeite, pinquemisantasannotena noncantajeitempi. Meeca avirojeitaque ishaninca Tasorentsisanori Pitasorentsite. ¹⁰Irotaque ocameetsatantari pinquemisantasanojeiteri aisati pimatapinjiteero icantacantiri nocamantaquempiri.”

**Inquenquetsatacotero oashinoncantsiyetatsiri
toncaariqui Ebal eiorica iquemisantitsi.**

¹¹⁻¹²Aisati icantajeitaqueri:

“Ariorica pimonteajeitanaquearo nija Jordán, yora ishanincapeeni Simeón, Leví, Judá, Isacar, José jeri Benjamín, irio catiimojeitapeerone toncaari Guerizim, onantari tasoncaventantsi. ¹³Irioquea ishanincapeeni Rubén, Gad, Aser, Zabulón, Dan jeri Neftalí, catiimojeitapeerone toncaari Ebal onantari oashinoncantsi. ¹⁴Impoiji irineanate ishanincapeeni Leví quimojenca, incante:

¹⁵“ ‘Trashinoncayea vetsicayetatsine ijitasorentsite iroorica ashiro irishiacantayeteri paitapeerica, irimanavetaqueari. Eiro ineacameetsatacotiritsi Tasorentsi.’ Ari icantajeitanaque maaroni ashanincapee: ‘Jee, aitaque oncanteari.’

¹⁶“ ‘Trashinoncayea caari pincatsaterine iriri aisati iriniro.’ Ari incantajeitanaje maaroni: ‘Jee, aitaque oncanteari.’

¹⁷“ ‘Trashinoncayea oaitayeterine ishaninca yoaticashiyetirori iipatsite iraarantitantajeariri.’ Ari incantajeitanaje maaroni: ‘Jee, aitaque oncanteari.’

¹⁸“ ‘Trashinoncayea amataviterine maviteajari inquenacaashitanteariri.’ Ari incantajeitanaje maaroni: ‘Jee, aitaque oncanteari.’

¹⁹“ ‘Trashinoncayea caari cantacoventerine cameetsa pashinisati, camajimentaaro, iriorica camayetatsiri iriri.’ Ari incantajeitanaje maaroni: ‘Jee, aitaque oncanteari.’

²⁰“ ‘Trashinoncayea onaiterine ijina iriri; tempa te impincatsateriji.’ Ari incantajeitanaje maaroni: ‘Jee, aitaque oncanteari.’

²¹“ ‘Trashinoncayea antashiyetearine poshiniripee.’ Ari incantajeitanaje maaroni: ‘Jee, aitaque oncanteari.’

²²“ ‘Trashinoncayea antayeterone iritsiro, irishinto iriri iroorica oshinto irinirotsori.’ Ari incantajeitanaje maaroni: ‘Jee, aitaque oncanteari.’

²³“ ‘Trashinoncayea antayeterone irairo.’ Ari incantajeitanaje maaroni: ‘Jee, aitaque oncanteari.’

24“ ‘Irashinoncayea oacanterine ishaninca.’ Ari incantajeitanaje maaroni: ‘Jee, aitaque oncanteari.’

25“ ‘Irashinoncayea aayeterine quireequi impinayeeteriri iroashitanteariri ishaninca.’ Ari incantajeitanaje maaroni: ‘Jee, aitaque oncanteari.’

26“ ‘Irashinoncayea caari pincatsaterone oca nocamantaquempiri aisati caari moncaraterone.’ Ari incantajeitanaje maaroni: ‘Jee, aitaque oncanteari.’

Intasoncaventeri Tasorentsi quemisantiriri.

(Lev. 26.3-13; aisati Deut. 7.12-24)

28 ¹“Queariorica pinquemisantasanoteri Avincatsarite Tasorentsi aisati pimatapinijeitero maaroni Icantacantiri nocamantaquempiri, irotaque irimatacantempiri panaacojeitanteariri maaroni nampitsipeequiniri. ²Pineero tasoncacoventantsi, ariorica pinquemisantajeitaqueri.

³“Intasoncaventempi pinampiqui aisati poanequi.

⁴“Intasoncaventempiri pitomipee, pivanquirepee, irijanipee pivacate jeri povishatepee aisati paitapeerica pivirayeteari.

⁵⁻⁶“Intasoncaventempro piquempoyeantarori poapiniyetari jero pitashitantarori pitantane aisati maaroni paitapeerica pantayeteri.

⁷“Imatacaajeitempiri Tasorentsi quisajeitempine. Ariorica irimanajeivetempi, iroveshintaajeivetapaaquearica, iro cantaincha irishiapitsajeitanaquempi inquenashijeitanaquea jaocapeerica.

⁸“Intasoncacoventasanotempro pinquempoyeantayetarori pivanquirepee aisati maaroni pantayeteri; inquimoshiretacaasanojeitempi pinampiqui impempiri.

⁹“Ariorica pimoncarajeitaquero maaroni icantacantiri aisati pinquemisantasanojanqueri, incanteani irishanincatasanojeitempi; tempa inashitacaajeitaquempi picameetsatasanoaque; irimoncaratero icantasanojitariri. ¹⁰Irosati iriojeitanaquempi maaroni nampitsipeequiniri, avirojeitaque ishanincajeitajari Tasorentsi; irotaque intsaroacaajeitantempiri. ¹¹Oshequi incavintsaajeitempi Tasorentsi, irishequiacaasanojeitempi pitomipee jeri irijanipee pivacate, aisati ontimasanoyete oitsoqui pivanquirepee anta quipatsiqui icantasanojitariri intacantajeitaqueerini. ¹²Incanteani irovaryempro incani quipatsiqui coiteimotimpiri, oshiocasanoyetanteari cameetsa pivanquirepee pantaveeripeequi. Avirojeitaque payeterine pashinipee nampitsiquiniri, avintiquea eiro picoacotantayetitsi catsini. ¹³Irimatacayempi Tasorentsi panaacotantajeite maaroni, tecatsi catsini anaacotempine. Avirojeitaque pincatsariventajeiterine pashinisatipee, tecatsi pincatsariventempine, ariorica pinquemisantero icantacantiri

Avincatsarite Tasorentsi nocamantaquempiri aisati pimatapinijeitero. ¹⁴Eiro catsini pipeacotarotsi, irointi pimoncaratero ocantayetiri, aisati eiro pipincatsatashiyetaritsi ijitasorentsitashiyetari.

Irineajeiteri eirorica iquemisantiritsi Tasorentsi.

(Lev. 26.14-46)

¹⁵“Irompa eirorica piquemisantiritsi Avincatsarite Tasorentsi, aisati eirorica pimajeitirotsi icantacantiri nocamantaquempiri, irotaque ompocashijeitantempiri oashinoncantsipee.

¹⁶“Pashinoncaajeitea pinampiqui aisati poanequi. ¹⁷Eiro otimitsi pivanquire piquempoyeantaroriqui poapiniyetari, eiro ocameetsatitsi pitashitantarori pitantane.

¹⁸“Troashinoncaajeitea pitomipee, aisati eiro ocameetsatitsi pivanquirepee paviiyevetari jeri irijanipee pivacate, povishatepee aisati maaroni pivirayevetari.

¹⁹“Eiro ocameetsatitsi maaroni paitapeerica pantayevetari.

²⁰“Iriotaque Tasorentsi tianquempirone oashinoncantsi, tsaviatantsi aisati oashiretantsi pantayevetearorica paitapeerica. Eiro osamanititsi intsoncasanojeitajempi; tempa pipeacotanacari pantashiyetanacaro caari cameetsatitsi.

²¹“Irotaque intiancantempirori caamanetantsi tsoncajeitanaquempine anta nampitsipeequi pisavicajeivetapempanta. ²²Aisati intianquempiro mantsiarentsipee oamantatsiri: catsirentsi, sompotsijenca, catsirincajencatantsi, osarentsiiteasanotanaque, oncamayetanaque pitiricomashite aisati omapocajeitempi mantsiarentsi pajencantatsiri oijanatanquempi irosati ontsoncantajeitajempi. ²³Eiro catsini pineimatajirotsi ompariaje incani, eiro oitsoquiyetanajitsi pivanquirepee. ²⁴Intianquemirome Tasorentsi incani, iro cantaincha irointi intiancajeitempiro quipatsijencari jero impanequijenca, irosati pincamantajeitaquea.

²⁵“Aisati impocashijeitanaquempi manajeitempineri. Pijatashijeivetanaqueari avirori, cameetsa piveshintaajeivetanaquea, iro cantaincha irointi pishiapitsajeitanaqueri pinquenashiyetanaquea. Irineajeitaquempirica nampitsipeequiniri, oshequi iroajeitanaquempi cavaco. ²⁶Impocashijeitempi tisonipee jeri maniti oantayetachari, iroitajeitempiro pivatsani, tecatsi shancacoventempine.

²⁷“Iroashinoncaasanotempi Tasorentsi inquempetacantajeitempi ejiptosati. Intianquempiro patsaarontsijenca, eeretantsijenca jero patsetsijenca. Eiro pimayetirotsi paavintero.

²⁸⁻²⁹“Aisati omapoquempi pineaveetashiyetanaquea, pincamarajaquiyetanaquea, aisati pintsaviatashiyetanaquea, pintimpinacashiyetanaquea pinquempetanaqueari mavitajari tsiteniriqui.

Ora pantayeveteari eiro ocameetsatimojeitimpitsi. Pincanteani oquempequimotempi imperanayeetempi irishintsinayetempi pantaveete. Iro cantaincha, tecatsi amitacotimatempine. ³⁰Pincashiayevetea tsinane payeri, iro cantaincha pashini onaitempirone. Aisati povetsicayevetea pivanco, iro cantaincha eiro pisavicantayetarotsi. Ariorica pimpanquiyevetea povamashite, eiro poarotsi; ³¹poayeveteari pivacate, iro cantaincha eiro poimataritsi ivatsa; pineacoventayeveteari iraitetempiri paashinote, iro cantaincha eiro yoipaiyeetajimpiritsi; iraitajeitempiri quisaquempiri povishatepee, iro cantaincha tecatsi amitacotempine irantavajempiriri; ³²pineacoventayeteri pitomipee jero pishintopee impimanteeteri pashiniqui atiri, maaroni quitaiteripeequi pincoapinivetea pineajerime, iro cantaincha eiro pimatacoventajiritsi. ³³Ora paviiyeveteari oitsoqui pivanquirepee, iroitajeitempiro atiri caari pineapinijeiti. Pincanteani pashinoncaajeitea imperanatasanoyetempi, eiro yaacameetsayeetimpitsi. ³⁴Ariorica pineayetaquero ocapee, eiro piquenqueshiretanajatsi, irointi pineaveetashiyetanaquea.

³⁵“Aiquero iroashinoncaasanotempi Tasorentsi intianquempiro patsaarontsijenca oamaantatsiri. Ontsoncayetapempi piyeritopeequi, pivoripeequi, aisati maaroni pitsempequipeequi, eiro pimatirotsi paavintero.

³⁶“Aisati irishinetacoventempi Tasorentsi jeri pincatsariventimpiri irayeejeitanaquempi pashiniqui nampitsi caari pineapinitini aisati caari inei intacantajeitaqueerini. Aitaque pimpincatsayetapeeriri ijitasorentsiyeetiri vetsicayetachari inchato jero mapi. ³⁷Irosati iroajeitanaquempi cavaco irantanayeetanaquempi, aisati irishirontimentajeitempi nampitsipeequiniri iranaquempinta Tasorentsi.

³⁸“Pimpanquiyevetea oshequi pivanquire, iro cantaincha eiro paitsi oshequi oitsoqui, iroarantitayetavaquempiro tsinaropee. ³⁹Aisati pimpanquiyevetea povamashite, pamenacoventapiniyevetaquearo. Iro cantaincha eiro poasanotatsi oitsoqui aisati eiro pirasanotitsi oja, intsonquitasanotavaquempiro quenitsipee. ⁴⁰Ontimasanoyetevetea orivomashi pisavicayetapenta, iro cantaincha eiro pitiriyetarotsi oreji pincasancantanteari, oshequi osacoroncaiquitashiyetanaquea. ⁴¹Intimayevetea pitomi jero pishinto, iro cantaincha eiro picarajeitiritsi, iraiteyetanaquempiri pashinipeequi nampitsi. ⁴²Maaroni inchatopee jero pimpanquiyeveteari, intsonquitasanojeitempiro tsinaropee oitsoqui.

⁴³“Yora pashinisatipee saviquimoyetimpiri, aiquero irineaperotasanojeitanaquea. Avirojeiquea aiquero pijatanaqueri, eiro pineaperojeitanajatsi. ⁴⁴Impayetempi irinti, avintiquea tecatsi pimpayeteriri. Iriojeitaque neaperotanajanchane, aviroquea tecatsi pijitanajea.

⁴⁵“Ora oashinoncantsipee omapocajeitempi aajeitempi, oijanajeitanaquempi irosati ontsoncantajeitajempi. Tempa te pincoyeji

pinquemisanteri Avincatsarite Tasorentsi aisati te pimoncaratero icantacantiri. ⁴⁶⁻⁴⁷Oca oashinoncantsipee mapoquempineri avirori aisati pishanincajeitajeari, iotacantempiri te pimpincatsateriji Avincatsarite Tasorentsi, aisati te pinquimoshireventeriji; tempa ipavetaquempiro maaroni timimoyetimpiriri. ⁴⁸Irointi pantaveetasanotanaqueneri quisajeitimpiri intianquempiro Tasorentsi. Pinquemapinijeitero pitashe aisati pimire; oncoiteimotempi quitsaarentsi aisati paitapeerica. Iroashinoncaasanotempi Tasorentsi imperanatasanoyeetempi irosati pintsoncajeitantajea pincamajeitaje.

⁴⁹⁻⁵⁰“Aisati intiancajeitempiri areejisati, caari piquematsatapiniyeti. Intsipate impocapaaque, inquempejeitapempari yari anteariite paquitsa. Aisati incovencatasanotapaaque, eiro ipincatsayeetapairitsi anteashiparipée aisati eiro ineshinoncayeetapairitsi jananequipee. ⁵¹Iroitayetapaaquempiro pivirapee aisati oitsoquipee pivanquire; intsonquitasanojeitanaquempiro timimoyetimpiriri. Eiro yoanajimpitsi tirico, ovaja, oreji orivo aisati irijani pivacate jeri povishate. Aasanojeitanaquempi pitashe irosati pincamantajeitaquea.

⁵²“Aisati irishoncajeitapaaquearo pinampipee irimanajeitapaaquempi, irosati ontireantanaquea otanto antearoyevetachaneri aisati onquisotasanojevetaquea paventapinivetari. Aitaque irimajeitakuero pinampipee, aisati piipatsite ipavetaquempiro Avincatsarite Tasorentsi.

⁵³“Ariorica irimanajeitakuempi, oshequi pintasheasanojeitanaque, poayetanaqueari pitomi jero pishinto itasoncaventavetaquempiro Avincatsarite Tasorentsi. ⁵⁴⁻⁵⁵Aisati inquempeyetanaquea shiramparipée cavintsantayevetachari jeri nintantayevetachari picarayevetari, inquisanentayetanaqueri irirenti, ijina jeri itomi timaarantavetanajanchane eiro ipayetanajirotsi ivatsa iroyeari. Tecatsi paajeitanajero poayeteari. Irimanayeetaquempirica, oshequi iroashinoncaasanojeitempi manajeitempineri pinampipeequi.

⁵⁶⁻⁵⁷“Aisati onquempeyetanaquea tsinanepee picarayevetari cavintsantayevetachari, cameetsatasanojevetachari caari coavetacha aniicontatashitea, oncatsimajaquiyetanaqueri ojime onintasanovetari aisati otomipee. Eiro opaarantantayetanajaritsi isheito otimajaniyetiri, omanacaanaqueari. Tempa tecatsi poajeitanajeari irimanajeitakuempirica quisajeitimpiri pinampipeequi.

⁵⁸“Eirorica pimajeitirotsi maaroni nocamantayevetaquempiro sanquenatacoyetainchari, aisati eirorica pipincatsatiritsi Avincatsarite Tasorentsi yora Pincatsaritasantatsiri, ⁵⁹intianquempiro avirori aisati iriori pishanincajeitajeari antearoite covencayetsiri oashinoncantsi, aisati mantsiarentsi oamaantatsiri, caari imayeeti iravinteetero. ⁶⁰Aajeitajempi aayetaqueriri egiptosati, oimintsaroajeivetanaquempiro, pincanteani pashinoncaapinijeitanaquea.

⁶¹“Ainiro pashini intianquempiri mantsiarensipee oashinoncayetempine caari sanquenatacotacha aca. Irotaque tsoncajeitempine. ⁶²Noshaninca, meeca pishequitasanojeivetaca catsini, piquempejeitacari impoquiropee. Iro cantaincha pintimanaje capichaji, eirorica piquemisantasanotiri Avincatsarite Tasorentsi. ⁶³Oquempetaca isavicacajeitaquempi cameetsa, yoshequiacaasanojeitaquempi, aisati onquempetaquea intsoncasanojeitajempi anta nampitsipeequi pisavicasanojeivetapempanta.

⁶⁴“Yora Tasorentsi irovaraayetanaquempi jaocapeerica nampitsipeequi aisati pashinipeequi quipatsi. Aitaque pimpincatsayetapeeriri ijitasorentsitashyeetari vetsicayetachari inchato, mapi, caari pineapinijeiti aisati caari ineapiniti intacantajeitaqueerini. ⁶⁵Anta pisavicajeitapenta, eiro pisavicajeititsi cameetsa aisati eiro pimaoreajeitanajitsi. Tempa incantacaashireacayempi Atasorentsite, pintsaroapinijeite aisati poashiretapinijeitea pinquenqueshireveetashitea. ⁶⁶Pincanteani isareapiniyetempi iroyeetempi; pintsaroapinijeite quitaiteriqui aisati tsiteniriqui. Eiro catsini pitimasanoyetitsi osamani. ⁶⁷Oshequi pintsaroacajeiteari paitapeerica pineayeteri. Ariorica onquitaiteamane pincantapinite: ‘¡Cantenane intsipaite ontsitenitaje!’ Aisati tsiteniripeequi pincantapinite: ‘¡Cantenane intsipaite onquitaiteaje!’ ⁶⁸Icantasanovetaquempi Tasorentsi: ‘Eiro pipiajeitanajatsi Egiptoqui.’ Iro cantaincha aitaque iroimpiajeitanajempi pitotsiqui impimanteetempi, iro cantaincha tecatsi coatsine iramanantavajempi.”

Icantasanotajiri Tasorentsi ishanincajeitaniri Israel anta Moabaqui.

29 ¹Irotaque icantacantayetiri Tasorentsi, icantaqueriri Moiseshi irimoncaratacayeriri ishanincajeitaniri Israel anta Moabaqui, aisati icantitacariri toncaariqui Horeb. ²⁻³Ari yapatotajiri ishanincapee, icantiri:

“Avirojeitaque neaquerori maaroni imataqueri Tasorentsi Egiptoqui, yonijantacariri yora Faraón jeri amitacoyetiriri. Avirotaque neasanojeitaquerori antearoite itasorenca caari ineapiniyeeti. ⁴Iro cantaincha, irosati meeca tequera iriotacayempiro aisati tequera irishinetempi piotacotasanotero maaroni oshiacantayetiri. ⁵Ocarataque 40 osarentsi nojivatantaquempiri caaraiteriqui, te ontsoquimateaji aitsaarepee aisati asapaatotepee. ⁶Te aimatajeaji tanta aisati te irimatajeji ovaja jero shintsijayetatsiri, piojeitanteari yora Tasorentsi iriotaque Pivincatsarite.

⁷⁻⁸“Areetantacarori quipatsica, ipocajeivetaca Sihón pincatsariventirori Hesbón, aisati Og pincatsariventirori Basán, imanajeivetapaaquee iriori. Iro cantaincha atsoncajeitavaqueri irinti. Irosati aitajeitancari iipatsitepee, impoiji nopaqueri ishanincapeeni

Rubén, Gad jeri ishanincapeeni Manasés nopaarantaqueri iriori.

⁹Irotaque ocameetsatantari pimocaratsanotero ocantayetiri icoacaasanotaquempiri, pimatapinijeitero, pimatantearori maaroni paitapeerica pantayeteri.

¹⁰“Meeca apatojeitimentacari Avincatsarite Tasorentsi, acarajeitaqueri jivatacaayetimpiri jeri amitacoyetiriri, maaroni shiramparipée,
¹¹jananequipee, tsinanepee, pashinisatipee saviquimoyetimpiri amapinitimpiri tsitsi aisati nija; ¹²pincantasanojeitanteari: ‘Queario, amoncarajeitero icantacantiri Tasorentsi; tempa queario inajeitaquee.’
¹³Meeca avirotasanojeitaque ishanincajeitajari, aisati iriotaque Pitasorentsite. Tempa icantasanojeitacari intacantajeitaqueeri Abrahamani, Isaacani jeri Jacoboni. ¹⁴Iro cantaincha te apaniro incarajeitempi Tasorentsi aisati irimoncaratempiro icantasanoquempiri, ¹⁵aisati iriori icantaqueri caariquera acarajeiti aca apatotimentacarica. ¹⁶Tempa pitasanojeitaquero jaoca acantacari asavicanavetacari Egiptoqui aisati jaoca acantacari aquenajeitantaacari nampitsipeequi aisati paita aneajeitanaqueri avotsiqui. ¹⁷Aitaque aneitayetanaqueriri caariperori ijitasorentsitashiyetari atiri apincajeitiri, ivetsicashiyetaro inchato, mapi, plata, jeri oro; iriotaque ipincatsatiri. ¹⁸Tecatsiya picarajeitica shirampari, tsinane aisati pishanincasanori joquerine Avincatsarite Tasorentsi, impicatsatanteariri ijitasorentsitashiyetari nampitsipeequiniri. Quearioyea piquempejitarocari quepishitatsiri ovaritsa inchato piantatsiri.

¹⁹“Ariorica piquemayevetacaro ocantayetiri picantasanojeitantacariri Tasorentsi, timatsirica aaroni jitanaintsineri icameetsatasanoti, inquenqueshiretanteari: ‘Aitaque nontimaque cameetsa, omaveteata nantero paitapeerica nocoacaayetari.’ Iriotaque cantacantajeiterine maaroni iroashinonquejeitanteeteariri. ²⁰Eiro ipeacotanaritsi Tasorentsi iriori. Aitaque inquishmentajeitaqueri, intianqueneri oashinoncantsipee sanquenatacoyetainchari aca, aisati intsoncajeitajeri irishanincajeivetajeari. ²¹Irinashitajeari ishanincasanoripee iriori, iroashinoncanteariri. Omoncaratea maaroni oashinoncantsi icantacantiri Tasorentsi sanquenatacoyetainchari aca.

²²“Yora impoijeitajantsineri coajicani pishanincajeitajeari, aisati inquempetea pashinisatipee poneayetachaneri areejiqui irineajeitero oashinoncantsipee aisati mantsiarentsipee intiancayetempiri Tasorentsi aca quipatsiqui. ²³Irineajeitero maaroni nampitsipee oncaaraiteasanotanaquero icanteetiri azufre aisati tivi, ontaavanetasanotanaquea quipatsi, tecatsi panquitantajearine aisati eiro oshiocayetanajitsi tojari. Onquempetanaquearo Sodoma, Gomorra, Admá jero Seboím, itsoncasanotantacarori Tasorentsi iquisasanotantacarori.

²⁴“Impoiji incantajeite atiripee: ‘¿Paitaquea itsoncantacariri Tasorentsi savicantajeitaroniri nampitsipee? ¿Paitaquea iquisasanotantacariri?’

²⁵Jeroa incantayeteri: 'Iro itsoncantacariri: yojocajeitanaquero icoacaavetacariri Ivincatsarite Tasorentsi; te irimoncarajeitero icantasantaqueriri intacantajeitaquerini, yoimishitoajeitantajariri Egiptoqui. ²⁶Iquemisantashjeitanacari ijitasorentsiyeetiri aisati ipincatsatashjeitacarri caari ioti, tecatsi imateneri imperiri paitapeerica. ²⁷⁻²⁸Irotaque iquisantacarori Tasorentsi oca quipatsi, itiancantacarori oashinoncantsipee sanquenatacotainchari aca; irotaque ishinecoventantacariri yayeejeitanaqueri pashinipeequi nampitsi, irosati meeca.'

²⁹"Ainiro manachari caari ayojeiti, apaniro iotiro irinti Avincatsarite Tasorentsi. Iro cantaincha ainirotatsi iotacaajeitaqueeri aisati iriori atomipee, amoncaratapinijeitantearori maaroni ocantayetiri icantacantiri.

Irineantajejarori tasoncaventantsi.

30 ¹"Ariorica ompocashjeitaquempi maaroni nocamantayetaquempiri, ora tasoncaventantsi aisati oashinoncantsi, nocantaquempiri pincoyeanontea, impoiiji pinquenqueshiretapaajero anta nampitsipeequi jaocarica irovaraajeitaquempiri Avincatsarite Tasorentsi. ²⁻³Ariorica pimpiashjeitajeri Tasorentsi, pinquemisantasanotajeri maaroni pishirequi, aisati pishiretasanotajeari, pincarajeitajeri pitomipee; tempa nocamantaquempi, irosati impashiniantajeero aisati incavintsaajeitajempi, irampatojeitajempi jaocarica piponeanacari pincarajeitajeri nampitsipeequiniri. ⁴⁻⁵Omavetaquea povaraayevevanaca areejipeequi, aitaque iramenajantempi Tasorentsi iramajeitajempi, iroimpiantajempiri iipatsitequi intacantajeitaqueerini. Irosati pisavicasanojeitantapaajea cameetsa, ontimimotasanoyetanajempi pashiyeteari aisati irishequicaajeitajempiri pitomipee, panaacojeitajeri intacantajeitaqueerini. ⁶Iroameetsashiretasanotempi Tasorentsi, pinquenqueshiretapinitantearori icantacantiri, aisati inquempetajea pishanincajeitajeari, irinintasanoteri aisati irishiretasanoeitajeari, irotaque iraneasanojeitantajeari. ⁷Impoiiji intiancayeteneri oashinoncantsipee quisajeitempine jeri oijanajeivetempine.

⁸"Irosati pimpiashjeitantajeari Tasorentsi pinquemisantasanotanjeari, aisati pimatapinijeitero maaroni icantacantiri nocamantaquempiri meeca. ⁹Irosati irishequicaasanojeitantajempiro paitapeerica pantayeteri: pitomipee, pivira aisati paviiyetiri pivanquire. Aitaque intasoncacoventajeitajempi Avincatsarite Tasorentsi, isavicaaajeitajempi cameetsa, iquempetaqueri peerani intacantajeitaqueerini, ¹⁰ariorica pinquemisantasanotajeri aisati pimoncarajeitero icantacantiri sanquenatacoyetainchari aca sanquenarentsiqui, aisati pimpiashitajeri maaroni pishirequi aisati pinquenqueshiretsanotajeri.

¹¹“Oca icantacantiri noametajimpiri, te ompomerentsitasanoteaji pinquemajeitero, ario pimataquero. ¹²Te ontime inquitequi, pincantajeitanteari: ‘¿Jaanica jatatsineri anta iramanteerori iriotacantajeitapeerori, amatantearori amoncarajeitero?’ ¹³Aisati te ontime intatiqeroqui incajare, pincantajeitanteari: ‘¿Jaanica monteashitanaquerone iramanteerori iriotacantajeitapeerori, amatantearori amoncarajeitero?’ ¹⁴Tempa ocantani otimi quempeji, aitaque pineanatacotaquero aisati pinquenqueshiretapinitero, pimajeitantearori pimoncaratero.

¹⁵“Pamenajeite meeca, nocamantaquempiro pincoyeanontanteari cameetsatatsiri aneacantatsiri, aisati caari cameetsatatsi oamaantatsiri. ¹⁶Pinquemisantajeiterorica nocamantaquempiri aisati pinintasanoteririca Avincatsarite Tasorentsi, pinquearioventasanotanaquero icoacaimpiri, aisati pimoncaratapinitero icantacantiri; ari paneasanojeitaje, intimajeitanaque oshequi pitomipee aisati intasoncacoventasanojeitempi pisavicajeitapaajenta. ¹⁷⁻¹⁸Irompa eirorica piquemisantirotsi maaroni oca, irointirica pijatashijeitanaqueri ijitasorentsitasashiyeetari pinquemisantashijeitanteariri aisati pintiyeroashitanteariri, niotacaasanotempi meeca, aitaque pincamitajeitaquea, eiro osamanititsi pintimantasanojeitearo quipatsi pimanatacoventajeivetaqueari pimonteanaquerorica nija Jordán. ¹⁹Meeca oca quitaiteri noncamantero inquite aisati quipatsi ocantacoventajeitempi. Nocantaquempi: Pincoyeanontea meeca oaneantatsi iroorica caamanentsi, aisati tasoncacoventantsi jero oashinoncantsi. Pincoyeanonteaqueti meeca oaneantsi paneajeitanteari aisati iriori pishanincajeitajeari. ²⁰Pinintasanoteri Avincatsarite Tasorentsi, pinquemisantasanoteri. Tempa iriotaque oaneajeitaquempiri pisavicantajeiteari oshequi osarentsipee anta quipatsiqui impempiri, icantasanotaqueriri Abrahamani, Isaacani jeri Jacoboni; tempa iriotaque intacantajeitaqueeri.”

Impoyeetantajeariri Josué Moiseshi.

(*Núm. 27.12-23*)

31 ¹⁻²Ari icamantajiri Moiseshi ishanincapee icantiri: “Meeca caratapaaque 120 nosarentsite, te noshintsitasanoyetanaje nojatantayeteari jaocapeerica. Aisati icantasanotaquena Tasorentsi: ‘Eiro pimontearotsi nija Jordán.’ ³Iro cantaincha iriotaque jivatanaquempine intsoncajeiteri nampitsipeequiniri, paajeitantajearori iipatsite. Yoca Josué, iriotaque jivatanajempine; tempa iriotaque icantaqueri Tasorentsi irijivatacaajeitajempi. ⁴Imatacaajeitempi Tasorentsi iquempetanaqueri Sihón aisati Og ivincatsariteni amorroepée aisati iipatsitepee, imatacaquempiri pitsoncajeitancariri ⁵Ariorica irimatacaajeitaquempiri Tasorentsi pintsoncajeiteri nampitsipeequiniri,

ocameetsati pimoncaratasanotero nocantajeitaquempiri.

⁶Pineaperojeitanaquea, eiro picantashirejeititsi, aisati eiro pitsaroajeititsi ariorica pimanajeitaqueri. Tempa quiso yoajeitimpi Avincatsarite Tasorentsi. Eiro ipeacotimpitsi, aisati eiro yojocajeitimpitsi.”

⁷Irosati icajemantacari Moiseshi Josué. Iquemajeitaqueri ishanincapee icantiri:

“Pineaperotanaquea, eiro picantashireti. Aviro meeca aajeitanajerine ashanincapee anta quipatsiqui icantasanotaqueriri Tasorentsi intacantajeitaqueerini impempiri. Avirotaque payeterine irisavicaantajeiteari. ⁸Iriotaque Tasorentsi jivatempine, quiso iroyempi. Eiro catsini yojoquimpitsi. Irotaque nocantasanotantimpiri: Eiro pitsaroitsi aisati eiro picantashiretitsi.”

Irineanatacoteneri ireevitantatsiri icantacantiri osarentsiqui.

⁹Ari isanquenatacoyetaquero Moiseshi icantacantayetiri Tasorentsi. Ipacotaqueri antaveetatsiri quijacotapinitirori Cajón. Aisati ipaqueri iriori jivatacantayetatsiri. ¹⁰⁻¹¹Irosati icantajeitancari:

“Ariorica omoncaratapinitea ⁷ osarentsipee, pipeacotantapinijeitanariri caari pinayetatsi, piquimoshireventajeiterorica pivancoshetajaniquiepe aisati pampatotacaapinijeitearirica ashanincapee anta Irinanteariqui Avincatsarite Tasorentsi; irotaque pineanatapinijeiteneriri. ¹²Ocameetsati irampatojeitea maaroni shiramparipee, tsinaneppee, jananequiepe jeri pashinisatipee saviquimoyetimpiri, inquemantajeitavaquearori pineanateneriri, iriojeitanteari impincatsatasanoteri Avincatsarite Tasorentsi. Aisati irimajeitantearori iriori maaroni ocantayetiri. ¹³Irotaque inquemantajejarori pishanincajeitajeari caari iotacovetaro. Iriojeitanteari impincatsatapinijeitajeri Avincatsarite Tasorentsi anta quipatsiqui pimonteanaqueorica nija Jordán.”

Yoverantacarori Tasorentsi iquenquetsatacaavajiri Moiseshi.

¹⁴Impoiji icantajiri Tasorentsi Moiseshi:

“Irotaintsi meeca omoncaratea pincamanteari. Pincajemeri meeca Josué, paanaqueri Novancoqui papatotimentantanari, pincatiacaapeeri, noncamantantayeteariri paitapeerica noncoacayeriri.”

Irosati ijajeitantaca. ¹⁵Ari inijaacari Tasorentsi mencoriqui. Ociatiantsatataca iqueantapinitaroriqui. ¹⁶Irosati icantancari Moiseshi:

“Irotaintsi meeca pincame. Yora pishanincapee oshequi irantayetapeero caari cameetsatatsi irisavicajeitapaajenta. Impincatsatashiyetapempari ijitasorentsitashiyetari pashinisatipee atiri. Aitaque irojocajanajenari impiatsatanaquena, eiro nocaratajiritsi. ¹⁷Irotaque nonquisasanojeitanteariri, nojocajeitanajeri aisati eiro noquenqueshireacojeitajiritsi. Irointi noshinecoventeri omapocajeiteri oashinoncantsipee; oshequi ompomerentsitimotanaqueari.

Impoiji incantajeivetanaquea: ‘Iro ashinoncantacari, te intsipajeitanajeji Atasorensite.’¹⁸ Ariorica omoncaratapaquea aitaque nonijantareimentasanotanaqueri irantashiyetanaquearorica caari cameetsatatsi, impincatsatashiyetanaqueari ijitasorensiyeetiri.

¹⁹“Meecaquea pisanquenatacotavaquero pampoyeantsi niotacayempiri, poamejeiteriri pishanincepee impampoyeantearori. Irotaque quenqueshiretacyerine nocantasanotaqueri: ‘Pantajeitirocari caari cameetsatatsi.’²⁰ Ariorica nareetacaajeitaqueari quipatsiqui nococaasanotaqueriri, nocantasanotaqueriri intacantajeitaquempiniri nompajeiteri, oshiocasanoyetapai panquirentsiyetatsiri, eiro ocoiteimoyetajaritsi paitapeerica, aisati incanteani iroasanojeitapempa; irosati inquenqueshiretantanaquea impincatsatantayetanaqueariri ijitasorensitashiyetari. Eiro iquemisananajanatsi, impiatsatanaquena, eiro nocaratajiritsi.²¹ Iro cantaincha ariorica ompocashitaqueri oshequi oashinoncantsi aisati pomerentsitimoyetearine, ora pampoyeantsi irotaque quenqueshireacayerine, aisati iriori irishaninceajeitajeari. Eiro ipeacotantarotsi impampoyero. Tempa niotitacari paita iquenqueshireyetiri aisati paita irantayeteri, tequerata nareetacayeari quipatsiqui nocashiacaqueriri nomperiri.”

²² Irosati isanquenatantacaro Moiseshi pampoyeantsi iroamejeiteriri ishanincepee.

²³ Ari icantasanotiri Tasorensi Josué, yora itomini Nun:

“Pineaperotanaquea aisati pishintsishiretanaque. Tempa aviro aajeitanajerine pishanincepee pareetacaajeitanteariri quipatsiqui nocantasanotitacari. Noncanteani quiso noyempi.”

²⁴ Itsoncantacarori Moiseshi isanquenataquero icantaqueriri Tasorensi,²⁵ irosati icantantacari ishanincepeeni Leví quijacotapinitirori Cajón:

²⁶“Jeroa nosanquenataqueri. Pintsipatayero Cajón otimantari Icantacantiri Tasorensisanori Pitasorensite. Irotaque iotacayempineri icantasanotaquempiri Tasorensi: ‘Pantirocari caari cameetsatatsi.’²⁷ Tempa niojeitaquempi avirojei quishincari aisati piatsari. Aitaque picantajeita oshequi pipiatsajeitari Tasorensi ainiroquera nocarajeitimpi, jjaocarica pincantajeitanaqueari ariorica noncamaque!²⁸ Pamajeitaqueri aca maaroni jivatacantatsiri aisati jivatacaajeitiriri ishanincasanoripee, noncamantantayeteariri ocapee. Onquemanteariri inquite aisati quipatsi irotaque camantacoterineri.²⁹ Tempa niotaque ariorica noncamaque, ario pantajeitanaquero caari cameetsatatsi, pimpeacojeitanaquearo nocantavetaquempiri. Aisati niotacotaquempi coajica omapocajeitimpi oashinoncantsi. Tempa pantimotaqueri Tasorensi irotaque pinquisacanteariri.”

Ivampoyeane Moiseshi

³⁰ Irosati ipampoyeacaajeitantacari Moiseshi ishanincepee pampoyeantsi yapatojeitacanta. Intanacaro irosati overapaaca.

- 32 ¹“Pinquemavaquero inquite, noneanateri;
aisati quipatsi, pinquemavaquero noncantempiri.
- ² Ora noametantiri, ocameetsati, oquempetacaro oparii incani;
otsoteayetiro ocajashiiteayetiro inchashipee.
Aisati oquempetacaro opariajencatrica incani pashitomashiqui,
otsoteiro ocajashiiteayetiro casaveshipee.
- ³ Nonquenquetsatacoteri Avincatsarite Tasorentsi;
tempa icameetsatasanotaque.
¡Piotacotasanoteri Itasorentsitanotaque catsini!
- ⁴ Iriotaque jocaacoventajeitaqueeri;
ocameetsatasanotaque yantayetiri.
Oqueariotasanotaque icantayetiri.
Te iramatavitante, tecatsi irantane.
Icantacoventanti cameetsa, icameetsatasanotaque.
- ⁵ Aviro, atiri quishincari aisati piatsatincari,
oshequi pantimotaquero Tasorentsi caari ineacameetsati.
Te pincameetsate, irishanincajeitantempiri.
- ⁶ ¿Ariompa pincantimoteariri Tasorentsi?
Avirojeitaque quempetariri shinquiventi;
te ontime piotantari.
Tempa iriovetaca Piri, Vetsicaquempiri.
Ivetsicaquempi aisati yoaneaquempi.
- ⁷ Pinquenqueshireyetajero peerani avisayetaintsiri;
pincoacoyeteri piri, jeri jivatacantayetatsiri,
irio quenquetsatacaajempirone.
- ⁸ Peerani yora Tasorentsi Inquitequiniri
inashitacaacari atiripee aisati nampitsipee,
aisati inashitacayetacanari overayetapaaca iipatsitepee,
oquempetaro jaocarica icarajeitaquero ishanincasanoripee.
- ⁹ Arojeitaque yashisanojeitacari Tasorentsi, ishanincatantajeeri.
Tempa arojei ishaninca Jacoboni,
- ¹⁰ Ineajeitaquempi caaraiteriqui
quipatsi pirijaiteasanotatsiri, ojeoncapinitiri tampea.
Iro cantaincha iticaacoventaquempi aisati yoametaquempi,
yamenacoventasanotaquempi, piquempetacaro oquitsi.
- ¹¹ Iquempevetacari anteari paquitsa yojocaveetiro imencoshi,
yoametapinitiri irijani aavanquiachari iraranteari.
Aitaque iquempetacantaquempiri Tasorentsi
yoametapinitaquempi pisavicantajeiteari cameetsa.
- ¹² Apaniro ijivataquempi.
Tecatsi pashini tasorentsitatsine amitacotempine.
- ¹³ Imatacaaquempi panaacojeitaquero maaroni itsipapee,

- isavicacajeitaquempi otoncaiteapai quipatsi.
 Ipapinijeitaquempi oitsoqui shiocayetatsiri oantsiqui, poajeitari,
 jeri pitsija timatsiri imperitaqui,
 aisati quejitsi sotoajayetatsiri omapiporoquiyetapai quipatsi.
- 14 Aisati itasoncaventapinijeitaqueri pivirapee.
 Pirapinijeitiro itsomija vaca,
 poajeita ivatsa ovisha vatsanti aisati chiivo.
 Poajeita ivatsa vacapee poneachari quipatsiqui Basán,
 aisati poajeitaro tanta vetsicachari tirico cameetsavanetatsiri,
 aisati pirapinijeitiro ovaja cameetsajari.
- 15 Iro cantaincha pivatsatsanoyetanaca,
 irosati pojocantanacari Tasorentsi Vetsicavetaquempiri,
 Pimanintanaqueri jocaacoventavetaquempiri.
 aisati oavisaacojevetaquempiri.
- 16 Piquisacaasanotacari Tasorentsi,
 pipincatsatashiyetanacari ijitasorentsiyeetiri ipinquiri;
 tempa iriotaque itsaneacovetimpiri
- 17 Aisati pitaashiyetacanari pivira camaaripee,
 pijitasorentsitashiyetacari caari pineapinijeiti,
 aisati iroaquerari caari iquemisanti intacantajeiteerini.
- 18 Noshaninca, pipeacotasananacari Atasorentsite
 jocaacoventaqueeri.
 Te pinquenqueshiretimatanajeriji oaneaqueeeri.
- 19 Ineaquero Tasorentsi pantimoyetaqueriri,
 irosati iquishmentantaquempiro,
 te irineacameetsatajempi intomitantajempiri, aisati
 irishintotantajempiri.
- 20 Icanti: 'Nompitsocapitsatanajeri notapiiqui,
 inamenavaquerita jaoca incantanaqueeri!
 Tempa iriojeitaque piatsari.
 Te incameetsajeiteji catsini. Te irishirejeitena.
- 21 Iriotaque quisacaanari, ipincatsatashiyetari caari tasorentsisanori.
 Oshequi yashereacantaquenari ijitasorentsiyetiri. Ijivetaca irio
 Tasorentsi.
 Irotaque noshinetanteariri inquisheri atiripee caari noneacameetsati.
 Aisati nonquisacayeari atiripee caari coatsi inqueme.
- 22 Oshequi nonquisasanotanaquea, nonquempetanaquearo paamari,
 amorecanaque irosati Sharincaveniqui.
 Nontsoncasanojeitero quipatsi aisati shiocayetatsiri,
 nontaaquero osavicantari toncaaripee.
- 23 Nontiancajeiteneri oashinoncantsipee,
 nomanateri nochacopitepeequi.

- 24 Oamajeiteri itashe aisati catsiirentsi,
ontsoncajeiteri caamanentsi.
Nontiancajeiteneri manitipee covencatatsiri,
aisati maranquepee quepiatasanotatsiri.
- 25 Anta inampipeequi isataitayeeteri sataamentotsiqui itomipee,
aisati ivancopeequi ontimasanote tsaroantsi.
Incamajeitanaque evancaripee, jero evancaropee,
anteashiparipee jeri jananequi atsoyetatsiri itsomi.
- 26 Nocoavetaca novaraajeiterime, nontsoncasanojeitajerime,
tecatsi quenqueshiretacotanajerine.
- 27 Iro cantaincha te noncoye namavetero
irishirontimentajeiteari quisajeiterine.
Te noncoyeji irishemete quisajeitanari, incantajeite:
“Te irio Tasorentsi materone oca.
Narotaque antajeitaquerori notasorenaqui.”
- 28 Yora ishanincajeitaniri Israel
te anero iquenqueshireantari cameetsa,
aisati te anero iotantari.
- 29 Ariorica iriojeiteme, aitaque iriojeitaqueme
iriojeitaquerome jaoca inqueneri.
- 30 ¿Paita imatantacariri aparo atiri yoimishiajeitaqueri caravetachari
1,000? aisati caravetachari apite, ¿paita yoimishiajeitantacariri
caravetachari 10,000?
¡Tempa apaniro irinti Tasorentsi yojacaacoventiri,
irio coatsiri irishinetacoventeri quisantatsiri!
- 31 Iotasanoveta quisajeiteeri, yora jocaacoventiriri iriori,
eiro imatirotsi imoncarateari Atasorentsite.
- 32 Iquempejeitacaro ovamashi patsaatsiri,
iriojeitaque ishanincapeeni sodomasati
aisati gomorrasati,
quempejeitarori ova quepishiri aisati piantantsiri.
- 33 Ora ovaja irotaque iyepiare maranque,
joshiaquero iyepiare maranque oamantatsiri!
- 34 Maaroni oca noquenqueshiretaquero,
irosati omoncaratapaaquea nompiatanteariri;
- 35 Omoncarataquearica quitaiteri nontsoncantajeari.
noasanquetaimentajeiteri yantaqueri,
¡Quempejitapaaque quitaiteri intsoncajeitantajeari!
¡Queario, irotaintsi omoncaratea!
- 36 Yora Tasorentsi aitaque ijataque impiacoventeari ishanincapee
irineaqueririca eiro ishintsiyetanajitsi.
Yora Tasorentsi incavintsaajeiteri quemisantajeitiriri,

ineaqueririca eiro itimanajitsi catsini caari neaperotachane aisati
neaperotachane.

37-38 Irosati incantantaqueari:

‘¿Jaoca meeca pijitasorensiyetiri, yora jocaacoventimpiri
paventapinijeitari,
oapiniyetariri ireji pitayetiri aisati irayetirori ovaja pipiriri?
¡Intinaanaqueta iramitacojeitempi!
¡Impoqueta inticaacoventempi!

39 Narotaque apaniro Tasorensisanori,
tecatsi pashini tasorensitatsine quempetenane.

Narotaque oaneantatsiri aisati oamaantatsiri.
Narotaque patsaacantatsiri aisati naavintantiro.

¡Tecatsi matachane irojocaacoventea noasanquetayeririca!

40 Narotaque anaasanotirori inquite,
queario nocantasanoti: nocantaitatiani notimi.

41 Ariorica namequero nosavirite shipaquireasanotatsiri,
impoiji nintearo noncantacoventasanotante cameetsa, nompiateari
quisajeitaquenari.

¡Noashinoncaasanoteri maaroni quisanentanari!

42 Onquiraatsequitanaque nochacopitepee irirajaqui,
yoayetiri aisati yaayetavaqueri,
aisati ivincatsaritepeeni quisajeitanari, shemeyevetachari.
Nontsoncantajeiteari novesamentoqui.’

43 Avirojei pashinisatipee atiri, pincarajeiteri
ishanincepee Tasorensi, pinquimoshirejeite.
Iriotaque piacoventearine quemisantayetiriri yoyeevetacari.
Aisati impiateari oajeivetacariri.
Irosati incavintsaantajejanaro iipatsite
aisati impeacotero yantajeivetacari ishanincepee.”

Ivecarantanacarori Moiseshi icamantanajiri ishanincepee

44-45 Ari icatiimotacari Moiseshi maaroni ishanincepee, icarataqueri Josué itomi
Nun, ineanataqueneri oca pampoyeantsi irosati overapaacanta. 46 Impoiji icantiri:
“Pinquenqueshiretapinijeitero maaroni oca nocamantaquempiri. Irotaque
poametapinijeiteriri pitomipee, irimajeitantarori iriori maaroni ocantayetiri.
47 Te oncantashiyeteaji. Aitaque aneacaajempi pisavicaajeitanteari osamani
anta quipatsiqui timatsiri intatiqueroqui nija Jordán paayetapeeri.”

Ishinetaqueri Tasorensi Moiseshi yamenacoyetaquero quipatsi.

48-49 Irosati icantantacari Tasorensi Moiseshi:

“Nocoacaquempi pijate toncaaripeequi Abarim, pintoncaanaquero
toncaari Nebo, timatsiri quipatsi Moab, montetarori Jericó. Aitaque

pamenacotapeerori quipatsi Canaán nomperiri irashijeiteari pishanincepee. ⁵⁰Anta toncaariqui pintoncanaquenta, aitaque pincameri, pincarajeitapaajeri intayetacaroniri, iquempetaca pirementini Aarón icamantacari iriori toncaariqui Hor. Aitaque icaratapaajiriri. ⁵¹Tempa iriotaque picarataqueri pitseencaquena. Ineajeitaquempi pishanincepee anta nijapeequi Meribá-Cadés caaraiteriquiniri Sin, nocontejatacantaquempirori nija; te pimpincatsatenaji. ⁵²Irotaque pamenacotantayetearori areejiqui quipatsi nompajeiteriri pishaninca. Iro cantaincha eiro pareetarotsi avinti.”

Icantacoventiri Moiseshi ishanincepee.

- 33** ¹⁻²Tequerani incame Moiseshi, quemisantiriri Tasorentsi, icantacoventayetaqueri ishanincepee. Jeroca icantajeitiriri: “Yaniireimotantapaaqueeri Tasorentsi anta toncaariqui Sinaí. Iquitaiteacojeitaquee oponeaca quipatsiqui Seír; irosati toncaariqui Parán aisati Meribá-Cadés. Iriotaque pacotaqueerori Icantacantiri, oshiavetacaro paamari.
- ³Inintasanotiri Tasorentsi ishanincajeitajari, icantani iticaacoventiri coashitachari irantaveeteneri; aisati iriori itiyeroashjeitari, ipincatsatiri, iquemisantajeitaquero Icantacantiri.”
- ⁴Iriotaque Moiseshi pajeitaqueerori Icantacantiri Tasorentsi; oncanteani ontimimoteri ishanincepee Jacoboni.
- ⁵Iriotaque Tasorentsi pincatsariventeeri, yapatojeitantariri jivatacaajeiteeri aisati icarajeitantariri maaroni ishanincasanoripee.
- ⁶Icantacotaqueri ishanincepeeni Rubén: “¡Incanteani intime irishanincajeitajeari, omavetaquea te irishequiasanojeitanaque!”
- ⁷Ari icantacotaqueri ishanincepeeni Judá: “Notasorentsite, pinquemero incoacotempiri; poimpiajeri incarajeitantapaajeariri ishanincepee. Pinticaacoventeri pitasorencaqui; pamitacoteri ariorica iromanateri quisajeiterine.”
- ⁸Ari icantacotaqueri ishanincepeeni Leví: “Notasorentsite, aviro ashitasanotarori Tumim jero Urim, aisati iriori quearioventimpirori. Yora pineantacari anta nampitsiqui Masá piquisatsatanatariri anta nijapeequi Meribá,
- ⁹Icantantariri iriri: ‘Te noneapinitempi.’ Aisati irirenti: ‘Te niotempi.’

- Jeri itomipee: ‘Te niotempiji paitarica ashijeitimpiri.’
 Iriojeitaque moncarataquerori picantaqueriri,
 iquearioventasanotaquero icarajeitaquempi.
- 10 Iroametapinjeteri ishanincapee Jacoboni picantacantiri.
 Aisati incanteani irantaveetapinite Pinantariqui,
 intaapinitantempirori altariqui casancavaneri aisati virantsipee.
- 11 Tasorentsi pintasoncaventeneri paitapeerica irantayetempiri,
 pineacameetsatimentero irantaveere.
 Pintsoncajeteri quisajeivetearine,
 eiro itinaajeitanajatsi quisajeivetariri.”
- 12 Ari icantacotaqueri ishanincapeeni Benjamín:
 “Yora inintasanotiri Tasorentsi tecatsi ashereajeitajerine.
 Incanteani inticaacoventeri yora Jenoaquiniri,
 yojocaacoventeri isavicacaajeteri cameetsa.”
- 13 Ari icantacotaqueri ishanincapeeni José.
 “Intasoncacoventempero Tasorentsi piipatsite,
 ontimimotoempi cajashiiteri poneachari inquitequi,
 aisati nija tsoompoinaquiniri quipatsi.
- 14 Ontimasanote cameetsa oitsoquipee paviiteri osarentsipeequi
 aisati oitsoquitasanote cashiripeequi,
- 15 Ontimasanote cameetsayetatsiri shiocatsiri toncaaripeequi
 timitachari peerani
 aisati shiocatsiri otishipeequi timitachari peerani,
 aisati paitapeerica oitsoquiyetatsiri quipatsiqui.
- 16 Irotaque icoacaquerori Tasorentsi,
 yora quenquetsataciriri quitotseequishiqui taintsiri.
 Nocoaque irineajeitero ishanincapeeni José;
 tempa iriotaque icoyetaqueri yanaacotaqueri irirentipee.
- 17 Icameetsavorotasanaotaque, iquempevetacari intarori itimi irijani
 shirampari vaca.
 Ishintsitasanoti, iquempevetacari búfalo antearotatsiri itseequi,
 iranaacojeteri maaroni nampitsipeequiniri, irosati overapaaca
 quipatsi.
 Aitaque irishequiasanojeitanaque catsini irishanincajeitajeari Efraín
 aisati irishequijaetanaque irishanincajeitajeari Manasés.”
- 18 Ari icantacotaqueri ishanincapeeni Zabulón aisati Isacar:
 “Aviro Zabulón, pinquimoshireventero
 pimpimantayeteri pashiyeteari.
 Aisati avirori Isacar, pinquimoshireventero
 pivancoyeteerica pantaveetanteari.
- 19 Iriotaque cajemajeiterine pashinisatipee
 toncaariqui intimanteari Tasorentsi,

- incarajecteri iroyeneri ivira icoacaqueriri.
 Aisati inquimoshireventajeitero timayetatsiri incajarequi
 jero pinatasanoyetachari manachari impanequiqui.”
- 20 Ari icantacotaqueri ishanincapeeni Gad.
 “Icameetsatasanotaque Tasorentsi,
 yora paquempirori quipatsi antearoite.
 Piquempevetacaro antearo maniti onarea,
 oquisheayeta ojempequipeequi aisati oitoqui icovintsane.
- 21 Paaquero quipatsi cameetsaiteasanotatsiri,
 picoaque pimperi jivatacantatsiri.
 Ijivatacanaqueri ishanincapee,
 imoncarataqueneri Tasorentsi icoacaqueriri,
 imataqueneri maaroni ishanincapee cameetsayetatsiri.”
- 22 Ari icantacotaqueri ishanincapeeni Dan.
 “Aviro Dan, piquempetacari iroaquera antearitatsi maniti,
 imitajapaaque iponeanaca quipatsiqui Basán.”
- 23 Ari icantacotaqueri ishanincapeeni Neftalí.
 “Aviro Neftalí, inecameetsataquempi Tasorentsi,
 oshequi catsini itasoncacoventajeitaquempi
 pashitearo incajare irosati oquirincatanaque.”
- 24 Ari icantacotaqueri ishanincapeeni Aser:
 “Intasoncacoventasanoteri Tasorentsi Aser
 irisaviquimojecteri itsipa itomipee Jacoboni.
 Iriotaque inintasanoejitiri irirentipee.
 Itiritantaro iitipeequi oreji orivo.
- 25 Irashitacotasanoitearo ashitacorontsi quisoyetatsiri ishiropee aisati
 bronce
 aisati irishintsitasanote oquempeta osamani yanei.”
- 26 “Tecatsi quempetearine Itasorentsite Israel,
 Iquempetacari quijacotachari cavaayoqui,
 ishiavetacari pincatsari iquenapaaque mencoriqui inquitequiniri,
 impocashitempi iramitacotantempiri.
- 27 Yora Tasorentsi caari tsoncanetachane,
 iriotaque paventeari irojacaacoventempi;
 ocantani otime itasorenca yamitacotantempiri.
 Yoimishiajeitaqueri quisajeivetaquempiri
 aisati icoacaquempi pintsoncasanojecteri.
- 28 Yora ishanincajeitaniri Israel irisavicajecte cameetsa,
 aisati iriori irishanincajeitajeari,
 tecatsi asheraanajeitajerine.
 Anta iipatsitepeequi ontimasanojete tiricomashipee jero ovamashipee,
 aisati eiro ocoiteimotajaritsi incani.

29 Avirojei ishanincajeitaniri Israel, pinquimoshirejeitanaque.
 ¿Jaanica materoni irimoncarayempi?
 Tempa iriotaque Tasorentsi oavisaacotajimpiri,
 iriotaque ticaacoventempine aisati iramitacotempi.
 Irimatacaayetempiri pintsoncajeiteri quisajeitempine,
 eiro icoanajitsi irimanajeitempi,
 poveitajeiteri ishemejeitini.”
 Irotaque icantacoventaqueriri.

Icamantacari Moiseshi.

34 ¹Ari itoncaanaquero Moiseshi toncaari Nebo, irosati otishitapaaque Pisgá montetarori Jericó. Aitaque yonijayetaqueriri Tasorentsi maaroni quipatsi, oponeanaca Galaad irosati anta irisavicayetenta ishanincapee Dan. ²⁻³Jero irashiteari Neftalí, Efraín jeri Manasés, jero maaroni irashiteari Judá irosati incajarequiniri Mediterráneo. Oponeanaca quipatsiqui Négueb jero ovinteniiteapaita nija Jordán, irosati osantenitapaaque nampitsiquiniri Jericó, otimasanoyetapai compiroshipee, irosati nampitsiqui Sóar. ⁴Irosati icantantacari:

“Irotaque onta quipatsi nocantasanotaqueriri Abrahamani, Isaacani jeri Jacoboni, coajica nompajeiteri pishanincajeitajeari. Irotaque nocoacaquempiri pamenacoyetero. Iro cantaincha eiro paretarotsi avinti.”

⁵Aitaque ocantacari icamaque Moiseshi, quemisantasantiriri Tasorentsi icoacaqueriri. Tempa aitaque icantitaca Tasorentsi. ⁶Ari ipeashitaca itijaca anta oirincaiteapai Moab, montetarori Bet-peor. Tecatsi iotatsine, irosati meeca. ⁷Icamantacari, ocaratapaaque 120 irosarentsite. Irosati icanta ineantasanoti aisati te irimantsiaveetanaqueji.

⁸Yora ishanincapee icantani yoashiretacojeitanacari, ocarataque 30 quitaiteri iraacotasanojeitacari. Imoncarataquero yamejeitari. ⁹Irosati ipoyeetantajari Josué. Tequera incameni Moiseshi, yaajiricainataqueri iitoqui icantacoventantacariri Tasorentsi, iotacaasanotantacariri. Irotaque iquemisantasanojeitantacariri ishanincapee aisati imoncarajeitaquero icantaqueriri Tasorentsi Moieshini.

¹⁰Iro cantaincha te intimajeji pashini quenquetsatacantajantsine ishanincapeequi Israel, quempetajearine Moiseshi, iquenquetsatacaquerini Tasorentsi quempeji, ¹¹aisati matajerone maaroni caari ineapiniyeti ora icantaqueriri Tasorentsi Moieshi, yonijaaqueriri pincatsari anta Egiptoqui, jeri amitacotiriri aisati inampiquiniri. ¹²Aisati tecatsi moncaratajearine imayetaquero antearoite yantayetaqueri ora ineacotapinijeitaqueriri ishanincapee.